

॥ कोबातीर्थमंडन श्री महावीरस्वामिने नमः ॥

॥ अनंतलब्धिनिधान श्री गौतमस्वामिने नमः ॥

॥ गणधर भगवंत श्री सुधर्मस्वामिने नमः ॥

॥ योगनिष्ठ आचार्य श्रीमद् बुद्धिसागरसूरीश्वरेभ्यो नमः ॥

॥ चारित्रचूडामणि आचार्य श्रीमद् कैलाससागरसूरीश्वरेभ्यो नमः ॥

आचार्य श्री कैलाससागरसूरि ज्ञानमंदिर

पुनितप्रेरणा व आशीर्वाद

राष्ट्रसंत श्रुतोद्धारक आचार्यदेव श्रीमत् पद्मसागरसूरीश्वरजी म. सा.

जैन मुद्रित ग्रंथ स्केनिंग प्रकल्प

ग्रंथांक : १



श्री महावीर जैन आराधना केन्द्र

आचार्यश्री कैलाससागरसूरि ज्ञानमंदिर
कोबा, गांधीनगर-श्री महावीर जैन आराधना केन्द्र
आचार्यश्री कैलाससागरसूरि ज्ञानमंदिर
कोबा, गांधीनगर-३८२००७ (गुजरात)
(079) 23276252, 23276204
फेक्स : 23276249

Websiet : www.kobatirth.org

Email : Kendra@kobatirth.org

शहर शाखा

आचार्यश्री कैलाससागरसूरि ज्ञानमंदिर
शहर शाखा
आचार्यश्री कैलाससागरसूरि ज्ञानमंदिर
त्रण बंगला, टोलकनगर
परिवार डाइनिंग हॉल की गली में
पालडी, अहमदाबाद - ३८०००७
(079) 26582355

P 14016

॥ श्री औपपातिक सूत्रम् ॥



પૂ. આચાર્યદેવ શ્રી આનંદસાગરસૂરીશ્વરજી મ.સા.ના ચરણે શરૂ શરૂ વંદન...



देवसूरतपागच्छसमाचारीसंरक्षक-सुविहितसिध्धांतपालक
 बहुश्रुतोपासक-गीतार्थ-चारित्रचूडामणि-आगमोद्धारक पूज्यपादआचार्यदेवेश
 श्रीआनंदसागरसूरीश्वरजीमहाराजा संशोधित-संपादित ४५आगमेषु

॥ औपपातिकमुपांगं ॥

♦ आलेखन कार्य - प्रेरक - वाहक: ♦

प्रवचन प्रभावक पू. आ. श्री हेमचन्द्रसागरसूरिजी म.सा. शिष्यरत्न पू. गणिवर्य श्री पूर्णचन्द्रसागरजी म.सा.

♦ आलेखन कार्य वाहक संस्था ♦

पूज्यपाद सागरजी महाराजा संस्थापित जैनानंद पुस्तकालय - सुरत

आलेखन कार्ये किंचित् संस्मरणाणि

* आलेखन कार्ये आशीवृष्टिकारका :

पू. गच्छा. आ. श्री सूर्योदयसागर सूरेश्वरजी म.सा.

पू. आ. श्री. नरेन्द्रसागर सूरेश्वरजी म.सा.

पू. आ. श्री अशोकसागर सूरिजी म.सा.

पू. आ. श्री जिनचन्द्रसागर सूरिजी म.सा.

पू. आ. श्री हेमचन्द्रसागर सूरिजी म.सा.

* आलेखन कार्ये केचित् मार्गदर्शका :

पू. आ. श्री दोलतसागर सूरिजी म.सा.

पू. पं. श्री हर्षसागरजी म.सा.

पू. गणीश्री सागरचन्द्रसागरजी म.सा.

पू. गणी श्री नयचन्द्रसागरजी म.सा.

पू. गणी श्री अक्षयचन्द्रसागरजी म.सा.

पू. मुनि श्री लब्धिचन्द्रसागरजी म.सा.

माहिती दर्शक पत्र

■ आलेखन कार्ये सहयोग प्रदाता :

मुनिश्री आगमचन्द्रसागरजी म.सा.

श्राद्धगुण संपन्न श्री नरेन्द्रभाई मुक्तिलाल महेता (सूर्यगामवाला)

■ प्रथम संस्करण - सं. २०६१, का. सु.५.

■ कृति - २५०

■ कोऽधिकारी...?- श्रुत भाण्डागारं श्रमण प्रधान चतुर्विध संघाश्च

■ संग्राहकालय - जैनानंद पुस्तकालय, गोपीपुरा, सुरत।

■ व्यवस्थापका :

श्री उषाकांतभाई झवेरी- श्री नरेशभाई मद्रासी-श्री श्रेयस के. मर्चन्ट

■ आवास : निशा-१ १ले माले ,गोपीपुरा, काजीनुं मेदान,
तीनबत्ती, सुरत. दूरभाष - २५९८३२६ (०२६१)

■ मुद्रण कार्यवाहक

श्री सुरेश डी. शाह (हेष्मा)-सुरत।

संपादक श्री

॥ પ્રાક્-કથન ॥

॥ કત્થ અમ્હારિસા પાણી દુષમા-દોષ દુષિયા, હા; અણાહા કહં હૂન્તા...! ન હૂન્તો જહ્ જિણાગમો ॥

દુષ્મકાળે જિનાગમ-જિન પ્રતિમા ભવિચણ કું આધારા...!!

ભવાટવીમાં ભ્રમિત પ્રાણીને ભીમ મહાટવીમાંથી બહાર લાવનાર મિથ્યાત્વરૂપ અંધકારમાંથી પ્રકાશ તરફ ગતિ કરાવનાર શ્રુતજ્ઞાનની મહત્તા અદ્વિતીય કક્ષાની છે. શ્રુતજ્ઞાનનો મહીમા પરમ મનનીય અને માનનીય હોવાના કારણે પ્રભુ શાસનમાં પરમ આધાર ભૂત કરણ તરીકે ગણના કરી છે. આગમએ વીર પ્રભુની વાણી સ્વરૂપ છે.

આગમોની રચના કાળ :- પ્રભુ મહાવીર સ્વામીના શાસનની અપેક્ષાએ વીર નિર્વાણ સંવત પૂર્વે ૨૯, વિક્રમ સંવત પૂર્વે ૪૯૯ વર્ષે વૈશાખ સુદ એકાદશી દિને તારક તીર્થંકર પ્રભુ મહાવીર દેવની ત્રિપટીને પામી આઘ ગણધર અનંતલબ્ધિ નિધાન શ્રી ઈન્દ્રભૂતિ (ગૌતમસ્વામીજી) આદિ એકાદશ ગણધરોએ આગમોની રચના કરી તેજ ક્ષણે પ્રભુએ તેની યથાર્થતા-ગણાનુજ્ઞા-શાસનાનુજ્ઞા આદિના વાસકોપથી જાહેર કરી.

ગણધર ભગવંતના શિષ્યો-મુનિઓએ યથાયોગ્યતાનુંસાર શિષ્ય-પ્રશિષ્યાદિ પરિવારને વિનયપૂર્વક શાસ્ત્ર નિર્દિષ્ટ વિધિ-મર્યાદા પૂર્વક ગુરૂ પાસેથી મુખપાઠ રીતે દ્વાદશાંગીનો અભ્યાસ કરતા હતાં, લખીને કે લખેલ પુસ્તકો દ્વારા ભણવા અંગે તત્કાળે પરંપરા ન હતી.

પ્રથમ વાચના :- વીર પ્રભુના નિર્વાણબાદ તેમની પટ્ટ પરંપરામાં પાંચમા કેવલી તરીકે પ્રસિધ્ધ શ્રી ભદ્રબાહુ સ્વામીજીના સમયમાં વિષમકાલના બલના પ્રભાવે ભયંકર બાર વર્ષીય દુકાલ પડ્યો સાધુઓ અનુકૂળતા મુજબ વેર વિખેર થયાં, સાથો સાથ વીર નિ. સં. ૧૫૫ લગભગમાં નંદવંશના સામ્રાજ્યનો પલટો થયો, દેશમાં ભયંકર આંધી વ્યાપી, જૈન શ્રમણોના વિહારના કેન્દ્રરૂપ મગધદેશની

॥ પ્રાક્-કથન ॥

૧

સંપાદક શ્રી

રાજધાની પટણા અને પંજાબ વચ્ચેના પ્રદેશો ભીષણ પરિસ્થિતિમાં મૂકાયા, શ્રમણ સમુદાયના વિખરાઈ જવાથી આગમોનું પઠન-પાઠન ખુબ જ અવ્યવસ્થિત થયું, જ્ઞાની પુરૂષોમાંથી કેટલાયે સ્વર્ગે પધાર્યા, મુખપાઠની પધ્ધતિ પર એક જબરદસ્ત ધક્કો લાગ્યો પરિસ્થિતિને સુધારવા વીર નિ. સં.-૧૬૦ લગભગમાં પાટલીપુત્ર નગરે (પટના-બિહાર) શ્રી સ્થુલભદ્ર સ્વામીની અધ્યક્ષતામાં શ્રમણસંઘ એકત્રિત થયો, ગીતાર્થોના સલાહ મુજબ દ્વાદશાંગીની સંકલના વ્યવસ્થિત કરવાનો પ્રયાસ કર્યો, પ્રાયઃ આ પ્રથમ આગમ વાચના થઈ તેનું નામ ‘ શ્રી દ્વાદશાંગ-શ્રુતસંકલન’ નામે પંકાયાનો ઇતિહાસ મળે છે.

દ્વિતીય વાચના :- તેમના પછી જિનકલ્પીના અભ્યાસક આર્ય મહાગિરીજીના ગુરુ ભ્રાતા પૂ. આ. શ્રી આર્ય સુહસ્તિ સૂરિ પ્રતિબોધિત પ્રભુ શાસનના ચરમ ભક્ત સમ્રાટ સંપ્રતિએ ઉજ્જૈનમાં આર્ય સુહસ્તિ મ. ને વિનંતી કરી તેમના સાનિધ્યમાં વીર નિ. સં. ૨૪૫ થી ૨૮૧ના વર્ષોમાં જિનાગામની સાચવણી સુરક્ષિત રહે તેવા યથાર્થ પ્રયાસો કર્યા, પઠન-પાઠનની વ્યવસ્થામાં આવેલી ખામીને દૂર કરી જેથી આ બીજી વાચનાનું નામ ‘ આગમ સંરક્ષણ વાંચના’ દૃષ્ટિ ગોચર થાય છે.

તૃતીય વાચના :- મૌર્ય રાજવંશીઓનો સેનાપતિ પુષ્યમિત્રે રાજદ્રોહ કરી રાજા બન્યો ધર્માધ બનેલા સમ્રાટ સંપ્રતિની શાસન પ્રભાવનાને નામ શેષ કરવા તેણે જૈન શ્રમણો તથા બૌદ્ધ શ્રમણોના શિરચ્છેદ કરાવી કાળો કેર વર્તાવ્યો, સાધુઓ પ્રાણ રક્ષાર્થે કલિંગ દેશ તરફ ચાલ્યા ગયા, કલિંગાધિપતિ મહામેઘવાહન ખારવેલ મહારાજા પરમ જૈન હતાં. આ પ્રમાણે પ્રાણ બચાવવાની વ્યથામાં જિનાલયો તથા, આગમ પઠન-પાઠનની વ્યવસ્થાને જબરદસ્ત હાની થવા પામી, કલિંગ દેશના રાજા ભિક્ષુરાય ખારવેલે તેનો પરાજય કરી ફરી જીવંત કરવા પ્રયાસ કર્યો વીરનિ. સં. ૩૦૦ થી ૩૩૦ સુધીના મધ્યાહ્ન કાલમાં મુનિ સમ્મેલનમાં જિનકલ્પિની તુલના કરનાર પૂ.આ. મહાગિરીના શિષ્યો-પ્રશિષ્યો આ. બલિસ્સહ સૂ.મ. આ. દેવાચાર્ય, આ. ધર્મસેન વિગેરે ૨૦૦ શ્રમણો, આ. સુસ્થિત સૂરિ વગેરે સ્થવિર કલ્પિ ૩૦૦ શ્રમણો, આર્યા પોઈણી વિગેરે ૩૦૦ શ્રમણીઓ, સીવંદ, ચૂર્ણક, સેલગ વગેરે ૭૦૦ શ્રાવકો અને પૂર્ણ મિત્રાહિ ૭૦૦ શ્રાવિકા દ્વારા ત્રીજી આગમ

વાયનામાં અગિયાર અંગો અને દશ પૂર્વોના પાઠોને વ્યવસ્થિત કરવામાં આવ્યા.

ચતુર્થ વાચના :- કાલાધિન અંતિમ દશપૂર્વધર, બાલ વૈરાગી, અનુપમ સંવેગી શ્રી વજ્રસ્વામીએ અંતિમ સમયે સ્વ પટ્ટધર શ્રીવજ્રસેન સૂ.મ.ને ભયંકર દુકાલના ચરમ સમયની જાણમાં 'લાખ સોનેયા આપીને એક હાંડી ભાતની ચડશે તેના બીજા દિવસથી સુકાલ થશે' આ વાત જણાવી આવો ભયંકર દુકાલ વીર નિ. સં. ૫૮૦ થી ઉત્તર ભારતમાં વ્યાપ્ત થયો. જેમાં ગણો-કુલો-વાચકવંશો માત્ર નામશેષ થઈ ગયા. આગમ વારસો ટકાવનાર મુનિપુંગવોની સંખ્યા જૂજ થઈ ગઈ કાળ-બળ ક્ષયે ધારણા શક્તિની અનુકૂલતા પ્રમાણે પણ જો આગમનું સંકલન કરવામાં નહીં આવે તો રહ્યા સાધુઓ પણ રહેલા આગમના વારસાને સાચવવા સમર્થ ન નિવડી શકે માટે ભવિષ્યના અલ્પશક્તિવાળા પણ મેઘાવી સાધુઓને રાખવામાં વિષયાનુસંધાન દ્વારા સુગમતા સાંપડે તેથી સમકાલીન અન્ય પ્રભાવક આચાર્યોની સંમતિ લઈ શ્રી આર્યરક્ષિત સૂરિ મ. ચાર અનુયોગની વ્યવસ્થા કરી. આગમોને ચિરંજીવ બનાવ્યા વીર નિ. સં. ૫૮૨ લગભગમાં દશપુર (મંદસૌર) (માલવા) નગરે ચોથી વાચના થઈ.

પંચમ વાચના :- વીર સં. ૮૩૦ થી ૮૪૦ લગભગમાં પૂ. આ. સ્કંદિલ સૂરિએ ઉત્તરાપથના મુનિઓને મથુરામાં તથા નાગેન્દ્રવંશીય પરમ પ્રભાવક શ્રી હિમવંત ક્ષમા શ્રમણના શિષ્ય આ. શ્રી નાગાર્જુન સૂરિએ દક્ષિણાપથના મુનિઓને વલભીમાં આગમોની સંકલના કરવા એકઠા થયા કીંતુ તે સમયની દેશગત અંધાધુંધીના કારણે એક જ સાથે ભિન્ન-ભિન્ન સ્થળે આગમવાચનાઓ કરી ભવિષ્યમાં માથુરી અને વલભીવાચનાઓના પાઠ ભેદોનું સમન્વય સહજ થઈ જશે આ હેતુપૂર્વક પાંચમી વાચના કરી.

ષષ્ઠી વાચના :- તેજ ભાવનાઓ અનુસાર માથુરી વાચનાના વારસદાર આ. શ્રી દેવદ્વિગણી ક્ષમાશ્રમણે તથા વલભીવાચનાના વારસદાર આ. શ્રી કાલક સૂરિએ ભેગા મળી. શ્રમણ સંઘને એકત્રિત કરી, કાલકમે વિણસી જતા આગમના ખજાનાને સ્થાયી બનાવવાના શુભ આશયથી શ્રી શત્રુંજ્યાધિષ્ઠાયક શ્રી કપર્દીયક્ષ આદિ દૈવીક સહાયકથી ૫૦૦ આચાર્યાદિઓએ મળી વલભીપુર(વળા સૌરાષ્ટ્ર)માં

પુસ્તકારૂઢ રૂપ આગમ વાચના કરી, આ વાચનામાં ચોરાશી આગમોનું વ્યવસ્થિત સંકલન તાડપત્રના પાના ઉપર લિપિબધ્ધ કરી આગમોને પુસ્તકારૂઢ કરવાનું કાર્ય સાધુ ભગવંતોએ કર્યું. તેમજ અન્ય મહત્વના ગ્રંથોનું પુસ્તકાલેખન કાર્ય થયેલ, ત્યારબાદ સાધુ સત્યમિત્ર સ્વર્ગે ગયા અને વીર નિ. સં. ૧૦૦૦માં વર્ષે પૂર્વજ્ઞાનનો વિચ્છેદ થયો તેમ મનાય છે.

પ્રભુવીરના શાસનમાં ઉપરોક્ત ‘છ’ વાચનાઓના માધ્યમે ૧૦૦૦ વર્ષના ગાળામાં થયેલ શ્રુતોધ્ધારનો ઇતિહાસ મોજૂદ છે. ત્યાર પછી ૧૫૦૦ વર્ષ સુધી આગમ વાચનાનો કે શ્રુતોધ્ધારનો કોઈ ઉલ્લેખ નથી મળતો.

તેમજ વિષમકાળના પ્રભાવથી ૧૦મી સદીની સમાપ્તિ કાળથી શિથિલાચારની વૃદ્ધિ થવાથી આગમિક જ્ઞાનની પરંપરા સુવિહિત ગીતાર્થ, આચાર સંપન્ન શ્રમણોના હાથમાં રહી નહીં પરિણામે હસ્તલિખિત પ્રતોમાં રહેલ આગમો અધિકારીને પણ મળવા દુર્લભ બન્યા.

છેવટે વીસમી સદીના ઉત્તરાર્ધના પ્રારંભકાળે સુવિહિત સંવેગી સાધુઓમાં આચાર નિષ્ઠા, વિશિષ્ટ વૈરાગ્યની પ્રબલ ભૂમિકા આદિ સુદૃઢ હોવા છતાંય આ બધાને ટકાવવા માટેના જરૂરી સંજોગો ન મળતાં આગમિક જ્ઞાનની માત્રા પઠન-પાઠનની શાસ્ત્રીય પરંપરા સુરક્ષિત ન રહી શકવાના કારણે ખુબ જ અલ્પ માત્રામાં રહેવા પામી

આવા અવસરે શ્રમણસંઘની ૧૮ પ્રસિધ્ધ શાખાઓમાં વધુ પ્રભાવશાળી ‘સાગરશાખા’ના અદ્વિતીય પ્રતિભા સંપન્ન પ્રૌઢધીષણશાલી અનેકવાદો કરી તપાગચ્છની વિજય પતાકા ફેલાવનાર પૂ. મુનિરાજ શ્રી ઝવેરસાગરજી. મ.ના. એક માત્ર શિષ્ય નવ માસના ટૂંકા ગાળાનો જ ગુરૂ સહવાસ છતાં પૂર્વજન્મની આરાધનાના બળે એકલે હાથે ન્યાય-વ્યાકરણ, આગમટીકા આદિ અનેક સાધના ગ્રંથોનું અગાધ વિદ્વત્તા પૂર્ણ જ્ઞાન મેળવી પૂ. ગુરૂદેવ શ્રી ઝવેરસાગરજી મ.ની આગમોની પારદંશ્યતાના વારસાને તે ગુરૂદેવશ્રીના અન્તિમ સમયના “ આગમો કા અભ્યાસ બરોબર કરના ” શબ્દ પાછળ રહેલ ઉંડા અંતરના આશિષના બળે આગમિક તલસ્પર્શી અગાધ માર્મિક જ્ઞાન આપ મેળે મેળવી વીર નિ. સં. ૨૪૪૦ વિ.સં. ૧૯૭૦માં કો’ક મંગલ ચોઘડીએ જિનશાસનના એક મહાન ધુરંધર સમર્થક પ્રભાવક શાસ્ત્રોના પારગામી

આચાર્યભગવંતો વર્ષો જૂની શ્રમણસંઘની ફરજ અને જવાબદારી રૂપ આગમોના અણમોલ વારસાને સુરક્ષીત રાખવાના પ્રશ્ને ફરીથી ઉપસ્થિત કરી.

રાજ્યદ્વારી ઉપદ્રવો, ધર્માધ ઝનૂન, બ્રિટીશ હકૂમત, જનતામાં ફેલાયેલ ક્રાન્તિકારી વિચારધારા, પશ્ચાત્ય કેળવણીના સંસ્કાર આદિ સંઘર્ષ કાળમાં પુસ્તકો પ્રતો મેળવવી અતિકઠીન હતી તે સમયે જુદા જુદા ખૂણે રહેલી હસ્તપ્રત-તાડપત્ર આદિ પરથી સંશોધન કરી જાત મહેનતે પ્રેસકોપીથી માંડીને સુધારવા સુધીની સંપૂર્ણ દેખરેખ જવાબદારીથી આગમ ગ્રંથોની મર્યાદિત પ્રતિઓ છપાવી સામુદાયિક વાચનાઓ વિ. સં. ૧૯૭૧થી ૧૯૭૭ સુધીમાં પાટણ-કપડવંજ-અમદાવાદ-સુરત આદિ ક્ષેત્રોમાં છ-છ મહીનાની વાચનાઓ ગોઠવી સેંકડો સાધુ-સાધ્વીઓને આગમોને વાંચવાની પરિપાટી આદિનો સંપૂર્ણ ખ્યાલ કરાવ્યો સાત સામુદાયિક વાચનાઓમાં ૨૬ ગ્રંથો વાંચ્યા તેમાં લગભગ ૨,૩૩,૨૦૦ શ્લોકની વાચના આપી તથા આગમ દિવાકર પૂ. મુનિશ્રીપુણ્યવિજયજી મ. આદિને પણ આ ક્ષેત્રે આગળ વધવા અંગૂલ નિર્દેશ કરી આ મહાપુરુષે શ્રુત સરિતાને ધોધમાર વહેતી કરી છે.

આ મહાપુરુષ તે પ્રાતઃ સ્મરણીય ગુજરાત-માલવા-રાજસ્થાન-બંગાલ- બિહાર આદિ અનેક ક્ષેત્ર સંઘો તથા સુરત સંઘના આમૂલચૂલ ઉપકારી, આગમોધ્ધારક ધ્યાનસ્થ સ્વર્ગસ્થ પ.પૂ. આચાર્યશ્રી આનંદસાગર સૂરીશ્વરજી મહારાજ જેઓ ‘ પૂ. સાગરજી મ.’ ના લાડીલા, હૂલામણા નામથી પણ પ્રસિદ્ધ હતાં તેમના જ સંશોધિત આગમો અમને પ્રતાકારે પુર્ન મુદ્રિત કરાવવાનો લાભ પ્રાપ્ત થયો છે. તા.ક. વર્તમાન કાળે ગ્રન્થો, શાસ્ત્રો, સુવિહિત ઐતાર્થ આચાર્ય ભગવંતો, ઈતિહાસકારો પાસેથી પ્રાપ્ત થતી માહિતી અનુસાર વીર નિર્વાણના ૧૦૦૦ વર્ષમાં છ-છ વાચના-સંકલન બાદ ૧૫૦૦ વર્ષ સુધીમાં આવું કોઈ કાર્ય થયેલ જણાતું નથી ત્યાર બાદ એકલા હાથે આપ બળે સૌ પ્રથમ આગમ ઉધ્ધારના ભગીરથ કાર્યને કરનાર ગુરૂદેવને કોટી-કોટી વંદના...

॥ औपपातिकमुपांगं ॥

तेणं कालेणं तेणं समएणं चंपा नामं नयरी होत्था रिद्धत्थिमियसमिद्धा पमुइयजण (जणुज्जाण पा०) जाणवया आइण्णजणमणुस्सा
 हलसयसहस्ससंकिट्ठविकिट्ठलट्ठपण्णत्तसेउसीमा कुक्कुडसंडेअगामपउरा उच्छुजवसालिकलिया (मालिणीया पा०) गोमहिसगवेलगप्पभूता
 आयारवंतचेइयजुवइविविह (अरिहन्तचेइयजणवयवि० सुयागचित्तचेइयजुय० पा०) सण्णिविट्ठबहुला उक्कोडियगाय (गाह पा०)
 गंठिभेयभडतक्करखंडरक्खरहिया खेमा णिरुवहवा सुभिक्षा वीसत्थसुहावासा अणेगकोडिकुडुंबियाइण्णणिव्वुयसुहा णडणट्ठगजल्लमल्ल-
 मुट्ठियवेलंबयकहगपवगलासगआइक्खगलंखमखतूणइल्लतुंबवी णियअणेगतालायराणुचरिया आरामुज्जाणअगडतलागदीहियवप्पिणि-
 गुणोववेया (नंदणवणसन्निभप्पागास पा०) उव्विद्धविउलगंभीरखायफलिहा चक्कगयमुसुंढिओरोहसयग्घिजमलकवाडघणदुप्पवेसा
 धणुकुडिलवंकपागारपरिक्खत्ता कविसीसयवट्ठइयसंठियविरायमाणा अट्ठालयचरियदारगोपुरतोरणउण्णयसुविभत्तरायमंगगा छेयायरियर-
 इयदढफलिहइंदकीला विवणिवणिच्छेत्त (छेय पा०) सिप्पियाइण्णणिव्वुयसुहा सिंघाडगतिगचउक्कचच्चर (चउम्मुहमहापहपहेसु
 पा०) पणियावणविविहवत्थुपरिमंडिया सुरम्मा नरवइपविइण्णमहिवइपहा अणेगवरतुरगमत्तकुंजररहपहकरसीयसंदमाणीया-

॥ औपपातिकमुपांगं ॥

१

पू. सागरजी म. संशोधित

इण्णजाणजुग्गा विमउलणवणलिणिणिसौभियजला पंडुरवरभवणसण्णिमहिया उत्ताणणयणपेच्छणिज्जा पासादीया दरिसणिज्जा अभिरूवा पडिरूवा ।१। तीसे णं चंपाए णयरीए बहिया उत्तरपुरिच्छमे दिसिभाए पुण्णभदे नामं चेइए होत्था, चिराईए पुव्वपुरिसपण्णत्ते पोराणे सहिए वित्तिए (कित्तिए पा०) णाए सच्छत्ते सज्झए सधंटे (सपडागे पा०) पडागाइपडागमंडिए सलोमहत्ये कयवेयहिए लाउल्लोइयमहिए गोसीससरसरत्तचंदणदहरदिण्णपंचंगुलितले उवचियचंदणकलसे चंदणघडसुकयतोरणपडिदुवारदेसभाए आसत्तोसत्तविउलवट्टवग्घारियमल्लदामकत्तावे पंचवण्णसरससुरहिमुक्कपुप्फपुंजोवयारकलिए कालागुरुपवरकुंदुरुक्कतुरुक्कड-
ज्झंतधूवमधमधंतगंधुदधुयाभिरामे सुगंधवरगंधगंधिए गंधवट्टिभूए णडणट्टगजलल्मल्लमुट्टियवेलंबयपवगकहगलासग आइक्खगलंख्रमं-
खतूणइल्लतुंबवीणियभुयगमागहपरिगए बहुजनजाणवयस्स विस्सुयकित्तिए बहुजनस्स आहुणिज्जे पाहुणिज्जे अच्चणिज्जे वंदणिज्जे नमंसणिज्जे पूयणिज्जे सक्कारणिज्जे सम्भाणणिज्जे कल्लाणं मंगलं देवयं चेइयं विणएणं पज्जुवासणिज्जे दिव्वे सच्चे सच्चोवाए सण्णिहियपाडिहेरे जागसहस्सदायभागपडिच्छए (जागभागदायसहस्सपडिच्छए पा०) बहुचणो अच्छेइ आगम्भ पुण्णभदं चेइयं
।२। से णं पुण्णभदे चेइए एक्केणं महया वणंसंडेणं सव्वओ समंता संपरिक्खत्ते, से णं वणंसंडे किण्हे किण्होभासे नीले नीलोभासे हरिए हरिओभासे सीए सीओभासे णिब्दे णिब्दोभासे तिव्वे तिव्वोभासे किण्हे किण्हच्छाए नीले नीलच्छाए सीए सीयच्छाए णिब्दे णिब्दच्छाए तिव्वे तिव्वच्छाए घणकडिअतडिच्छाए रम्भे महामेहणिकुरंबभूए, ते णं पायवा मूलमंतो कंदमंतो खंधमंतो तथामंतो सालमंतो

पवालमंतो पत्तमंतो पुष्पमंतो फलमंतो बीयमंतो (हरियमंतो पा०) अणुपुव्वसुजायरुइलवट्टभावपरिणया एक्खखंधा अणेगसाला
 अणेगसाहप्पसाहविडिमा अणेगनरवामसुप्पसारिअअगेज्झघणविउलबद्धखंधा (पाईणपडिणाययंसाला उदीणदाहिणविच्छण्णा
 ओणयनयपणयविप्पहाइयओलंबपलंबलंबसाहप्पसाहिविडिमा अवाईणपत्ता अणुईण्णअणपत्ता पा०) अच्छिदपत्ता अविरलपत्ता
 अवाईणपत्ता अणईअपत्ता निदधुयजरढपंडुपत्ता णवहरियभिसंतपत्तभारंधकारगंभीरदरिसणिज्जा उवणिग्गयणवतरुणपत्तपल्लवकोमल-
 उज्जलचलंतकिसलय सुकुमालपवालसोहियवरंकरग्गसिहरा णिच्चं कुसुमिया णिच्चं माइया णिच्चं लवइया णिच्चं थवइया णिच्चं
 गुलइया णिच्चं गोच्छिया णिच्चं जमलिया णिच्चं जुवलिया णिच्चं विणमिया णिच्चं पणमिया णिच्चं कुसुमियमाइयलवइय-
 थवइयगुलइयगोच्छियजमलियजुवलियविणमियपणमियसुविभत्तपिंडमंजरिविडिंसयधरा सुयवरहिणमयणसालकोइलकोहंगकभिंगारक-
 कोंडलकजीवंजीवकणंदीमुहकविलपिंगलक्खकारंडचक्कवायकलहंससारसअणेगसउणगणमिहुणविरइयसददुण्णइयमहुरसरणाइए सुरम्मे
 संपिंडियदरियभमरमहुकरिपहकरपरिलिन्तमत्तच्छप्पयकुसुमासवलोलमहुरगुमगुमंतगुंजंतदेसभागे अब्भंतरपुष्पफले बाहिरपत्तोच्छणे पत्तेहि
 य पुप्फेहि य उच्छण्णपडिच्छण्णे (साउफले नीरोयए अकंटए णाणाविहगुच्छगुम्भमंडवगरम्मसोहिए पा०) विचित्तसुहकेउभूए
 (सेउकेउबहुले पा०) वावीपुक्खरिणीदीहियासु य सुनिवेसियरम्मजालहरए पिंडिमणीहारिमसुगंधिसुहसुरभिमणहरं च महया गंधद्धणिं
 मुयंता णाणाविहगुच्छगुम्भमंडवकधरकसुहसेउकेउबहुला अणेगरहजाणजुग्गसिबियपविमोयणा सुरम्मा पासादीया दरिसणिज्जा

अभिरूवा पडिरूवा ।३। तस्स णं वणसंडस्स बहुमज्झदेसभाए एत्थ णं महं एक्के असोगवरपायवे (दूरोवगयकंदमूलवट्टलड्ड-
 संठियसुसिलिद्धघणमसिणणिद्धसुजायनिरुवह उव्विद्धपवरखंधी पा०) अणेगनरपवरभुयागेज्जो कुसुमभरसमोनमंतपत्तलविसालसालो
 महुकरिभमरगणगुमगुमाइय निलिंतउडिंडतसस्सिरीए णाणासउणगणमिहुणसुमहुरकण्णसुहपलत्तसद्धमहुरे पा०) पण्णत्ते,
 कुसविकुसविसुद्धरुक्खमूले मूलमंते कंदमंते जाव पविमोयणे सुरम्मे पासादीए दरिसणिज्जे अभिरूवे पडिरूवे, से णं असोगवरपायवे
 अण्णेहिं बहूहिं तिलएहिं लउएहिं छत्तोवेहिं सिरीसेहिं सत्तवण्णेहिं दविण्णेहिं लोद्धेहिं धवेहिं चंदणेहिं अज्जुणेहिं णीवेहिं कुडएहिं
 सव्वेहिं फणसेहिं दाडिमेहिं सालेहिं तालेहिं तमालेहिं पियएहिं पियंगूहिं पुरोवगेहिं रायरुक्खेहिं णंदिरुक्खेहिं सव्वओ समंता
 संपरिक्खत्ते, ते णं तिलया लउया जाव णंदिरुक्खा कुसविकुसविसुद्धरुक्खमूला मूलमंतो कंदमंतो एएसिं वण्णओ भाणियव्वो
 जाव सिबियपविमोयणा सुरम्मा पासादीया दरिसणिज्जा अभिरूवा पडिरूवा, ते णं तिलया जाव णंदिरुक्खा अण्णेहिं बहूहिं
 पउमलयाहिं णागलयाहिं असोअमयाहिं चंपगलयाहिं चूयलयाहिं वणलयाहिं वासंतियलयाहिं अडमुत्तलयाहिं कुंदलयाहिं सामलयाहिं
 सव्वओ समंता संपरिक्खत्ता, ताओ णं पउमलयाओ णिच्चं कुसुमियाओ जाव वडिंसयधरीओ पासादीयाओ दरिसणिज्जाओ
 अभिरूवाओ पडिरूवाओ (तस्स णं असोगवरपायवस्स उवरि बहवे अट्टअट्टमंगलगा पं० तं०-सोवत्थिय सिरिवच्छ नंदियावत्त
 वद्धमाणग भद्दासण कलस मच्छ दप्पणा सव्वरयणामया अच्छा सण्हा मण्हा घट्ठा मट्ठा नीरया निम्मला निप्पंका निक्कं कडच्छाया

॥ औपपातिकमुपांगं ॥

४

पू. सागरजी म. संशोधित

सप्पहा समिरीया सउज्जोया पासादीया०, तस्स णं असोगवरपायवस्स उवरिं बहवे किण्हचामरज्झया नीलचामरज्झया रुप्पपट्टा
 वड्डरामयदंडा जलयामलगंधिया सुरम्मा पासादीया०, तस्स णं असोगवरपायवस्स उवरिं बहवे छत्ताइच्छत्ता पडागाइपडाया घण्टा
 जुयला उप्पलहत्थगा पउमहत्थगा कुमुयहत्थगा कुसुमहत्थगा नलिणहत्थगा सुभगहत्थगा सोगंधियहत्थगा पुंडरीयहत्थगा महापुंडरीयहत्थया
 सयपत्तहत्थया सहस्सपत्तहत्थया सव्वरयणामया अच्छा जाव पडिरूवा पा०) तस्स णं असोगवरपायवस्स हेट्ठा ईसिखंधसमल्लीणे
 एत्थं णं महं एक्के पुढविसिलापट्टए पं० विक्खंभायामउस्सेहसुप्पमाणे किण्हे अंजणघणकिवाणकुवलयहलधरकोसेजाय-
 सीकेसकज्जलंगीखंजणसिंगभेदरिद्वयजंबूफलअसणसणबंधणणी लुप्पलपत्तनिकरअयसिकुसुमप्पगासे मरकतमसारकलित्तणयण-
 कीयरासिवण्णे णिद्धघणे अट्ठसिरे आयंसयतलोवमे सुरम्मे ईहामियउसभतुरगनरमगरविहगवालगकिण्णर रुरुसरभचमर-
 कुंजरवणलयपउमलयभत्तिचित्ते आईणगरूयबूरणवणीततूलफरिसे सीहासणसंठिए पासादीए दरिसणिज्जे अभिरूवे पडिरूवे १५।
 तत्थ णं चंपाए णयरीए कूणि णामं राया परिवसइ, महयाहिभवंतमहंतमलयमंदरमहिंदसारे अच्चंतविसुदधदीहरायकुलवंससुप्पसूए
 णिरंतरं रायलक्खणविराइअंगमंगे बहुजणबहुमाणे पूजिए सव्वगुणसभिद्धे खत्तिए मुइए मुब्बाहिसित्ते माउपिउसुजाए दयपत्ते सीमंकरे
 सीमंधरे खेमंकरे खेमंधरे मणुस्सिंदे जणवयपिया जणवयपाले जणवयपुरोहिए सेउकरे केउकरे णरपवरे पुरिसवरे पुरिससीहे पुरिसवग्घे
 पुरिसासीविसे पुरिसपुंडरीए पुरिसवरगंधहत्थी अइढे दित्ते वित्ते विच्छिण्णविउलभवणसयणासणजाण वाहणाइण्णे

॥ औपपातिकमुपांगं ॥

५

पू. सागरजी म. संशोधित

बहुधणबहुजायरुवरयते आओगपओगसंपउत्ते विच्छड्ढिअपरउरभत्तपाणे बहुदासीदासगोमहिसगवेलगप्पभूते पडिपुण्णजंत-
कोसकोट्टागाराउधागारे बलवं दुब्बलपच्चामित्ते ओहयकंटयं निहयकंटयं मलिअकंटयं उद्धियकंटयं अकंटयं ओहयसत्तुं निहयसत्तुं
मलियसत्तुं उद्धिअसत्तुं निज्जियसत्तुं पराइअसत्तुं ववगयदुब्धिक्खं मारिभयविप्पमुक्कं खेमं सिवं सुभिव्खं पसंतं (पसंताहिय पा!)
डिंबडमरं रज्जं पसासे (हे पा०) माणे विहरइ १६। तस्स णं कोणियस्स रण्णो धारिणी नामं देवी होत्था सुकुमालपाणिपाया
अहीणपडिपुण्णपंचिंदियसरीरा लक्खणवंजणगुणोववेआ माणुम्माणप्पमाणपडिपुण्णसुजायसव्वंगसुंदरंगी ससिसोमाकारकंतपियदंसणा
सुरूवा करयलपरिमिअपसत्थतिवलियमज्झा कुंडलुल्लिहिअ (पीण पा०) गंडलेहा कोमुइरयणियरविमलपडिपुण्णसोमवयणा सिंगारा
गारचारुवेसा संगयगयहसिअभणिअविहिअविलाससललिअसंलावणिउणजुत्तोवयारकुसला (प्र० सुंदरथणजघणवयणकर-
चरणनयणलावण्णविलासकलिया) पासादीआ दरिसणिज्जा अभिरूवा पडिरूवा कोणिएणं रण्णा भंभसारपुत्तेणं सद्धिं अणुरत्ता
अविरत्ता इट्ठे सदफरिसरसरूवगंधे पंचविहे माणुस्सए कामभोए पच्चणुभवमाणी विहरति १७। तस्स णं कोणिअस्स रण्णो एक्के पुरिसे
विउलकयवित्तिए भगवओ पवित्तिवाउए भगवओ तद्देवसिअं पवित्तिं णिवेएइ, तस्स णं पुरिसस्स बहवे अण्णे पुरिसा दिण्णभतिभत्तवेअणा
भगवओ पवित्तिवाउआ भगवओ तद्देवसियं पवित्तिं णिवेदेति १८। तेणं कालेणं० कोणिए राया भंभसारपुत्ते बाहिरियाए उवट्ठाणसालाए
अणेगगणनायगदंडनायगराईसर तलवरमाडंबिअकोडुंबिअमंतिमहामंतिगणगदोवारिअअमच्चचेडपीढमदनगर निगमसेट्ठिसेणावइ-

॥ औपपातिकमुपांगं ॥

६

पू. सागरजी म. संशोधित

सत्थवाहदूतसंधिवाल सद्धि संपरिवुडे विहरइ ११।तेणं कालेणं० समणे भगवं महावीरे आइगरे तित्थगरे सहसंबुद्धे पुरिसुत्तमे पुरिससीहे
 पुरिसवरपुंडरीए पुरिसवरगंधहत्थी अभयदए चक्खुदए मग्गदए सरणदए जीवदए दीवो ताणं सरणं गई पइइठा धम्मवरचाउरंतचक्कवट्टी
 अप्पडिहयवरनाणदंसणधरे विअट्टच्छउमे (अरहा पा०) जिणे (केवली पा०) जाणए तिण्णे तारए मुत्ते मोयए बुद्धे बोहए सव्वण्णू
 सव्वदरिसी सिवमयलमरुअमणंतमक्खयमव्वाबाहमपुणरावत्तिअं सिद्धिगइणामधेयं ठाणं संपाविउकामे अरहा जिणे केवली
 सत्तहत्थुस्सेहे समचउरंसंठाणसंठिए वज्जरिसहनारायसंधयणे अणुलोमवाउवेगे कंकग्गहणी कवोयपरिणामे सउणिपोसपिट्ठंतरोरुपरिणए
 पउमुप्पलगंधसरिसनिस्साससुरभिवयणे छवी निरायंकउत्तमपसत्थअइसेयनिरुवमपले (तले पा०) जल्लमल्लकलंकसेयरयदोसवज्जियसरीरे
 निरुवलेवे छायाउज्जोइअंगमंगे घणनिचियसुबद्धलक्खणुण्णयकूडागारनिभपिंडिअग्गसिरए (सामलिबोंडघणनिचियच्छोडियमिउविसय-
 पसत्थसुहुमलक्खणसुगंधसुंदर पा०) भुअमोअग्गभिंंगनेलकज्जलपहिट्ठभमरगणणिद्धनिकुरुंबनिचियकुंचियपयाहिणा वत्तमुद्धसिरए
 पा०) दालिमपुप्फप्पगासतवणिज्जसरिसनिम्मलसुणिद्धकेसंतकेसभूमी घण (निचिय) छत्तागारुत्तमंगदेसे णिव्वणसमलट्ठमट्ठ-
 चंदद्धसमणिडाले उडुवइपडिपुण्णसोमवयणे अल्लीणपमाणजुत्तसवणे सुस्सवणे पीणमंसलकवोलदेसभाए आणाभियचावरुइल-
 किण्हब्भराइ (संठियसंगयआययसुजाय पा०) तणुकसिणणिद्धभमुहे अवदालिअपुंडरीयणयणे कोआसिअधवलपत्तलच्छे
 गरुलायतउज्जुतुंगणासे उवचिअसिलप्पवालबिंबफलसण्णिभाहरोट्टे पंडुरससिसअलविमलणिम्मलसंखगोक्खीरफेणकुंददगरयमुणा-

॥ औपपातिकमुपांग ॥

७

पू. सागरजी म. संशोधित

लिआधवलदंतसेढी अखंडदंते अण्फुडिअदंते अविरलदंते सुणिद्धदंते सुजायदंते एगदंतसेढीविव अणेगदंते हुयवहणिधंतथोयतत्तवणिजर-
 त्तलतालुजीहे अवट्टियसुविभत्तचित्तमंसू मंसलसंठियपसत्थसददूलविउलहणूए चउरंगुलसुप्पमाणकं बुवरसरिसग्गीवे
 वरमहिसवराहसीहसददूलउसभनागवरपडि पुण्णविउलक्खंधे जुगसन्निभपीणरइपीवर पउट्टसुसंठियसुसिलिट्ठविसिट्ठघणाथिरसुबद्धसंधी
 (पकुट्टसंठियउवचि यधणाथिरसुसंबद्धसुनिगूढपव्वसंधी पा०) पुरवरफलिवट्टियभुए भुअईसरविउलभोगआदाणपलिहउच्छूढदीहबाहू
 रत्तलोवइयमउअमंसलसुजायलक्खणपसत्थअच्छिदजालपाणी पीवर (वट्टियसुजाय पा०) कोमलवरंगुली आयंबतंब-
 तलिणसुइरुइलणिदणक्खे चंदपाणिलेहे सूरपाणिलेहे संखपाणिलेहे चक्कपाणिलेहे दिसासोत्थिअपाणिलेहे चंदसूरसंखचक्कदिसासोत्थिअ-
 (विभत्तसुविरइय पा०) पाणिलेहे (अणेगवरलक्खणुत्तिमपसत्थसुइरइयपाणिलेहे पा०) कणगसिलातलुज्जलपसत्थसमतलउवचिय-
 विच्छिण्णापिहुलवच्छे सिरिवच्छं कियवच्छे (उवचियपुरवरकवाडविच्छिण्णापिहुलवच्छे, कणयसिलायलुज्जलपसत्थसमतल-
 सिरिवच्छरइयवच्छे पा०) अकरंडुअकणगरुययनिम्मलसुजायनिरुवहयदेहधारी अट्टसहस्सपडिपुण्णवरपुरिसलक्खणधरे सण्णयपासे
 संगयपासे सुंदरपासे सुजायपासे मियमाइअपीणरइअपासे अज्जुअसमसहियजच्चतणुकसिणाणिद्धआइज्जलडहरमणिज्जरोमराई
 झसविहगसुजायपीणकुच्छी झसोदरेसुइकरणे पउमविअडणाभे गंगावत्तकपयाहिणावत्ततरंगभंगुररविकिरणतरुणबोहिय-
 अकोसायंतपउमंगभीरवियडणाभे साहयसोणंदमुसलदप्पणिकरियवरकणगच्छरुसरिसवरवइरवलिअमज्जे पमुइयवरतुरगसीह (अइरेग

पा०) वरवट्टियकडी वरतुरगसुजायसु (पसत्थवरतुरग पा०) गुञ्जदेसे आइण्णहउव्व णिरुवलेवे वरवारणतुल्लविक्रमविलसियगई
 गयससणसुजायसन्निभोरू समुग्गणिमग्गगूढजाणू एणीकुरुविंदावत्तवट्टाणुवुव्वजंधे संठियसुसिलिडुगूढगुप्फे सुप्पइड्डियकुम्भचारुचलणे
 अणुपुव्वसुसंहयं (यपीवरं पा०) गुलीए उण्णयतणुतंबणिद्धणक्खे रत्तुप्पलपत्तमउअसुकुमालकोमलतले अट्टसहस्सवरपुरिसलक्खणधरे
 (नगनगरमगरसागरचक्कंवरं कंमंगलंकियचलणे पा०) विसिद्धरुवे हुयवहनिदधूमजलियतडितडियतरुणरविकिरणसरिसतेए अणासवे
 अममे अकिंचणे छिन्नसोए निरुवलेवे ववगयपेमरागदोसमोहे निग्गंथस्स पवयणास्स देसए सत्थनायगे पइट्ठावए समणगपई
 समणगविंदपरिअट्टए चउत्तीसबुद्धवयणातिसेसपत्ते पणतीससच्चवयणातिसेसपत्ते आगासगाएणं चक्केणं आगासगाएणं छत्तेणं
 आगासियाहिं चामराहिं आगासफालिआमएणं सपायवीढेणं सीहासणेणं धम्मज्झएणं पुरओ पकढिज्जमाणेणं चउद्वसहिं समणसाहस्सीहिं
 छत्तीसाए अज्जि आसाहस्सीहिं सद्धिं संपरिवुडे पुव्वाणुपुव्विं चरमाणे गामाणुग्गामां दूइज्जमाणे सुहंसुहेणं विहरमाणे चंपाए णयरीए
 बहिया उवणगरग्गामं उवागए चंपं प नगरिं पुण्णभद्वं चेइयं समोसरिउकामे ११०१ तए णं से पवित्तिवाउए इमीसे कहाए लद्धे समणे
 हट्टुट्टचित्तमाणंदिए पीइमणे परमसोमणस्सिए हरिसवसविसप्पमाणहियए णहाए कयबलिकम्मे कयकोउअमंगलपायच्छित्ते सुद्धप्पावेसाइं
 मंगल्लाइं वत्थाइं पवरपरिहिए अप्पमहग्गंभरणालंकियसरीरे सआओ गिहाओ पडिण्णिक्वमइ त्ता चंपाए णयरीए मज्झंमज्झेणं जेणेव
 कोणियस्स रण्णो गिहे जेणेव बाहिरिया उवट्ठाणसाला जेणेव कूणिए राया भंभसारपुत्ते तेणेव उवागच्छइत्ता करयलपरिग्गहियं

सिरसावत्तं मत्थाए अंजलिं कटटु जएणं विजएणं वद्धावेइ ता एवं व०-जस्स णं देवाणुप्पिया दंसणं कंखंति जस्स णं देवाणुप्पिया दंसणं पीहंति जस्स णं देवाणुप्पिया दंसणं पत्थंति जस्स णं देवाणुप्पिया दंसणं अभिलसंति जस्स णं देवाणुप्पिया णामगोत्तस्स-विसवणयाए हट्टतुट्टजावहिया भवंति से णं समणे भगवं महावीरे पुव्वाणुपुव्वि चरमाणे गामाणुग्गामं दूइजमाणे चंपाए णयरीए उवणगरगामं उवागए चंपं णगरिं पुण्णभहं चेइअं समोसरिउकामे तं एअं णं देवाणुप्पियाणं पिअट्टयाए पिअं णिवेदेमि पिअं भे भवउ ॥११॥ तए णं से कूणिए राया भंभसारपुत्ते तस्स पवित्तिवाउअस्स अंतिए एयमट्टं सोच्चा णिसम्म हट्टतुट्टजावहियए विअसिअवरकमलणयणवयणे पअलिअवरकडगतुहियकेयूरमउहडकुंडलेहारद्धहारविरायंतरइयवच्चे पालंबपलंबमाणघोलंतभूसणधरे ससंभमं तुरियं चवलं नरिंदे सीहासणाउ अब्भुट्टेइ ता पायपीढाउ पच्चोरुहइ ता (वेरुलियवरिट्टिरिट्टिअंजणनिउणोवियमि-सिमिसिंतमणिरयणमंडियाओ पा०) पाउआओ ओमुअइत्ता अवहट्टु पंच रायककुहाइं तं०-खगं छत्तं उप्पेसं वाहणाओ वालवीअणं एक्कसाडियं उत्तरासंगं करेइ ता आयंते चोक्खे परमसुइभूए अंजलिमउलिअगहत्थे तित्थगराभिमुहे सत्तट्टपयाइं अणुगच्छति ता वामं जाणुं अंचेइ ता दाहिणं जाणुं धरणितलंसि साहट्टु तिक्खुत्तो मुद्दाणं धरणितलंसि निवेसेइ ता ईसिं पच्चुण्णमति ता कडगतुडियथंभिआओ भुआओ पडिसाहरति ता करयल जाव कट्टु एवं व०-णमोऽत्थु णं अरिहंताणं भगवंताणं आइगराणं तित्थगराणं सयंसंबुद्धाणं पुरिसुत्तमाणं पुरिससीहाणं पुरिसवरपुंडरीआणं पुरिसवरगंधहत्थीणं लोगुत्तमाणं लोगनाहाणं लोगहियाणं

॥ औपपातिकमुपांगं ॥

१०

पू. सागरजी म. संशोधित

लोगपईवाणं लोगपच्चोतगराणं अभयदयाणं चक्खुदयाणं मग्गदयाणं सरणदयाणं जीवदयाणं बोहिदयाणं धम्मादयाणं धम्मदेसयाणं
 धम्मनायगाणं धम्मसारहीणं धम्मवरच्चाउरंतचक्कवट्ठीणं दीवो ताणं सरणं गई पइट्ठा अप्पडिहयवरणाणदंसणधराणं विअट्ठच्छउमाणं
 जिणाणं जावयाणं तिण्णाणं तारयाणं बुद्धाणं बोहयाणं मुत्ताणं मोअगाणं सव्वनूणं सव्वदरिसीणं सिवमयलमरूअमणंतमक्खय-
 मव्वाबाहमपुणरावत्तिसिद्धिगइनामधेयं ठाणं संपत्ताणं, नमोऽत्थु णं समणस्स भगवओ महावीरस्स आदिगरस्स तित्थगरस्स जाव
 संपाविउकामस्स मम धम्मायरियस्स धम्मोवदेसगस्स, वंदामि णं भगवंतं तत्थ गयं इह गते पासउ मे (मं से) भगवं तत्थ गए इह
 गयन्तिकदट्ठु वंदति णमंसति ता सीहासणवरगए पुरत्थाभिमुहे निसीअइ ता तस्स पवित्तिवाउअस्स अट्ठुत्तरसयसहस्सं पीतिदाणं
 दलयति ता सक्कोरेति सम्माणेति ता एवं व०-जया णं देवाणुप्पिया! समणे भगवं महावीरे इहमागच्छेज्जा इह समोसरिज्जा इहेव
 चंपाए णयरीए बहिया पुण्णभदे चेइए अहापडिरूवं उग्गहं उग्गिण्हित्ता संजमेणं तवसा अप्पाणं भावेमाणे विहरेज्जा तया णं मम
 एअमदठं निवेदिज्जासित्तिकदट्ठु विसज्जिते ।१२। तए णं समणे भगवं महावीरे कल्लं पाउप्पभायाए रयणीए फुलुप्पलकमलकोमलुम्मिलितंमि
 आहा(अहय)पंडुरे पहाए रत्तासोगप्पगासकिंसुअसुअमुहगुंजब्बरागसरिसे कमलागरसंडबोहए उट्ठियम्मि सूरे सहस्सरस्सिमि दिणायरे
 तेयसा जलंतं जेणेव चंपा णयरी जेणेव पुण्णभदे चेइए तेणेव उवागच्छति ता अहापडिरूवं उग्गहं उग्गिण्हित्ता संजमेणं तवसा
 अप्पाणं भावेमाणे विहरति ।१३। तेणं कालेणं० समणस्स भगवओ महावीरस्स अंतेवासी बहवे समणा भगवंतो अप्पेगइया

उगपव्वइया भोगपव्वइया राइण्ण० णाय० कोरव्व० खत्तिअपव्वइआ भडा जोहा सेणावई पसत्थारो सेट्ठी इब्भा अण्णे य बहवे
 एवमाइणो उत्तमजातिकुलरूवविणयविण्णाणवण्णलावण्णविक्रमपहाणसोभगकंतिजुत्ता बहुधणधण्णाणिचयपरियालफिडिआ
 णरवइगुणाइरेगाइच्छिअभोगा सुहसंपललिआ किंपागफलोवमं च मुणिअ विसयसोक्खं जलबुब्बुअसमाणं जोव्वणं कुसग्गजलबिंदुचंचलं
 जीवियं च णाऊण अदधुवमिणं रयमिव पडग्गलगं संविधुणित्ताणं चइत्ता हिरण्णं जाव पव्वइआ अप्पेगइआ अद्धमासपरिआया
 अप्पेगइआ मासपरिआया एवं दुमास० तिमास० जाव एक्कारस० अप्पेगइआ वासपरिआया दुवास० तिवास० अप्पेगइआ
 अणेगवासपरिआया संजमेणं तवसा अप्पाणं भावेमाणा विहरंति ॥१४॥ तेणं कालेणं० समणस्स भगवओ महावीरस्स अंतेवासी
 बहवे निग्गंथा भगवंतो अप्पेगइआ आभिणिबोहियणाणी जाव केवलणाणी अप्पेगइआ मणबलिआ वयबलिआ कायबलिआ
 (नाणबलिया दंसणबलिया चरित्तबलिया पा०) अप्पेगइआ मणेणं सावाणुग्गहसमत्था अप्पेगइआ खेलोसहिपत्ता एवं जल्लोसहि०
 विण्णोसहि० आमोसहि० सव्वोसहि० अप्पेगइआ कोट्टबुद्धी एवं बीअबुद्धी पडबुद्धी अप्पेगइआ पयाणुसारी अप्पेगइआ संभिन्नसोआ
 अप्पेगइआ खीरासवा अप्पेगइआ महुआसवा अप्पेगइआ सप्पिआसवा अप्पेगइआ अक्खीणमहाणांसिआ एवं उज्जुमती अप्पेगइआ
 विउलमई विउव्वणिइिट्ठपत्ता चारणा विज्जाहरा आगासातिवाइओ अप्पेगइआ कणगावलिं तवोकम्मं पडिवण्णा एवं एक्कावलिं
 खुड्डागसीहनिक्कीलियं तवोकम्मं पडिवण्णा अप्पेगइया महालयं सीहनिक्कीलियं तवोकम्मं पडिवण्णा भदपडिमं महाभदपडिमं

॥ औपपातिकमुपांगं ॥

१२

पू. सागरजी म. संशोधित

सव्वोतभदपडिमं आयंबिलवद्धमाणं तवोकम्भं पडिवण्णा मासिअं भिक्खुपडिमं एवं दोमासिअं पडिमं तिमासिअं पडिमं जाव
 सत्तमासिअं भिक्खुपडिमं पडिवण्णा अप्पेगइया पढमं सत्तराइंदिअं भिक्खुपडिमं पडिवण्णा जाव तच्चं सत्तराइंदिअं भिक्खुपडिमं
 पडिवण्णा अहोराइंदिअं भिक्खुपडिमं पडिवण्णा इक्कराइंदिअं भिक्खुपडिमं पडिवण्णा सत्तसत्तमिअं भिक्खुपडिमं अट्ठट्ठमिअं
 भिक्खुपडिमं णवणवमिअं भिक्खुपडिमं दसदसमिअं भिक्खुपडिमं खुड्डिडयं मोअपडिमं पडिवण्णा महत्थियं मोअपडिमं पडिवण्णा
 जवमज्झं चंदपडिमं पडिवण्णा वड्ढमज्झं चंदपडिमं विवेगपडिमं विउस्सग्गपडिमं उवहाणपडिमं पडिसंलीणपडिमं पडिवण्णा संजमेणं
 तवसा अप्पाणं भावेमाणा विहरंति । १५ । तेणं कालेणं० समणस्स भगवओ महावीरस्स अंतेवासी बहवे थेरा भगवंतो जातिसंपण्णा
 कुलसंपण्णा बलसंपण्णा रूवसंपण्णा विणयसंपण्णा णाणसंपण्णा दंसणसंपण्णा चरित्तसंपण्णा लज्जासंपण्णा लाधवसंपण्णा
 ओअंसी तेअंसी वच्चंसी जसंसी जिअकोहा जियमाणा जिअमाया जिअलोभा जिअइंदिया जिअणिदा जिअपरीसहा
 जीविआसमरणभयविप्पमुक्का वयप्पहाणा गुणप्पहाणा करणप्पहाणा चरणप्पहाणा णिग्गहप्पहाणा निच्छयप्पहाणा अज्जवप्पहाणा
 मदवप्पहाणा लाधवप्पहाणा खंतिप्पहाणा मुत्तिप्पहाणा विज्जापहाणा मंतप्पहाणा वेअप्पहाणा बंभप्पहाणा नयप्पहाणा नियमप्पहाणा
 सच्चप्पहाणा सोअप्पहाणा चारूवण्णा लज्जा(जू)तवस्सी जिइंदिआ सोही अणियाणा अप्पुस्सुआ अबहिल्लेसा अप्पडिलेस्सा
 सुसामण्णरया दंता (बहूणं आयरिया बहूणं उवज्झाया बहूणं दीवा ताणं सरणं गई पइट्ठा पा०) इणमेव णिग्गंथं पावयणं पुरओ

॥ औपपातिकमुपांगं ॥

१३

पू. सागरजी म. संशोधित

काउं विहरंति, तेसिं णं भगवंताणं आयावाया(वाई पा०)वि विदिता भवंति परवाया (इणो पा०) विदिता भवंति आयावायं जमइत्ता नलवणमिव मत्तामातंगा अच्छिदपसिणवागरणा रयणकरंडगसमाणा कुत्तिआवणभूआ परवादियपमददणा दुवालसंगिणो (परवाईहिं अणोक्कंता अण्णउत्थिएहिं अणोद्धंसिज्जमाणा अप्पेगइया आयारधरा पा०) समत्तगणिपिडगधरा सव्वक्खरसणिणवाइणो सव्वभासाणुगाभिणो अजिणा जिणसंकासा जिणा इव अवितहं वागरमाणा संजमेणं तवसा अप्पाणं भावेमाणा विहरंति ॥६॥ तेणं कालेणं० समणस्स भगवओ महावीरस्स अंतेवासी बहवे अणगारा भगवंतो ईरिआसमिआ भासासमिआ एसणासमिआ आदाणभंडमत्तनिक्खेवणासमिआ उच्चारपासवणखेलसिंघाणजल्लपारिट्ठावणियासमिआ मणगुत्ता वयगुत्ता कायगुत्ता गुत्ता गुत्तिंदिया गुत्तबंभयारी अममा अकिंचणा (छिण्णगंथा पा०) अगंथा छिण्णसोआ निरुवलेवा कंसपातीव मुक्कतोआ संखइव निरंगणा जीवोविव अप्पडिहयगती जच्चकणगंपिव जातरूवा आदरिसफलगाविव पागडभावा कुम्भोइव गुत्तिंदिआ पुक्खरपत्तंव निरुवलेवा गगणमिव निरालंबणा अणिलोइव निरालया चंदइव सोमलेसा सूरइव दित्तेआ सागरोइव गंभीरा विहगइव सव्वओ विप्पमुक्का मंदरइव अप्पकंपा सारथसलिलंव सुद्धहिअया खगिगविसाणंव एगजाया भारंडपक्खीव अप्पमत्ता कुंजरोइव सोडिरा वसभोइव जायत्थामा सीहोइव दुद्धरिसा वसुंधराइव सव्वफासविसहा सुहुअहुआसणेइव तेअसा जलंता, नत्थि णं तेसिं णं भगवंताणं कत्थई पडिबंधे भवइ, से अ पडिबंधे चउव्विहे पं० तं०-दव्वओ खित्तओ कालओ भावओ, दव्वओ णं सचित्ताचित्तमीसिएसु दव्वेसु (तं०-अंडाएइ वा पोयएइ

॥ औपपातिकमुपांगं ॥

१४

पू. सागरजी म. संशोधित

वा उगगहिएइ वा वगगहिए वा जण्णं जण्णं दिसं इच्छंति तंणं तंणं दिसं सूइभूया लघुभूया अणप्पगंथा विहरन्ति पा०) खेत्तओ गामे वा णयरे वा रण्णे वा खेत्ते वा खले वा घरे वा अंगणे वा कालओ समए वा आवलियाए वा जाव अयणे वा अण्णतरे वा दीहकालसंजोगे भावओ कोहे वा माणे वा मायाए वा लोहे वा भए वा हासे वा० एवं तेसिं ण भवइ, ते णं भगवंतो वासावासवज्जं अट्ठ गिम्हेमंतिआणि मासाणि गामे एगराइआ णयरे पंचराइआ वासीचंदणसमाणकप्पा समलेट्ठुकंचणा समसुहदुक्खा इहलोगपरलोगअप्पडिबद्धा संसारणारगामी कम्मणिग्घायणट्ठाए अब्भुट्ठिआ विहरन्ति ॥१७॥ तेसिं णं भगवंताणं एतेणं विहारेणं विहरमाणानं इमे एआरूवे (जायामायावित्ती अदुत्तरं च णं पा०) अब्भितरबाहिए तवोवहाणे होत्था तं०-अब्भितरए छव्विहे बाहिएवि इव्विहे ॥१८॥ से किं तं बाहिए?, २ छव्विहे पं० तं०-अणसणे ऊणो(अवमो)अरिया भिक्खाअरिया रसपरिच्चाए कायकिलेसे पडिसंलीणया, से किं तं अणसणे ?, २ दुविहे पं० तं०-इत्तरिए अ आवकहिए अ. से किं तं इत्तरिए ?, २ अणेगविहे पं० तं०-चउत्थभत्ते छट्ठभत्ते अट्ठमभत्ते दसमभत्ते बारसभत्ते चउद्दसभत्ते सोलसभत्ते अट्ठमासिए भत्ते मासिए भत्ते दोमासिए भत्ते तेमासिए भत्ते चउमासिए भत्ते पंचमासिए भत्ते छम्मासिए भत्ते, से तं इत्तरिए, से किं तं आवकहिए ?, २ दुविहे पं० तं०-पाओवगमणे अ भत्तपच्चक्खाणे अ, से किं तं पाओवगमणे ?, २ दुविहे पं० तं०-वाघाइमे अ निव्वाघाइमे अ नियमा अप्पडिकम्मे, से तं पाओवगमणे, से किं तं भत्तपच्चक्खाणे ?, २ दुविहे पं० तं०-वाघाइमे अ निव्वाघाइमे अ णियमा सप्पडिकम्मे, से तं भत्तपच्चक्खाणे, से तं

॥ औपपातिकमुपांगं ॥

१५

पू. सागरजी म. संशोधित

अणसणे, से किं तं ओमोअरिआ ?, २ दुविहा पं० तं०-दव्वोमोअरिआ य भावोमोअरिआ य. से किं तं दव्वोमोअरिआ?. २ दुविहा पं० तं०-उवगरणदव्वोमोअरिआ य भत्तपाणादव्वोमोअरिआ य, से किं तं उवगरणदव्वोमोअरिआ ?, २ तिविहा पं० तं०-एगे वत्थे एगे पाए चियत्तोवकरणसातिज्जणया, से तं उवगणदव्वोमोअरिआ, से किं तं भत्तपाणदव्वो मोअरिआ ?, २ अणेगविहा पं० तं०-अट्ठकुक्कुडिअंडगप्पमाणमेत्ते कवले आहारमाणे अप्पाहारे दुवालसकुक्कुडिअंडगप्पमाणमेत्ते कवले आहारमाणे अवड्ढोमोअरिआ सोलकुक्कुडिअंडगप्पमाणमेत्ते कवले आहारमाणे दुभागपत्तोमोअरिआ चउव्वीसकुक्कुडिअंडगप्पमाणमेत्ते कवले आहारमाणे पत्तोमोअरिआ एक्कतीसकुक्कुडिअंडगप्पमाममेत्ते कवले आहारमाणे किंचूणोमोअरिआ बत्तीसकुक्कुडिअंडगप्पमाणमेत्ते कवले आहारमाणे पमाणपत्ता, एतो एगेणविधासेण ऊणयं आहारमाहारेमाणे समणे णिगंथे णो पकामरसभोईत्ति वत्तव्वं सिआ, से तं भत्तपाणादव्वोमोअरिआ, से तं दव्वोमोअरिआ, से किं तं भावोमोअरिआ ?, २ अणेगविहा पं० तं०-अप्पकोहे अप्पमाणे अप्पमाए अप्पलोहे अप्पसद्दे अप्पझंझे, से तं भावोमोअरिआ, से तं ओमोअरिआ, से किं तं भिक्खायरिया ?, अणेगविहा पं० तं०-दव्वाभिग्गहचरण खेत्ताभिग्गहचरण कालाभिग्गहचरण भावाभिग्गहचरण उक्खित्तचरण णिक्खित्तचरण उक्कित्तणिक्खित्तचरण णिक्खित्तउक्खित्तचरण वट्ठिज्जमाणचरण साहरिज्जमाणचरण उवणीअचरण अवणीअचरण उवणीअवणीअचरण अवणीअउवणीअचरण संसट्ठचरण असंसट्ठचरण तज्जातसंसट्ठचरण अणायचरण मोणचरण दिट्ठलाभिए अदिट्ठलाभिए पुट्ठलाभिए अपुट्ठलाभिए भिक्खालाभिए अभिक्खलाभिए अण्णगिलायए

॥ औपपातिकमुपांगं ॥

१६

पू. सागरजी म. संशोधित

ओवणिहिए परिमितपिंडवाइए सुब्देसणिए संखादत्तिए, से तं भिक्खायरिया, से किं तं रसपरिच्चाए ?, २ अणेगविहे पं० तं०-
 णिव्वि (य) तिए पणीअरसपरिच्चाए आयंबिलिए आयामसित्थभोई अरसाहारे विरसाहारे अंताहारे पंताहारे लूहा (तुच्छा पा०)हारे,
 से तं रसपरिच्चाए, से किं तं कायकिलेसे ?, २ अणेगविहे पं० तं०-ठाणट्ठितीए (ठाणाइए पा०) उक्कुडुआसणिए पडिमट्टाई वीरासणिए
 नेसज्जिए दंडायए लउडसाई (लगंडसाई पा०) आयावए अवाउडए अकंडूअए अणिदट्टहए (धुयकेसमंसुलोमा पा०)
 सव्वगायपरिकम्भविभूसविप्पमुक्के. से तं कायकिलेसे, से किं तं पडिसंलीणया? २ चउव्विहा पं० तं०-इंदिअपडिसंलीणया
 कसायपडिसंलीणया जोगपडिसंलीणया विवित्तसयणासणसेवणया, से किं तं इंदियपडिसंलीणया ?, २ पंचविहा पं० तं०-
 सोइंदियविसयपयारनिरोहो वा सोइंदियविसयपत्तेसु अत्थेसु रागदोसनिग्गहो वा चक्खिंदिय० विसयपयारनिरोहो वा चक्खिंदियविसयपत्तेसु
 अत्थेसु रागदोसनिग्गहो वा घाणिंदियविसयपयारनिरोहो वा घाणिंदियविसयपत्तेसु अत्थेसु रागदोसनिग्गहो वा जिब्भिंदियविसयपयारनिरोहो
 वा जिब्भिंदियविसयपत्तेसु अत्थेसु रागदोसनिग्गहो वा फासिंदियविसयपयारनिरोहो वा फासिंदियविसयपत्तेसु अत्थेसु रागदोसनिग्गहो
 वा, से तं इंदियपडिसंलीणया, से किं तं कसायपडिसंलीणया ?, २ चउव्विहा पं० तं०-कोहस्सुदयनिरोहो वा उदयपत्तस्स वा कोहस्स
 विफलीकरणं माणस्सुदयनिरोहो वा उदयपत्तस्स वा माणस्स विफलीकरणं मायाउदयणिरोहो वा उदयपत्ताए वा मायाए विफलीकरणं
 लोहस्सुदयणिरोहो वा उदयपत्तस्स वा लोहस्स विफलीकरणं, से तं कसायपडिसंलीणया, से किं तं जोगपडिसंलीणया ?, २ तिविहा

पं० तं०-मणजोगपडिसंलीणया वयजोगपडिसंलीणया कायजोगपडिसंलीणया, से किं तं मणजोगपडिसंलीणया ?, २ अकुसलमणणिरोहो वा कुसलमणउदीरणं वा, से तं मणजोगपडिसंलीणया, से किं तं वयजोगपडिसंलीणया ?, २ अकुसलवयणिरोहो वा कुसलवयउदीरणं वा, से तं वयजोगपडिसंलीणया, से किं तं कायजोगपडिसंलीणया ?, २ जण्णं सुसमाहिअपाणिपाए कुम्भोइव गुत्तिदिए सव्वगायपडिसंलीणे चिट्ठइ, से तं कायजोगपडिसंलीणया, से किं तं विवित्तसयणासणसेवणया ?, २ जं णं आरामेसु उज्जाणेसु देवकुलेसु सभासु पवासु पणियगिहेसु पणिअसालासु इत्थीपसुपंडगसंसत्तिविरहियासु वसहीसु फासुएसणिज्जपीठफलगसेजासंथारगं उवसंपज्जित्ताणं विहरइ, से तं पडिसंलीणया, से तं बाहिरए तवे १११ से किं तं अब्भितरए तवे ?, २ छव्विहे पं० तं०-पायच्छित्तं विणओ वेयावच्चं सज्झाओ झाणं विउस्सग्गो, से किं तं पायच्छित्ते ?, २ दसविहे पं० तं०-आलोअणारिहे पडिक्कमणारिहे तदुभयारिहे विवेगारिहे विउस्सग्गारिहे तवारिहे छेदारिहे मूलारिहे अणवट्ठप्पारिहे पारंचिआरिहे, से तं पायच्छित्ते, से किं तं विणए ?, २ सत्तविहे पं० तं०-णाणविणए दंसणविणए चरित्तविणए मणविणए वइविणए कायविणए लोगोवयारविणए, से किं तं णाणविणए ?, २ पंचविहे पं० तं०-आभिणिबोहियणाणविणए सुअ० ओहि० मणपज्जव० केवल०, से किं तं दंसणविणए?, २ दुविहे पं० तं०-सुस्सूसणाविणए अणच्चासायणाविणए, से किं तं सुस्सूसणाविणए ?, २ अणेगविहे पं० तं०-अब्भुट्ठाणेइ वा आसणाभिग्गहेइ वा आसणप्पदाणेइ वा सक्कोरेइ वा सम्माणेइ वा किइक्कम्भेइ वा अंजलिपग्गहेइ वा एतस्स अणुगच्छणया ठिअस्स पज्जुवासणया

॥ औपपातिकमुपांगं ॥

१८

पू. सागरजी म. संशोधित

गच्छंतस्स पडिसंसाहणया, से तं सुस्सूसायणाविणए, से किं तं अणच्चासायणाविणए ?, २ पणतालीसविहे पं० तं०-अरहताणं
 अणच्चासायणया अरहंतपण्णत्तस्स धम्मस्स अण० आयरियाणं अण० एवं उवज्झायाणं थेराणं कुलस्स गणस्स संघस्स किरिआणं
 संभोगिअस्स आभिणिबोहियणाणस्स सुअणाणस्स ओहिणाणस्स मणपज्जवणाणस्स केवलणाणस्स० एएसिं चेव भत्तिबहुमाणे
 एएसिं चेव वण्णसंजलणया, से तं अणच्चासायणाविणए, से किं तं चरित्तविणए ?, २ पंचविहे पं० तं०-समाइअचरित्तविणए
 छेओवट्टावणिअ० परिहारविसुद्ध० सुहुमसंपराय० अहक्खायचरित्तविणए, से तं चरित्तविणए, से किं तं मणविणए ?, २ दुविहे
 पं० तं०-पसत्थमणविणए अपसत्थमणविणए, से किं तं अपसत्थमणविणए ?, २ जे अ मणे सावज्जे सकिरिए सकक्कसे कडुए
 णिट्तुरे फरुसे अण्हयकरे छेयकरे भेयकरे परितावणकरे उद्वणकरे भूओवघाइए तहप्पगारं मणो णो पहारेज्जा, से तं
 अपसत्थमणोविणए, से किं तं पसत्थमणोविणए ?, २ तं चेव पसत्थं णेयव्वं, एवं चेव वइविणओऽवि एएहिं पएहिंचेव णेअव्वो,
 से तं वइविणए, से किं तं कायविणए ?, २ दुविहे पं० तं०-पसत्थकायविणए य अपसत्थकायविणए य, से किं तं
 अपसत्थकायविणए?, २ सत्तविहे पं० तं०-अणाउत्तं गमणे अणाउत्तं ठाणे अणाउत्तं निसीदणे आणउत्तं तुअट्टणे अणाउत्तं उल्लंघणे
 अणाउत्तं पलंघणे अणाउत्तं सव्विदियकायजोगजुंजणया, से तं अपसत्थकायविणए, से किं तं पसत्थकायविणए ?, २ एयं (तं)
 चेव पसत्थं भाणियव्वं, से तं पसत्थकायविणए, से तं कायविणए, से किं तं लोगवयारविणए ?, २ सत्तविहे पं० तं०-अब्भासवत्तियं

परच्छंदाणुवत्तियं कज्जेहं कयपडिकिरिया अत्तगवेसणया देसकालणुया सव्वट्ठेसु अपडिलोमया, से तं लोगोवयारविणए, से तं विणए, से किं तं वेआवच्चे ?, २ दसविहे पं० तं०-आयरियवेआवच्चे उवज्झाय० सेह० गिलाण० तवस्सि० थेर० साहम्मिअ० कुल० गण० संधवेआवच्चे, से तं वेआवच्चे, से किं तं सज्जाए ?, २ पंचविहे पं० तं०-वायणा पडिपुच्छणा परिअट्टणा अणुप्पेहा धम्मकहा, से तं सज्जाए, से किं तं झाणे ?, २ चउव्विहे पं० तं०-अट्टज्जाणे रुद्धज्जाणे धम्मज्जाणे सुक्कज्जाणे, अट्टज्जाणे चउव्विहे पं० तं०-अमणुण्णसंपओगसंपउत्ते तस्स विप्पओगसतिसमण्णागए यावि भवइ, मणुण्णसंपओगसंपउत्ते तस्स अविप्पओगस्सतिसमण्णागए आवि भवइ, आयंकसंपओगसंपउत्ते तस्स विप्पओगसतिसमण्णागए आवि भवइ, परिजुसियकामभोगसंपओगसंपउत्ते तस्स अविप्पओगसतिसमण्णागए आवि भवइ, अट्टस्स ण झाणस्स चत्तारि लक्खणा पं० तं०-कंदणया सोअणया तिप्पणया विलवणया, रुद्धज्जाणे चउव्विहे पं० तं०-हिंसाणुबंधी मोसाणुबंधी तेणाणुबंधी सारक्खणाणुबंधी, रुद्धस्स णं झाणस्स चत्तारि लक्खणा पं० तं०-उस्सणादोसे बहुदोसे अण्णाणदोसे आमरणंतदोसे, धम्मज्जाणे चउविहे चउप्पडोयारे पं० तं०-आणाविजए अवायविजए विवागविजए संठाणविजए, धम्मस्स णं झाणस्स चत्तारि लक्खणा पं० तं०-आणारुई णिसगगरुई उवएसरुई सुत्तरुई, धम्मस्स णं झाणस्स चत्तारि आलंबणा पं० तं०-वायणा पुच्छणा परिअट्टणा धम्मकहा धम्मस्स णं झाणस्स चत्तारि अणुप्पेहाओ पं० तं०-अणिच्चाणुप्पेहा असरणाणुपेहा एगत्ताणुपेहा संसाराणुपेहा, सुक्कज्जाणे चउव्विहे चउप्पडोआरे पं०

तं०-पुहुत्तवियक्के सविआरी एगत्तवियक्के अविआरी सुहुमकिरिए अप्पडिवाई समुच्छिन्नकिरिए अणियट्ठी, सुक्कस्स णं झाणस्स चत्तारि लक्खणा पं० तं०-विवेगे विउस्सगे अव्वहे असम्मोहे, सुक्कस्स णं झाणरस चत्तारि आलंबणा पं० तं०-खंती मुत्ती अज्जवे मददवे, सुक्कस्स णं झाणस्स चत्तारि अणुप्पेहाओ पं० तं०-अवायाणुप्पेहा असुभाणुप्पेहा अणंतवत्तिआणुप्पेहा विप्परिणामाणुप्पेहा, से तं झामे, से किं तं विउस्सगे ?, २ दुविहे पं० तं०-दव्वविउस्सगे य भावविउस्सगे अ, से किं तं दव्वविउस्सगे ?, २ चउव्विहे पं० तं०-सरीरविउस्सगे गणविउस्सगे उव्हिविउस्सगे भत्तपाणविउस्सगे, से तं दव्वविउस्सगे, से किं तं भावविउस्सगे ?, तिविहे पं० तं०-कसायविउस्सगे संसारविउस्सगे कम्मविउस्सगे, से किं तं कसायविउस्सगे?, २ चउव्विहे पं० तं०-कोहकसायविउस्सगे माण० माया० लोह०, से तं कसायविउस्सगे, से किं तं संसारविउस्सगे?, चउव्विहे पं० तं०-णेरइअसंसारविउस्सगे तिरिय० मणु० देव०, से तं संसारविउस्सगे, से किं तं कम्मविउस्सगे ?, २ अट्ठविहे पं० तं०-णाणावरणिज्जकम्मविउस्सगे दरिसणावरणिज्ज० वेअणीअ० मोहणीय० आऊअ० णाम० गोअक० अंतरायकम्मविउस्सगे, से तं कम्मविउस्सगे, से तं भावविउस्सगे ।२०। तेणं कालेणं० समणस्स भगवओ महावीरस्स बहवे अणगारा भगवंतो अप्पेगइआ आचारधरा जाव विवागसुअधारा (तत्थ तत्थ तहिं तहिं देसे देसे गच्छागच्छिं गुम्मागुम्भिं फड्डाफडिंड पा०) अप्पेगइआ वायंति अप्पेगइआ पडिपुच्छंति अप्पेगइया परियट्ठंति अप्पेगइया अणुप्पेहंति अप्पेगइआ अक्खेवणीओ विक्खेवणीओ संवेअणीओ णिव्वेअणीओ चउव्विहाओ कहाओ कहंति अप्पेगइया उड्डंजाणू

अहोसिरा झाणकोटोवगया संजमेणं तवसा अप्पाणं भावेमाणा विहरंति संसारभउव्विग्गा भीआ जम्भणजरमरणकरणगंभीरदुक्ख-
 पक्खुब्धिअपउरसलिलं संजोगविओगवीचीचिंतापसंगपसरिअवहबंधमहल्लविउलकल्लोलकलुणविलविअलोभकलकलंतबोलबहुलं
 अवमाणाफेणतिव्वखिसणपुलंपुलप्पभूअरोगवेअणपरिभविणिवायफरुसधरिसणा समावडिअकढिणकम्मपत्थरतरंगरंगंतनिच्चमच्चु-
 भयतोअपट्ठं कसायपायालसंकुलं भवसयसहस्सकलुसजलसंचयं पतिभयं अपरिमिअमहिच्छकलुसमतिवाउवेगउद्धुम्ममाणदगरयर-
 यंधआरवरफेणपउरआसापिवासधवलं मोहमहावत्तभोगभममाणगुप्पमाणुच्छलंतच्चोणियत्तपाणियपमायचंडबहुदुट्ठसावय-
 समाहउद्धायमाणपब्भारघोरकंदिमहारवरवंतभेरवरवं अण्णाणभमंतरमच्छपरिहत्थअणिहुतिंदियमहामगरतुरिअचरिअखो -
 खुब्भमाणनच्चंतचवलचंचलचलंतधुम्मंतजलसमूहं अरतिभयविसायसोगमिच्छत्तसेलसंकडं अणाइसंताणकम्मबंधण-
 किलेसचिक्खिल्लुसुदुत्तारं अमरनरतिरियनिरयगइगमणकुडिलपरिवत्तविउलवेलं चउरंतमहंतमणवदगं रुद्धं संसारसागरं भीमदरिसणिज्जं
 तरंति धिइधणिअनिप्पकंपेण तुरियचवलं संवरवेरगतुंगकूवयसुसंपउत्तेणं णाणसितविमलमूसिएणं सम्भत्तविसुद्धलंद्धणिज्जामएणं
 धीरा संजमपोएण सीलकलिआ पसत्थज्झाणतववायपणोल्लिअपहाविएणं उज्जमववसायगहियणिउज्जरणजयणउवओगणाणदंसण-
 विसुद्धवय (प्र० २) भंडभरिअसारा जिणवरववयणोवदिट्ठमगेणं अकुडिलेणं सिद्धिमहपट्ठणाभिमुहा समणवरसत्थवाहा
 सुसुइसुसंभाससुपण्हसासा, गामे एगरायं णगरे पंचरायं दूइज्जन्ता जिइंदिया णिब्भया गयभया सचित्ताचित्तभीसिएसु द्व्वेसु विरागयं

॥ औपपातिकमुपांगं ॥

२२

पू. सागरजी म. संशोधित

गया संजया विरया मुत्ता लहुआ णिरवकंखा साहु णिहुआ चरंति धम्मं ।२१। तेणं कालेणं० समणस्स भगवओ महावीरस्स बहवे
 असुरकुमारा देवा अंतिअं पाउब्भवित्था कालमहाणीलसरिसणीलगुलिअगवलअयसिकुसुमपगासा विअसिअसयवत्तमिव
 पत्तलनिम्मलईसिसितरत्ततंबणयणा गरुलायतउज्जुतुंगणासा उवचिअसिलप्पवालबिंबफलसणिभाहरोट्टा पंडुरससिसकलविमल-
 णिम्मलसंखगोक्खीरफेणदगरयमुणालियाधवलदंतसेढी हुयवहणिद्धंतधोयतत्ततवणिज्जरत्ततलतालुजीहा अंजणघणकसिणरुयगर-
 मणिज्जणिद्धकेसा वामेगकुंडलधरा अदचंदणाणुलित्तगत्ता ईसिसिलिंधपुप्फगासाइं सुहुमाइं असंकिलिट्ठाइं वत्थाइं पवरपरिहिया वयं
 च पढमं समतिक्कंता बित्तिअं च वयं असंपत्ता भदे जोव्वणे वट्टमाणा तलभंगयतुडिअपवरभूसणनिम्मलमणिरयणमंडिअभुआ
 दसमुद्दामंडिअग्गहत्था चूलामणिचिंधगया सुरूवा महिडिढआ सुरूवा महिडिढआ महज्जुतिआ महबला महायसा महासोक्खा
 महाणुभागाहारविराइतवच्छा कडगतुडिअर्थंभिअभुआ अंगयकुंडलमट्टगंडतलकण्णपीढधारी विचित्तवत्थाभरणा विचित्तमालामउलिमउडा
 कल्लाणकयपवरवत्थपरिहिया कल्लाणकयपवरमल्लाणुलेवणा भासुरबोंदी पलंबवणमालधारा दिव्वेणं वण्णेणं दिव्वेणं गंधेणं दिव्वेणं
 रूवेणं दिव्वेणं फासेणं दिव्वेणं संघाए(घयणे)णं दिव्वेणं संठाणेणं दिव्वाए इड्ढीए दिव्वाए जुत्तीए दिव्वाए पभाए दिव्वाए छायाए
 दिव्वाए अच्छीए दिव्वेणं तेएणं दिव्वाए लेसाए दस दिसाओ उज्जोवेमाणा पभासेमाणा समणस्स भगवओ महावीरस्स अंतिअं
 आगम्मागम्म समणं भगवं महावीरं तिक्खुत्तो आयहिणं पयाहिणं करेन्ति ता वंदंति णमंसंति ता णच्चासणे णाइदूरे सुस्सूसमाणा

॥ औपपातिकमुपांगं ॥

.२३

पू. सागरजी म. संशोधित

णमंसमाणा अभिमुहा विणएणं पंजलिउडा पज्जुवासंति ॥२२॥ तेणं कालेणं० समणस्स भगवओ महावीरस्स बहवे असुरिंदविज्जआ भवणवासी देवा अंतियं पाउब्भवित्था णागपइणो सुवण्णा विज्जू अग्गीआ दीवा उदही दिसाकुमारा य पवणा थणिआ य भवणवासी णागफडागरुलवयरपुण्णकलस (संकिण्णउप्फेस० पा०) सीहहयगयमगरमउडवद्धमाणिजुत्तविचित्तचिंधगया सुरुवा महिडिढया सेसं तं चेव जाव पज्जुवासंति ॥२३॥ तेणं कालेणं० समणस्स भगवओ महावीरस्स बहवे वाणमंतरा देवा अंतिमं पाउब्भवित्था पिसाया भूआ य जक्खरक्खसकिंनरकिंपुरिसभुअगवइणो अ महाकाया गंधव्वणिकाय (प्र०पइ) णाणा णिउणगंधव्वगीतरइणो अणपणिण अपणपणिणअइसिवादीअभूअवादीअकं दियमहाकं दिआ य कुहंड पयए य देवा चंचलचवलचित्तकीलणदवप्पिआ गंभीरहसिअभणीअपीअगीअणच्चणरई वणमालामेलमउडकुंडलसच्छंदविउव्विआहरणचारुविभूसणधरा सव्वोउयसुरभिकुसुमसुरहयपलंबसोभंतकंतविअसंतचित्तवणमालरइअवच्छा कामगमी कामरूवधारी णाणाविहवण्णारागवरवत्थचित्तचिल्लियणीयंसणा विविहदेसीणेवत्थगहिअवेसा पमुइअकंदप्पकलहकेलिकोलाहलप्पिआ हासबोलकेलिबहुला अणेगमणिरयणविविहणिजुत्तविचित्तचिंधगया सुरुवा महिडिढआ जाव पज्जुवासंति ॥२४॥ तेणं कालेणं० समणस्स भगवओ महावीरस्स जोइसिया देवा अंतिअं पाउब्भवित्था विहस्सतिचंदसूरसुक्कसणिच्चरा राहू धूमकेतू बुहा य अंगारका य तत्ततवणिज्जकणगवण्णा जे गहा जोइसंभिचारं चरंति केऊ अ गइरइआ अट्ठावीसविहा य णक्खत्तदेवगणा णाणासंठाणसंठियाओ पंचवण्णाओ ताराओ ठिअलेस्सा चारिणो

अ अविस्साममंडलगती पत्तेयं णामंकपागडियचिंधमउडा महिडिढया जाव पज्जुवासंति ॥२५॥ तेणं कालेणं० समणस्स भगवओ महावीरस्स वेमाणिया (सामाणियतायत्तीससहिया सलोगपालअग्गमहिसिपरिसाणिअअप्परक्खेहिं संपरिवुडा देवसहस्साणुजाया मग्गेहिं पयएहिं समणुगम्भंतसस्सिरीया देवसंघजयसद्दकयालोया तरुणादिवागरकरातिरेगप्पहेहिं मणिकणगरयणघडिय- जालुज्जलहेमजालपेरंतपरिगएहिं सपयरवरमुत्तदामलंबंतभूसणेहिं पचलियघंटावलिमहरसद्दवंसतंतीतलतालगीयवाइयरवेणं हट्टतुट्टमणसा सेसाविय कप्पवरविमाणाहिवा० इत्यादि पा०) देवा अंतिअं पाउब्भवित्था सोहम्मीसाणसणंकुमारमाहिंदबंभलंतकमहासुक्कसहस्साराणय- पाणयारणअच्चुयवई पहिड्डा देवा जिणदंसणुस्सुगागमणजणियहासा पालकपुप्फकसोमणससिरिवच्छणंदिआवत्तका- मगमपीईगममणोगमविमलसव्वओभहणामधिज्जेहिं विमाणेहिं ओइण्णा वंदका जिणिंदं भिगमहिसवराहछगलददुरहयगयवइ- भुअगखगिउसभंकविडिमपागडियचिंधमउडा पसिढिलवरमउडतिरीडधारी कुंडलउज्जोविआणणा मउडदित्तसिरयारत्ताभा पउमपम्हगोरा सेया सुभवण्णगंधफासा उत्तमविउव्विणो विविहवत्थगंधमल्लधरा महिडिढआ महज्जुतिआ जाव पंजलिउडा पज्जुवासंति ॥२६॥ तए णं चंपाए नयरीए सिंघाडगतिगचउक्कचच्चरचउम्मुहमहापहपहेसु महया जणसद्देइ वा जणवूहेइ वा (जणवाएइ वा जणुल्लावेइ वा पा०) जणबोलेइ वा जणकलकलेइ वा जणुम्मीति वा जणुक्कलियाइ वा जणसन्निवाएइ वा बहुजणो अण्णमण्णस्स एवमाइक्खइ एवं भासइ एवं पण्णवेइ एवं परूवेइ एवं खलु देवाणुप्पिया ! समणे भगवं महावीरे आदिगरे तित्थगरे सयंसंबुद्धे पुरिसुत्तमे जाव

संपाविउकामे पुव्वाणुपुव्वि चरमाणे गामाणुगामं दूइज्जमाणे इहमागए इह संपत्ते इह समोसढे इहेव चंपाए णयरीए बाहिं पुण्णभदे
 चेइए अहापडिरूवं उग्गहं उग्गिण्हत्ता संजमेणं तवसा अप्पाणं भावेमाणे विहरइ, तं महप्फलं खलु भो देवाणुप्पिया ! तहारूवाणं
 अरहंताणं भगवंताणं णामगोअस्सवि सवणताए, किमंग पुण अभिगमवंदणणमंसणपडिपुच्छणपज्जुवासणयाए?, एक्कस्सवि
 आयरियस्स धम्मिअस्स सुवयणस्स सवणताए ?, किमंग पुण विउलस्स अत्थस्स गहणयाए?, तं गच्छामो णं देवाणुप्पिया! समणं
 भगवं महावीरं वंदामो णमंसामो सक्करेमो सम्माणेमो कल्लाणं मंगलं देवयं चेइअं (विणएणं) पज्जुवासामो, एतं णे पेच्चभवे (इहभवे
 य पा०) हियाए सुहाए खमाए निस्सेअसाए आणुगामिअत्ताए भविस्सइत्तिकदट्टु बहवे उग्गा उग्गपुत्ता भोगा भोगपुत्ता एवं दुपडोआरेणं
 राइण्णा (इक्खागा नाया कोरव्वा पा०) खत्तिआ माहणा भडा जोहा पसत्थारो मल्लई लेच्छई लेच्छइपुत्ता अण्णे य बहवे
 राईसरतलवरमाडंबियकोडुंबिअइब्भसेट्टिसेणावइसत्थवाहपभितओ अप्पेगइआ वंदणवत्तिअं अप्पेगइआ पूअणवत्तिअं एवं सक्कारवत्तियं
 सम्माणवत्तियं दंसणवत्तियं कोऊहलवत्तियं अप्पेगइआ अट्टविणिच्छयहेउं अस्सुयाइं सुणेस्सामो सुयाइं निस्संकियाइं करिस्सामो
 अप्पेगइआ अट्टाइं हेऊइं कारणाइं वागरणाइं पुच्छिस्सामो अप्पेगइआ सव्वओ समंता मुंडे भवित्ता अगाराओ अणगारिअं पव्वइस्सामो
 अप्पे० पंचाणुवइयं सत्तसिक्खावइयं दुवालसविहं गिहिधम्मं पडिवज्जिस्सामो अप्पेगइआ जिणभत्तिरागेणं अप्पेगइआ जीअमेअंतिकदट्टु
 णहाया कयबलिकम्मा कयकोऊयमंगलपायच्छित्ता (पाउच्छोलणधोया पा०) सिरसाकंठेमालकडा आविद्धमणिसुवण्णा

कप्पियहारऽद्धहारतिसरयपालंबपलंबमाणकडिसुत्तयसुकसोहाभरणा पवरवत्थपरिहिया चंदणोलित्तगायसरीरा अप्पेगइआ हयगया एवं गयगया रहगया (जाणजुग्गजंपाणगिल्लिथिल्लि०पा०) सिबियागया संदमाणियागया अप्पेगइआ पायविहारचारिणो पुरिसवग्गुरापरिक्खित्ता (वग्गावग्गिं गुम्मागुम्भि पा०) महया उक्किट्टिसीहणायबोलकलकलरवेणं पक्खुब्भिअमहासमुदरवभूतंपिव- करेमाणा (पायदद्वरेणं भूमिं कंप्पेमाणा अंबरतलमिव फोडेमाणा एगदिसिं एगाभिमुहा पा०) चंपाए णयरीए मज्झंमज्झेणं णिग्गच्छंति ता जेणेव पुण्णभदे चेइए तेणेव उवागच्छंति ता समणस्स भगवओ महावीरस्स अदूरसामंते छत्ताईए तित्थयराइसेसे पासंति ता जाणवाहणाइं ठावइंति (विट्ठुब्भंति पा०) ता जाणवाहणेहिंतो पच्चोरुहंति ता जेणेव समणे भगवं महावीरे तेणेव उवागच्छंति ता समणं भगवं महावीरं तिक्खुत्तो आयहिणं पयाहिणं करेति ता वंदंति णमंसंति ता णच्यासण्णे णाइदूरे सुस्सूसमाणा णमंसमाणा अभिमुहा विणएणं पंजलिउडा पज्जुवासंति (जाणाइं मुयंति वाहणाइं विसज्जेति पुप्फतंबोलाइयं आउहमाइयं सच्चित्तालंकारं पाहणाओ य, एगसाडियं उत्तरासंगं, आयंता चोक्खा परमसुईभूया अभिगमेणं अभिगच्छंति, चक्खुप्फासे०, मणसा एगत्ति भावकरणेणं, सुसमाहिपसंतसाहरियपाणिपाया अंजलिमउलियहत्था, एवमेयं भंते! अवितहमेयं असंदिद्धमेयं इच्छियमेयं पडिच्छियमेयं इच्छियपडिच्छियमेयं सच्चे णं एसमट्ठे, माणसियाए तच्चित्ता तम्मणा तल्लेस्सा तयज्झवसिया तत्तिव्वज्झवसाणा तदप्पियकरणा तयट्ठोवउत्ता तब्भावणाभाविया एगमणा अणन्नमणा जिणवयणधम्माणुरागरत्तमणा वियसियवरकमलनयणवयणा, समोसरणाइं

॥ औपपातिकमुपांगं ॥

२७

पू. सागरजी म. संशोधित

गवेसह आगंतरेसु वा आरामागारेसु वा आएसणेसु वा आवसहेसु वा पणियगेहेसु वा पणियसालासु वा जाणगिहेसु जाणसालासु कोट्टागारेसु सुसाणेसु सुत्तागारेसु परिहिंडमाणे परिघोलेमाणे पा०) १२७। तए णं से पवित्तिवाउए इमीसे कहाए लद्धट्टे समाणे हट्टतुट्टे जाव हियए णहाए जाव अप्पमहग्घाभरणालंकिअसरीरे सयाओ गिहाओ पडिणिक्खमइ सयाओ गिहाओ पडिणिक्खमइत्ता चंपाणयरिं मज्झंमज्जेणं जेणेव बाहिरिया सव्वेव हेट्ठिल्ला वत्तव्वया जाव णिसीयइ ता तस्स पवित्तिवाउअस्स अद्धत्तेरससयसहस्साइं पीइदाणं दलयति ता सक्कारेइ सम्माणेइ ता पडिविसज्जेइ १२८। तए णं से कूणिए राया भंभसारपुत्ते बलवाउअं आमंतेइ ता एवं व०-खिप्पामेव भो देवाणुप्पिआ! आभिसेक्कं हत्थिरयणं पडिकप्पेहि, हयगयरहपवरजोहकलिअं च चाउरंगिणिं सेणं सण्णाहेहि, सुभद्दापमुहाण य देवीणं बाहिरियाए उवट्ठाणसालाए पाडिएक्कपाडिएक्काइं जत्ताभिमुहाइं जुत्ताइं (जुग्गाइं पा०) जाणाइं उवट्टवेह, चंपं णयरिं सत्थिभतरवाहिरिअं आसित्त (सम्मज्जिओवलित्तं सिंघाडगतिगचउक्कचच्चरचउम्मुहमहापहपहेसु पा०) सित्तसित्तसुरइयसम्मट्टदुरत्थंतरा-वणवीहियं मंचाइमंचकलिअं णाणाविहरागउच्छियज्झयपडागाइपडागमंडिअं लाउल्लोइयमहियं गोसीससरसरत्तचंदणजावगंधवट्ठिभूअं करेह कारवेह ता एअमाणत्तिअं पच्चप्पिणाहि निज्जाइस्सामि समणं भगवं महावीरं अभिवंदए १२९। तए णं से बलवाउए कूणिएणं रण्णा एवं वुत्ते समाणे हट्टतुट्टजावहिअए करयत्तपरिग्गहिअं सिरसावत्तं मत्थए अंजलिं कट्टट्ट एवं सामित्ति आणाए विणएणं वयणं पडिसुणेइ ता हत्थिवाउअं आमंतेइ ता एवं व०-खिप्पामेव भो देवाणुप्पिआ! कूणिअस्स रण्णो भंभसारपुत्तस्स आभिसेक्कं हत्थिरयणं

॥ औपपातिकमुपांगं ॥

२८

पू. सागरजी म. संशोधित

पडिकप्पेहि हयगयरहपवरजोहकलियं चाउरंगिणिं सेणं सण्णाहेहिता एअमाणत्तिअं पच्चप्पिणाहि, तए णं से हत्थिवाउए बलवाउअस्स
 एअमट्ठं सोच्चा आणाए विणएणं वयणं पडिसुणेइ ता छेआयरियउवएसमइविकप्पणाविकप्पेहिं सुणिउणेहिं उज्जलणेवत्थहत्थपरिवत्थिअं
 सुसज्जं वम्मि असण्णाद्धबद्धकवइयउप्पीलियकच्छवच्छगेवेयबद्धगलवरभूसणाविरायंतं अहियतेअजुत्तं (सल्लिअ पा०)
 वरकण्णपूरविराइअं पलंबउच्चूलमहुअर (विरइयवरकण्णपूरसल्लियपलंबावच्चूलचामरोक्कर पा०) कयंधयारं चित्तपरिच्छेअपच्छयं
 (सचावसर पा०) पहरणावरणभरिअजुद्धसज्जं सच्छत्तं सज्झयं सघटं सपडागं पंचामेलअपरिमंडिआभिरामं ओसारियजमलजुअलघटं
 विज्जुपिणद्धं व कालमेहं उप्पाइयपव्वयं व चंकमंतं (सक्खं पा०) मत्तं गुलगुलंतं (महामेघं व पा०) मणपवणजइण (सिग्घ पा०)
 वेगं भीमं संगामियाओज्जं आभिसेक्कं हत्थिरयणं पडिकप्पइ ता हयगयरहपवरजोहकलियं चाउरंगिणिं सेणं सण्णाहेइ ता जेणेव
 बलवाउए तेणेव उवागच्छइ ता एअमाणत्तिअं पच्चप्पिणइ, तए णं से बलवाउए जाणसालिअं सद्दावेइ ता एवं व०-खिप्पामेव
 भो देवाणुप्पिआ! सुभद्दापमुहाणं देवीणं बाहिरियाए उवट्ठाणसालाए पाडिएक्कपाडिएक्काइं जत्ताभिमुहाइं जुत्ताइं जाणाइं उवट्ठवेह
 ता एअमाणत्तिअं पच्चप्पिणाहि, तए णं से जाणसालिए बलवाउअस्स एअमट्ठं आणाए विणएणं वयणं पडिसुणेइ ता जेणेव जाणसाला
 तेणेव उवागच्छइ ता जाणाइं पच्चुवेक्खेइ ता जाणाइं संपमज्जेइ ता जाणाइं संवट्ठेइ ता जाणाइं णीणेइ ता जाणाणं दूसे पवीणेइ
 ता जाणाइं समलंकरेइ ता जाणाइं वरभंडकमंडियाइं करेति ता जेणेव वाहणसाला तेणेव उवागच्छइ ता वाहणाइं पच्चुवेक्खेइ

त्ता वाहणाइं संपमज्जइ ता वाहणाइं णीणेइ ता वाहणाइं अप्फालेइ ता दूसे पवीणेइ ता वाहणाइं समलंकरेइ ता वाहणाइं
 वरभंडकमंडियाइं करेइ ता वाहणाइं जाणाइं जोएइ ता पओदलट्ठिं पओअधरे अ संमं आडहइ ता वट्टमगं गाहेइ ता जेणेव बलवाउए
 तेणेव उवागच्छइ ता बलवाउअस्स एअमाणत्तिअं पच्चप्पिणइ, तए णं से बलवाउए णयरगुत्तिए आमंतेइ ता एवं व०-खिप्पामेव
 भो देवाणुप्पिया! चंपं णयरिं सब्भितरबाहिरियं आसित्त जाव कारवेत्ता एअमाणत्तिअं पच्चप्पिणाहि, तए णं से णयरगुत्तीए
 बलवाउअस्स एअमंठं आणाए विणएणं पडिसुणेइ ता चंपंणयरिं सब्भितरबाहिरियं आसित्त जाव कारवेत्ता जेणेव बलवाउए तेणेव
 उवागच्छइ ता एअमाणत्तिअं पच्चप्पिणइ, तए णं से बलवाउए कोणिअस्स रण्णो भंभसारपुत्तस्स आभिसेक्कं हत्थिरयणं पडिकप्पिअं
 पासइ हयगय जाव सण्णाहिअं पासइ सुभद्दापमुहाणं देवीणं पडिजाणाइं उवट्ठविआइं पासइ चंपं णयरिं सब्भितरजाव गंधवट्ठिभूअं
 कयं पासइ ता हट्ठतुट्ठचित्तमाणंदिए पीअमणे जाव हिअए जेणेव कूणिए राया भंभसारपुत्ते तेणेव उवागच्छइ ता करयलजाव एवं
 व०-कप्पिए णं देवाणुप्पियाणं आभिसिक्के हत्थिरयणे हयगयपवरजोहकलिआ य चाउरंगिणी सेणा सण्णाहिआ सुभद्दापमुहाणं
 च देवीणं बाहिरियाए अ उवट्ठाणसालाए पाडिएक्कपाडिएक्काइं जत्ताभिमुहाइं जुत्ताइं जाणाइं उवट्ठावियाइं चंपा णयरी सब्भितरबाहिरिया
 आसित्तजाव गंधवट्ठिभूआ कया तं निज्जंतु णं देवाणुप्पिया! समणं भगवं महावीरं अभिवंदआ ।३०। तए णं से कूणिए राया भंभसारपुत्ते
 बलवाउअस्स अंतिए एयमंठं सोच्चा णिसम्म हट्ठतुट्ठजावहिअए जेणेव अट्ठणसाला तेणेव उवागच्छइ ता अट्ठणसालं अणुपविसइ

त्ता अणेगवायामजोगवग्गणवामदणमल्लजुद्धकरणेहिं संते परिस्संते सयपागसहस्सपागेहिं सुगंधतेल्लमाइएहिं दप्पणिज्जेहिं मयणिज्जेहिं
 बिंहणिज्जेहिं सव्विदियगायपल्हायणिज्जेहिं अब्भंगेहिं अब्भंगिए समाणे तेल्लचम्मंसि पडिपुण्णपाणिपायसुकुमालकोमलतलेहिं पुरिसेहिं
 छेएहिं दक्खेहिं पत्तट्ठेहिं कुसलेहिं मेहावीहिं निउणसिप्पोवगाएहिं अब्भंगणपरिमदणुव्वलणकरणगुणणिम्माएहिं अट्ठिसुहाए मंससुहाए
 तयासुहाए रोमसुहाए चउव्विहाए संवाहणाए संवाहिए समाणे अवगयखेअपरिस्समे अट्ठणसालाउ पडिणिक्खमइ त्ता जेणेव मज्जणधरे
 तेणेव उवागच्छइ त्ता मज्जणधरं अणुपविसइ त्ता समुत्त(समन्त० पा०)जालाउलाभिरामे विचित्तमणिरयणकुट्टिमतले रमणिज्जे
 ण्हाणमंडवंसि णाणामणिरयणभत्तिचित्तंसि ण्हाणपीढंसि सुहणिसण्णे सुद्धोदएहिं गंधोदएहिं पुष्फोदएहिं सुहोदएहिं पुण्णे
 कल्लाणगपवरमज्जणविहीए मज्जिए तत्थ कोउअसएहिं बहुविहेहिं कल्लाणगपवरमज्जणावसाणे पम्हलसुकुमालगंधकासाइयलूहिअंगे
 सरससुरहिगोसीसचंदणाणुलित्तगत्ते अहयसुमहग्घदूसरयणसुसंवुए सुइमालावण्णगविलेवणे आविद्धमणिसुवण्णे कप्पियहारद्धहार-
 तिसरयपालंबपलंबमाणकडिसुत्तसुकयशोभे पिणद्धगेविज्जे अंगुलिज्जगललियगललियकयाभरणे वरकडगतुडियथंभिअभुए
 अहियरूवसस्सिरीए (मुद्दिआपिंगलंगुलिए कुंडल पा०)उज्जोविआणणे मउडदित्तसिए हारोत्थयसुकयरइयवच्छे पालंबपलंबमाणपड-
 सुकयउत्तरिज्जे णाणामणिकणगरयणविमलमहरिहणिउणोविअभिसिभिसंतविरइयसुसिलिट्ठविसिट्ठलट्ठआविद्धवीरवलए, किं बहुणा?,
 कप्परुक्खए चेव अलंकियविभूसिए णरवई सकोरंटमल्लदामेणं छत्तेणं धरिजमाणेणं (अब्भपडलपिंगलुज्जलेण अविरलसमसहिय-

चंदमंडलसमप्पभेणं मंगलसयभत्तिच्छेयविचित्तियखिंखणिमणिहेमजालविरइयपरिगयपेरंतकणगघंटियापयलियकिणिकिणित-
सुइसुहसुमहुरसद्दालसोहिणं सप्पयरवरभुत्तसमलंबंतभूसणेणं नरिंदवामप्पमाणरुंदपरिमंडलेणं सीयायववायवरिसविसदोसनासणेणं
तमरयमलबहलपडलधाडणप्पभाकरेणं उउसुहसिवच्छायसमणुबद्धेणं वेरुलियदंडसज्जिएणं वइरामयवत्थिनिउणाजोइय अट्टसहस्सवरकं-
चणसत्तागनिम्भिएणं सुनिम्मलरययसुच्छएणं निउणोवियमिसिमिसिंतमणिरयणसूरमंडलवित्तिमिरकरं निग्गयग्गपडिहयपुणरविपच्चायडंत-
चंचलभिरिइकवयं विणिम्भुयंतेणं सपडिदंडेणं धरिज्जमाणेणं आयवत्तेणं विरायंते पा०) चउचामरवालवीजियंगे (चउहि य ताहि
य) पवरगिरिकुहरविचरणसुमुइयनिरुवहयचमरपच्छिमसरीरसंजायसंगयाहिं अमलियसियकमलविमलुज्जलियरययगिरिसिहरविमल-
ससिकिरणसरिसकलधोयनिम्मलाहिं पवणाहयचवलललियतरंगहत्थनच्चंतवीइपसरियखीरोदगपवरसागरुप्पूरचंचलाहिं
माणससरपरिसरपरिचियावासविसयवेसाहिं कणगगिरिसिहरसंसियाहिं उवइयउप्पइयतुरियचवलजइणसिग्घवेयाहिं हंसवधूयाहिं चेव
कलिएणाणामणिकणगरयणविमलमहरिहतवणिज्जुज्जलविचित्तदंडाहिं चिल्लियाहिं नरवइसिरिसमुदयपगासणकरीहिं वरपट्टणुग्गयाहिं
समिद्धरायकुलसेवियाहिं कालागुरुपवरकुंदुरुक्कतुरुक्कवरवण्णवासगंधुदधुयाभिरामाहिं सललियाहिं उभओपासंभि उक्खिप्पमाणाहिं
चामराहिं सुहसीयलवायवीइयंगे पा०) मंगलजयसद्दकयालोए मज्जणघराओ पडिनिक्खमइ त्ता अणेगगणनायगदंडनायगराईसरत
लवरमाडंबियकोडुंबियइब्भसेट्टिसेणावइसत्थवाहदूअसंधिवाल सद्धि संपरिवुडे धवलमहामेहणिग्गएइव गहगणदिप्पंतरिक्खतारागणाण

॥ औपपातिकमुपांगं ॥

३२

पू. सागरजी म. संशोधित

मञ्जे ससिब्ब पिअदंसणे णरवई जेणेव बाहिरिआ उवट्ठाणसाला जेणेव आभिसेक्के हत्थिरयणे तेणेव उवागच्छइ ता अंजणगिरिकूडसण्णिभं
 गयवइं णरवई दुरूढे, तए णं तस्स कूणियस्स रण्णो भंभसारपुत्तस्स आभिसिक्कं हत्थिरयणं दुरूढस्स समाणस्स तप्पढमयाए इमे
 अट्ठमंगलया पुरओ अहाणुपुब्बीए संपट्ठिआ, तं०-सोवत्थियसिरिवच्छणंदिआवत्तवद्धमाणकभद्दासणकलसमच्छदप्पणा, तथाऽणंतरं
 च णं पुण्णकलसभिंणारं दिव्वा य छत्तपडागा सचामरा दंसणरइअआलोअदरिसणिज्जा वाउद्धयविजयवेजयंती उस्सिआ
 गगणतलमणुलिहंती पुरओ अहाणुपुब्बीए संपट्ठिआ, तथाऽणंतरं च णं वेरुलियभिसंतविमलदंडं पलंबकोरंटमल्लदामोवसोभियं
 चंदमंडलणिभं समूसिअविमलं आयवत्तपवरं सीहासणं वरमणिरयणपादपीढं सपाउआजोयसमाउत्तं बहु(दासीदास
 पा०)किंकरकम्मकरपुरिसपायत्तपरिक्खत्तं पुरओ अहाणुपुब्बीए संपट्ठियं, तथाऽणंतरं बहवे असिग्गाहा लट्ठिग्गाहा कुंतग्गाहा
 चावग्गाहा चामरग्गाहा पासग्गाहा पोत्थयग्गाहा फलकग्गाहा पीढग्गाहा वीणग्गाहा कूडग्गाहा हडप्फग्गाहा पुरओ अहाणुपुब्बीए
 संपट्ठिआ, तथाऽणंतरं बहवे डंडिणो मुंडिणो सिंहंडिणो जडिणो पिंछिणो हासकरा डमरकरा चाडुकरा वादकरा कंदप्पकरा दवकरा
 कोक्कुइआ किट्ठि(त्ति)करा वायंता गायंता हसंता णच्चंता भासंता सावेता रक्खंता (पविंता पा०) आलोअं च करेमाणा जय २
 सहं पउंजमाणा पुरओ अहाणुपुब्बीए संपट्ठिआ, (' असिलट्ठिकुंतचावचामरपासे य फलगपोत्थे य। वीणाकूडग्गाहे तत्तो य हडप्फग्गाहे
 य॥१॥ दंडी मुंडी सिंहंडी पिच्छी जडिणो य हासकिड्डा य। दवकारा चडुकारा कंदप्पिय कोक्कुइय गाहा॥२॥ गायंता वायंता नच्चंता

॥ औपपातिकमुपांगं ॥

३३

पू. सागरजी म. संशोधित

तह हसंत हासिंता । सावेता रावेता आलोयजयं पउंजंता ॥३॥ पा०) तथाऽणंतरं जच्चाणं तरमल्लिहायणाणं (वरमल्लिभासणाणं पा०)
 हरिमेलामउलमल्लियच्छाणं चंचुच्चियललिअपुलियचलचवलचंचलगईणं लंघणवगणधावणधोरणतिवईजइणसिक्खिअगईणं
 ललंतलामगललायवरभूसणाणं मुहभंडगउच्चूलगथासगअहिलाणचामरगणडपरिमंडियकडीणं किंकरवरतरुणपरिगगहिआणं अट्टसयं
 वरतुरगाणं पुरओ अहाणुपुव्वीए संपट्ठियं, तथाऽणंतरं च णं इसीदंताणं ईसीमत्ताणं ईसीतुंगाणं ईसीउच्छंगविसालधवलदंताणं
 कंचणकोसीपविट्ठदंताणं कंचणमणिरयणभूसियाणं वरपुरिसारोहग (सु पा०) संपउत्ताणं अट्टसयं गयाणं पुरओ अहाणुपुव्वीए
 संपट्ठियं, तथाऽणंतरं सच्छत्ताणं सज्झयाणं सघंटाणं सपडागाणं सतोरणवराणं सणंदिघोसाणं सखिखिणीजालपरिक्खित्ताणं
 हेमवयचित्तिणिसकणकणिजुत्तदारुआणं कालायससुकयणेभिजंतकम्माणं सुसिलिट्ठवत्त (सुसंविद्धचक्क पा०) मंडलधुराणं
 आइण्णवरतुरग सुसंपउत्ताणं कुसलनरच्छेअसारहिसुसंपगगहिआणं (हेमजालगवक्खजालखिखिणिघंटाजालपरिक्खित्ताणं पा०)
 बत्तीसतोणपरिमंडिआणं सकंकडवडेंसकाणं सचावसरपहरणावरणभरिअजुद्धसज्जाणं अट्टसयं रहाणं पुरओ अहाणुपुव्वीए संपट्ठियं
 तथाऽणंतरं च णं असिसत्तिकोंततोमरसूललउडभिंडिमालधणुपाणिसज्जं पायत्ताणीयं (सन्नद्धबद्धवम्मियकवइयाणं पा०) पुरओ
 अहाणुपुव्वीए संपट्ठिअं, तए णं से कूणिए राया हारोत्थयसुकयरइयवच्छे कुंडलउज्जोविआणणे मउडदित्तिसिए णरसीहे णरवई णरिदे
 णरवसहे मणुअरायवसभकप्पे अब्भहिअरायतेअलच्छीए दिप्पमाणे हत्थिक्खंधवरगाए सकोरंटमल्लदामेणं छत्तेणं धरिज्जमाणेणं

॥ औपपातिकमुपांगं ॥

३४

पू. सागरजी म. संशोधित

सेअवरचामराहिं उदधुव्वमाणीहिं २ वेसमणोचेव णरवई अमरवईसण्णिभाए इड्ढीए पहियकिन्ती हयगयरहपवरजोहकलियाए चाउरंगिणीए सेणाए समणुगम्ममाणमग्गे जेणेव पुण्णभदे चेइए तेणेव पहारित्थ गमणाए, तए णं तस्स कूणिअस्स रण्णो भंभसारपुत्तस्स पुरओ महंआसाआसधरा (वरा पा०) उभओ पासिं णागा णागधरा पिट्ठओ रहसंगेल्ली, तए णं से कूणिए राया भंभसारपुत्ते अब्भुगयभिंगारे पग्गहियतालियंटे उच्छियसेअच्छत्ते पवीइअवालवीयणीए सव्विड्ढीए सव्वजुत्तीए सव्वबलेणं सव्वसमुदएणं सव्वादरेणं सव्वविभूईए सव्वविभूसाए सव्वसभमेणं सव्वपुप्फगंधवासमल्लालंकारेणं (सव्वसंभमेणं पगईहिं नाय(ड) गेहिं तालायरेहिं सव्वोरोहेहिं सव्वपुप्फवत्थगन्धमल्लालंकारविभूसाए पा०) सव्वतुडिअसदसण्णिणाएणं महया इड्ढीए महया जुत्तीए महया बलेणं महया समुदएणं महया वरतुडिअजमगसमगप्पवाइएणं संखपणवपडहभेरिझल्लरिखरमुहिहुडुक्कमुरवमुअंगदुंदुभिणिग्घोसणाइयरवेणं चंपाए णयरीए मज्झंमज्झेणं णिग्गच्छइ ॥३१॥ तए णं कूणि अस्स रण्णो चंपानगरिं मज्झंमज्झेणं णिग्गच्छमाणस्स बहवे अत्थत्थिया कामत्थिया भोगत्थिया किब्बिसिआ करोडिआ लाभत्थिया कारवाहिया संखिआ चक्किया णंगलिया मुहमंगलिआ वद्धमाणा पुस्समाणवा खंडियगणा ताहिं इट्ठाहिं कंताहिं पिआहिं मणुण्णाहिं मणामाहिं मणोभिरामाहिं हिययगमणिज्जाहिं (मणोभिरामाहिं उरालाहिं कल्लाणाहिं सिवाहिं धण्णाहिं मंगल्लाहिं सस्सिरीयाहिं हिययगमणिज्जाहिं हिययपल्हायणिज्जाहिं मियमदुरगंभीरगाहिगाहिं अट्टसइयाहिं अपुणरुत्ताहिं पा०) जयविजयमंगलसएहिं अणवरयं अभिणंदंता य अभिथुणंता य एवं व०-जय २ णंदा ! जय २

॥ औपपातिकमुपांगं ॥

३५

पू. सागरजी म. संशोधित

भद्रा ! भद्रं ते अजियं जिणाहि जिअं च पालेहि जिअमज्झे वसाहि इंदोइव देवाणं चमरोइव असुराणं धरणोइव नागाणं चंदोइव ताराणं भरहोइव मणुआणं बहूइं वासाइं बहूइं वाससआइं बहूइं वाससय(वास)सहस्साइं अणहसमगो हट्टतुट्टो परमाउं पालयाहि इट्टजणसंपरिवुडो चंपाए णयरीए अण्णेसिं च बहूणं गागागरणयरखेडकब्बडमडंबदोणमुहपट्टणआसमनिगमसंवाहसंनिवेसाणं आहेवच्चं पोरेवच्चं साभित्तं भट्टित्तं महत्तरगत्तं आणाईसरसेणावच्चं कारेमाणे पालेमाणे महयाऽऽहयणट्टगीयवाइयतंतीतलतालतुडिय-
 धणमुअंगपडुप्पवाइअरवेणं विउलाइं भोगभोगाइं भुंजमाणे विहराहित्तिकट्टु जय २ सदं पउंजंति, तए णं से कूणिए राया भंभसारपुत्ते णयणमालासहस्सेहिं पेच्छिज्जमाणे २ हिअयमालासहस्सेहिं अभिणंदिज्जमाणे २ (उन्नइज्जमाणे पा०) मणोरहमालासहस्सेहिं विच्छिप्पमाणे २ वयणमालासहस्सेहिं अभिथुव्वमाणे २ कंतिसोहग्गुणेहिं पत्थिज्जमाणे २ बहूणं णरणारीसहस्साणं दाहिणहत्थेणं अंजलिमालासहस्साइं पडिच्छमाणे २ मंजुमंजुणा घोसेणं पडिबुज्झमाणे २ भवणपंतिसहस्साइं समइच्छमाणे २ (तंतीतलतालतुडियगीयवाइयरवेणं महुरेणं जयसददुग्घोसवि (मी) सएणं मंजुमंजुणा घोसेणं अपडिबुज्झमाणे पा०) चंपाए णयरीए मज्झंमज्जेणं णिग्गच्छइ ता जेणेव पुण्णभदे चेइए तेणेव उवागच्छइ ता समणस्स भगवओ महावीरस्स अदूरसामंते छत्ताईए तित्थराइसेसे पासइ ता आभिसेक्कं हत्थिरयणं ठवेइ ता आभिसेक्काओ हत्थिरयणाओ पच्चोरुहइ ता अवहट्टु पंच रायककुहाइं, तं०-खग्गं छत्तं उप्पेसं वाहणाओ वालवीअणं, जेणेव समणे भगवं महावीरे तेणेव उवागच्छइ ता समणं भगवं महावीरं पंचविहेणं अभिगमेणं

॥ औपपातिकमुपांग ॥

३६

पू. सागरजी म. संशोधित

अभिगच्छति तं०-सच्चित्ताणं दब्बाणं विउसरण्याए अचित्ताणं दब्बाणं अविउसरण्याए एगसाडियउत्तरासंगकरणेणं चक्खुप्फासे अंजलिपग्गहेणं (चक्खुप्फासे हत्थिक्खंघविट्ठंभण्याए पा०) मणसो एगत्तीभावकरणेणं समणं भगवं महावीरं तिक्खुत्तो आयाहिणपयाहिणं करेइ त्ता वंदति णमंसति त्ता तिविहाए पज्जुवासणाए पज्जुवासइ तं०-काइयाए वाइयाए माणसियाए, काइयाए ताव संकुलइअग्गहत्थपाए सुस्सूसमाणे णमंसमाणे अभिमुहे विणएणं पंजलिउडे पज्जुवासइ वाइयाए जं जं भगवं वागरेइ एवमेअं भंते! तहमेयं भंते! अवितहमेयं भंते! असंदिद्धमेअं भंते! इच्छिअमेअं भंते! पडिच्छिअमेअं भंते! इच्छियपडिच्छियमेअं भंते! से जहेयं तुब्भे वदह अपडिकूलमाणे पज्जुवासति माणसियाए महया संवेगं जणइत्ता तिव्वधम्माणुरागरत्तो पज्जुवासइ १३२। तए णं ताओ सुभद्दापमुहाओ देवीओ अंतो अंतेउरंसि णहायाओ जाव पायच्छित्ताओ सव्वालंकारविभूसियाओ बहूहिं खुज्जाहिं चिलायाहिं वामणीहिं वडभीहिं बब्बरीहिं पयाउसियाहिं जोणिआहिं पणहविआहिं इसिगिणिआहिं वासिइणिआहिं लासियाहिं लउसियाहिं सिंहलीहिं दमिलीहिं आरबीहिं पुलंदीहिं पक्कणीहिं बहलीहिं मुरुंडीहिं सबरियाहिं पारसीहिं णाणादेसी (प्र०हि य) विदेसपरिमंडिआहिं इंगियचिंतियपत्थिय(मणोगतपा०)विजाणियाहिं सदेसणेवत्थगहियवेसाहिं चेडियाचक्कवालवरिसधरकंचुइज्जमहत्तरगवंदपरिक्खित्ताओ अंतेउराओ णिग्गच्छंति त्ता जेणेव पाडिएक्कपाडिएक्काइं जाणाइं तेणेव उवागच्छन्ति त्ता पाडिएक्कपाडिएक्काइं जत्ताभिमुहाइं जुत्ताइं जाणाइं दुरुहंति त्ता णिअगपरिआल सद्धिं संपरिवुडाओ चंपाए णयरीए मज्झंमज्जेणं णिग्गच्छंति त्ता जेणेव पुण्णभदे चेइए तेणेव

॥ औषपातिकमुपांगं ॥

३७

पू. सागरजी म. संशोधित

उवागच्छंति ता समणस्स भगवओ महावीरस्स अदूरसामंते छत्तादिए तित्थयरातिसेसे पासंति ता पाडिएक्कपाडिएक्काइं जाणाइं ठवंति ता जाणेहिंतो पच्चोरुहंति ता बहूहिं खुज्जाहिं जाव परिक्खित्ताओ जेणेव समणे भगवं महावीरे तेणेव उवागच्छंति ता समणं भगवं महावीरं पंचविहेणं अभिगमेणं अभिगच्छंति तं०-सच्चित्ताणं दब्बाणं विउसरणयाए अचित्ताणं दब्बाणं अविउसरणयाए विणओणताए गायलट्ठीए चक्खुप्फासे अंजलिपग्गहेणं मणसो एगत्तभावकरणेणं समणं भगवं महावीरं तिक्खुत्तो आयाहिणं पयाहिणं करेन्ति ता वंदंति णमंसंति ता कूणियरायं पुरओ कट्टु ठिइयाओ चेव सपरिवाराओ अभिमुहाओ विणएणं पंजलिउडाओ पज्जुवासंति ।३३। तए णं समणे भगवं महावीरे कूणिअस्स भंभसारपुत्तस्स सुभद्दाप्पमुहाणं देवीणं तीसे अ महतिमहालियाए परिसाए इसीपरिसाए मुणिपरिसाए जइपरिसाए देवपरिसाए अणेगसयाए अणेगसयवंदाए अणेगसयवंदपरिवाराए ओहबले अइबले महब्बले अपरिमिअबलवीरियतेयमाहप्पकंतिजुत्ते सारयनवत्थणियमहुरगंभीरकोंचणिंघोसदुंदुभिस्सरे उरेवित्थडाए कंठेऽवट्ठियाए सिरे समाइण्णाए अगरलाए अमम्मणाए सव्वक्खरसणिणवाइयाए पुण्णरत्ताए सव्वभासाणुगाभिणीए सरस्सईए (फुडविसयमहुरगंभीरगाहियाए सव्वक्खरसणिणवाइयाए पा०) जोयणणीहारिणा सरेणं अद्धमागहाए भासाए भासति अरिहा धम्मं परिक्कहेइ तेसिं सव्वेसिं आरियमणारियाणं अगिलाए धम्ममाइक्खइ, साऽविय णं अद्धमागहा भासा तेसिं सव्वेसिं आरियमणारियाणं अप्पणो सभासाए परिणामेणं परिणमइ तं०-अत्थि लोए अत्थि अलोए एवं जीवा अजीवा बंधे मोक्खे पुण्णे पावे आसवे संवरे वेयणा णिज्जरा अरिहंता

॥ औपपातिकमुपांगं ॥

३८

पू. सागरजी म. संशोधित

चक्रवट्टी बलदेवा वासुदेवा नरका णेरइया तिरिक्खजोणिआ तिरिक्खजोणिणीओ माया पिया रिसओ देवा देवलोआ सिद्धी सिद्धा परिणिव्वाणं परिणिव्वुया अत्थि पाणाइवाए मुसावाए अदिण्णादाणे मेहुणे परिग्गहे अत्थि कोहे माणे माया लोभे जाव मिच्छादंसणसल्ले अत्थि पाणाइवायवेरमणे मुसावायवेरमणे अदिण्णादाणवेरमणे मेहुणवेरमणे परिग्गहवेरमणे जाव मिच्छादंसणसल्लविवेगे सव्वं अत्थिभावं अत्थित्ति वयति सव्वं णत्थिभावं णत्थित्ति वयति सुचिण्णा कम्मा सुचिण्णफला भवंति दुच्चिण्णा कम्मा दुच्चिण्णफला भवंति फुसइ पुण्णपावे पच्चायंति जीवा, सफले कल्लाणपावए धम्ममाइक्खइइणमेव णिगंग्थे पावयणे सच्चे अणुत्तरे केवल्लिए संसुद्धे पडिपुण्णे णेआउए सल्लकत्तणे सिद्धिमग्गे मुत्तिमग्गे णिव्वाणमग्गे णेज्जाणमग्गे अवितहमविसंधि सव्वदुक्खप्पहीणमग्गे इहट्ठिआ जीवा सिज्झंति बुज्झंति मुच्चंति परिणिव्वायंति सव्वदुक्खाणमंतं करंति, एगच्चा पुण एगे भयंतारो पुव्वकम्मावसेसेणं अण्णयरेसु देवलोएसु देवत्ताए उववत्तारो भवंति महइढीएसु जाव महासुक्खेसु दूरंगइएसु चिरट्ठिईएसु, ते णं तत्थ देवा भवंति महइढिया जाव चिरट्ठिईआ हारविराइयवच्छा जाव पभासमाणा कप्पोवगा गतिकल्लाणा आगमेसिभद्दा जाव पडिरूवा, तमाइक्खइ एवं खलु चउहिं ठाणेहिं जीवा णेरइअत्ताए कम्मं पकरंति ता णेरइएसु उववज्जंति तं०-महारंभयाए महापरिगहयाए पंचिंदियवहेणं कुणिमाहारेणं, एवं एएणं अभिलावेणं तिरिक्खजोणिएसु माइल्लयाए णिअडिल्लयाए अलिअवयणेणं उक्कंचणयाए वंचणयाए मणुस्सेसु पगतिभइयाए पगतिविणीतताए साणुक्कोसयाए अमच्छरियताए देवेसु सरागसंजमेणं संजमासंजमेणं अकामणिज्जराए बालतवोकम्भेणं तमाइक्खइ-

‘जह णरगा गम्भंति जे णरगा जा य वेयणा णरणे सारीरमाणसाइं दुक्खाइं तिरिक्खजोणीए ॥१॥ माणुस्सं च अणिच्चं
वाहिजराभरणवेयणापउरं। देवे अ देवलोए देविडिंढ देवसोक्खाइं ॥२॥ णरगं तिरिक्खजोणिं माणुसभावं च देवलोअं च। सिद्धे
अ सिद्धवसहिं छजीवणियं परिकहेइ ॥३॥ जह जीवा बज्झंती मुच्चंती जह य परिकिलिस्संति। जह दुक्खाणं अंतं करंति केई
अपडिबद्धा ॥४॥ अट्टदुह (णिय पा०) द्वियचित्ता जह जीवा दुक्खसागरमुर्विति। जह वेरग्गमुवगया कम्मसमुग्गं विहाडंति ॥५॥
(एवं खलु जीवा निस्सीला णिव्वया णिग्गुणा निम्मेरा णिप्पच्चक्खाणपोसहोववासा अक्कोहा णिक्कोहा छीणकोहा अणुपुव्वेणं
पा०) जहा रागेण कडाणं कम्माणं पावगो फलविवागो जह य परिहीणकम्मा सिद्धा सिद्धालयमुर्विति, तमेव धम्मं दुविहं आइक्खइ,
तं०-अगारधम्मं अणगारधम्मं च, अणगारधम्मो ताव इह खलु सव्वओ सव्वत्ताए मुंडे भवित्ता आगारातो अणगारियं पव्वयइ सव्वओ
पाणाइवायाओ वेरमणं मुसावाय० अदिण्णादाण० मेहुण० परिग्गह० राईभोयणाउ वेरमणं, अयमाउसो! अणगारसामइए धम्मे पं०,
एअस्स धम्मस्स सिक्खाए उवट्ठिए निगंथे वा निगंथी वा विहरमाणे आणाए आराहए भवति, अगारधम्मं दुवालसविहं आइक्खइ,
तं०-पंच अणुव्वयाइं तिण्णि गुणव्वयाइं चत्तारि सिक्खावयाइं, पंच अणुव्वयाइं, तं०-थूलाओ पाणाइवायाओ वेरमणं थूलाओ
मुसावायाओ० थूलाओ अदिन्नादाणाओ० सदारसंतोसे इच्छापंरिमाणे तिण्णि गुणव्वयाइं तं०-अणत्थदंडवेरमणं दिसिक्खयं
उवभोगपरिभोगपरिमाणं, चत्तारि सिक्खावयाइं तं०-सामाइअं देसावगासियं पोसहोववासे अतिहिसंजयस्स विभागे, अपिच्छिमा

॥ औपपातिकमुपांगं ॥

४०

पू. सागरजी म. संशोधित

अकरणंतिआ संलेहणाजूसणाराहणा, अयमाउसो! अगारसामाडए धम्मं पं०, धम्मस्स सिक्खाए उवट्टिए समणोवासए समणोवासिआ
वा विहरमाणे आणाइ आराहए भवति।३॥ तए णं सा महतिमहालिया मणूसपरिसा समणस्स भगवओ महावीरस्स अंतिए धम्मं
सोच्या णिसम्म हट्टतुट्टजावहिया उट्टाए उट्टेति ता समणं भगवं महावीरं तिक्खुत्तो आयाहिणपयाहिणं करेइ ता वंदति णमंसति
त्ता अत्थेगइआ मुंडे भवित्ता आगाराओ अणगारियं पव्वइया, अत्थेगइआ पंचाणुव्वइयं सत्तसिक्खावइअं दुवालसविहं गिहिधम्मं
पडिवण्णा, अवसेसा णं परिसा समणं भगवं महावीरं वंदति णमंसति ता एवं व०-सुअक्खाए ते भंते! णिगंथे पावयणे एवं सुपण्णत्ते
सुभासिए सुविणीए सुभाविए अणुत्तरे ते भंते! णिगंथे पावयणे, धम्मं णं आइक्खमाणा तुब्भे उवसमं आइक्खह उवसमं आइक्खमाणा
विवेगं आइक्खह विवेगं आइक्खमाणा वेरमणं आइक्खह वेरमणं आइक्खमाणा अकरणं पावाणं कम्माणं आइक्खह, णत्थि णं
अण्णे केई समणे वा साहणे वा जे एरिसं धम्ममाइक्खत्तए किमंग पुण इत्तो उत्तरतरं?, एवं वदित्ता जामेव दिसं पाउब्भूआ तामेव
दिसं पडिगया ।३५। तए णं कूणिए राया भंभसारपुत्ते समणस्स भगवओ महावीरस्स अंतिए धम्मं सोच्या णिसम्म हट्टतुट्टजावहियाए
उट्टाए उट्टेइ ता समणं भगवं महावीरं तिक्खुत्तो आयाहिणपयाहिणं करेति ता वंदति णमंसति ता एवं व०-सुअक्खाए ते भंते!
णिगंथे पावयणे जाव किमंग पुण एत्तो उत्तरतरं?, एवं वदित्ता जामेव दिसं पाउब्भूए तामेव दिसं पडिगए ।३६। तए णं ताओ
सुभद्दापमुहाओ देवीओ समणस्स भगवओ महावीरस्स अंतिए धम्मं सोच्या णिसम्म हट्टतुट्टजावहियाओ उट्टाए उट्टेइ ता समणं

भगवं महावीरं तिक्खुत्तो आयाहिणं पयाहिणं करेन्ति ता वंदन्ति णमंसन्ति ता एवं व०-सुअक्खाए णं ते भन्ते! णिगंग्थे पावयणे जाव किमंग पुण इत्तो उत्तरतरं?, एवं वदित्ता जामेव दिसिं पाउब्भूआओ तामेव दिसिं पडिगयाओ, समोसरणं, समत्तं ।३७। तेणं कालेणं० समणस्स भगवओ महावीरस्स जेट्ठे अंतेवासी इंदभूर्इ नामं अणगारे गोयमसगोत्तेणं सत्तुस्सेहे समचउरंससंठाणसंठिए वड्रोसहनारायसंधयणे कणगपुलगनिधसपभ्गोरे उग्गतवे दित्ततवे तत्ततवे महातवे घोरतवे उराले घोरे घोरगुणे घोरतवस्सी घोरबंभचेखासी उच्छूढसरीरे संखित्तविउलतेअलेस्से समणस्स भगवओ महावीरस्स अदूरसामंते उड्ढंजाणू अहोसिरे झाणकोट्ठोवगाए संजमेणं तवसा अप्पाणं भावेमाणे विहरति, तए णं से भगवं गोअमे जायसड्ढे जायसंसए जायकोऊहल्ले उप्पण्णसड्ढे उप्पण्णसंसए उप्पण्णकोऊहल्ले संजायसड्ढे संजायसंसए संजायकोऊहल्ले समुप्पण्णसड्ढे समुप्पण्णसंसए समुप्पण्णकोऊहल्ले उट्ठाए उट्ठेइ ता जेणेव समणे भगवं महावीरे तेणेव उवागच्छति ता समणं भगवं महावीरं तिक्खुत्तो आयाहिणं पयाहिणं करेन्ति ता वंदन्ति णमंसन्ति ता णच्चासण्णे णाड्ढूरे सुस्सूसमाणे णमंसमाणे अभिमुहे विणएणं पंजलिउडे पज्जुवासमाणे एवं व०-जीवे णं भन्ते! असंजए अविरए अप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते पावकम्मं अण्हाति?, हंता अण्हाति, जीवे णं भन्ते! असंजयअविरयअप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते मोहणिज्जं पावकम्मं अण्हाति?, हंता अण्हाति, जीवे णं भन्ते! मोहणिज्जं कम्मं वेदेमाणे मोहणिज्जं कम्मं बंधइ वेअणिज्जं कम्मं बंधइ ?, गोअमा! मोहणिज्जं कम्मं

बंधइ वेअणिज्जंपि कम्मं बंधति, णण्णात्थ चरिममोहणिज्जं कम्मं वेदेमाणे वेअणिज्जं कम्मं बंधइ णो मोहणिज्जं कम्मं बंधइ ३, जीवे णं भंते ! असंजए अविरए अप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते ओसण्णतसपाणघाती कालमासे कालं किच्चा णेरइएसु उववज्जति?, हंता उववज्जति ४, जीवे णं भंते ! असंजए अविरए अपडिहयपच्चक्खायपावकम्मे इओ चुए पेच्चा देवे सिआ ?, गोअमा ! अत्थेगइए देवे सिया अत्थेगइए णो देवे सिया, से केणट्टेणं भंते ! एवं वु०-अत्थेगइए देवे सिआ अत्थेगइए णो देवे सिआ ?, गोयमा ! जे इमे जीवा गामागरणयरणिगमरायहाणिखेडकब्बडमडंबदोणमुहपट्टणा-समसंबाहसण्णिवेसेसु अकामतण्हाए अकामछुहाए अकामबंभचेरवासेणं अकामअण्हाणकसीयायवदंसमसगसेअजल्लमल्लपंकपरितावेणं अप्पतरो वा भुज्जतरो वा कालं अप्पाणं परिकिलेसंति ता कालमासे कालं किच्चा अण्णतरेसु वाणमंतरेसु देवलोएसु देवत्ताए उववत्तारो भवन्ति, तहिं तेसिं गती तहिं तेसिं ठिती तहितेसिं उववाए पं०, तेसिं णं भंते ! देवा परलोगस्साराहगा?, णो तिणट्टे समट्टे ५, से जे इमे गामागरणयरणिगमरायहाणिखेडकब्बडमडंबदोणमुहपट्टणामसमसंबाहसण्णिवेसेसु मणुआ भवन्ति, तं०-अंडुबद्धका णिअलबद्धका हडिबद्धका चारगबद्धका हत्थच्छिन्नका पायच्छिन्नका कण्णच्छिण्णका णक्कच्छिण्णका उट्टच्छिन्नका जिब्भच्छिन्नका सीसच्छिन्नका मुखच्छिन्नका मज्झच्छिन्नका वेकच्छिन्नका हियउप्पाडियगा णयणुप्पाडियगा दसणुप्पाडियगा वसणुपडियगा गीवच्छिण्णका तंडुलच्छिण्णका कागणिमंसक्खाइयया ओलंबिया लंबिया घंसिअया घोलिअया फाडिअया पीलिअया सूलाइअया

॥ औपपातिकमुपांगं ॥

४३

पू. सागरजी म. संशोधित

सूलभिण्णका खारवत्तिया वज्झवत्तिया सीहपुच्छियया दवगिगदडिढयगा पंकोसण्णका पंकेखुत्तका वलयमयका वसट्टमयका
 णियाणमयका अंतोसल्लमयका गिरिपडिअका तरुपडियका मरुपडियगा गिरिपक्खंदोलिया तरुपक्खंदोलिया मरुपक्खंदोलिया
 जलपवेसिका जलणपवेसिका विसभक्खितका सत्थोवाडितका वेहाणसिआ गिद्धपिड्डका कंतारमतका दुब्भक्खमतका
 असंकिल्हिट्ठपरिणामा ते कालमासे कालं णिच्चा अण्णतरेसु वाणमंतरेसु देवलोएसु देवत्ताए उववत्तारो भवन्ति, तहिंतेसिं गती तहिं
 तेसिं ठिती तहिंतेसिं उववाए पं०, तेसिं णं भंते! देवाणं केवडअं कालं ठिती पं०?, गोअमा! बारसवाससहस्साइं ठिती पं०, अत्थि
 णं भंते! तेसिं देवाणं इड्ढीइ वा जुईइ वा जसेति वा बलेति वा वीरिएइ वा पुरिसक्कारपरिकमेइ वा?, हंता अत्थि, ते णं भंते! देवा
 परलोगस्साराहगा ?, णो तिणट्टे० ६, से जे इमे गामागरणयरणिगमरायहाणिखेडकब्बडमडंबदोणमुहपट्टणासमसंबाहसंनिवेसेसु मणुआ
 भवन्ति तं०-पगइभद्दगा पगइउवसंता पगइपतणुकोहमाणमायालोहा मिउमहवसंपण्णा अल्लीणा भद्दगा विणीआ अम्मापिउसुस्सुसका
 अम्मापिऊणं अणत्तिक्कमणिज्वयणा अप्पिच्छा अप्पारंभा अप्पपरिग्गहा अप्पेणं आरंभेणं अप्पेणं समारंभेणं अप्पेणं आरंभसमारंभेणं
 वित्तिं कप्पेमाणा बहूइं वासाइं आउअं पालेति ता कालमासे कालं किच्चा अण्णतरेसु वाणमंतरेसु देवलोएसु देवत्ताए उववत्तारो
 भवन्ति, तहिं तेसिं गती तहिंतेसिं ठिती तहिं तेसिं उववाए पं०, तेसिं णं भंते! देवाणं केवडअं कालं ठिती पं०?, गोयमा !
 चउदसवाससहस्साइं ७, से जाओ इमाओ गामागरणयरणिगमरायहाणिखेडकब्बडमडंबदोणमुहपट्टणासमसंबाहसंनिवेसेसु इत्थियाओ

॥ औपपातिकमुपांगं ॥

४४

पू. सागरजी म. संशोधित

भवन्ति तं०-अंतो अंतेउरियाओ गयपड़आओ मयपड़आओ बालविहवाओ छडिडयतल्लिताओ माइरक्खिआओ पिअरक्खिआओ
 भायरक्खिआओ कुलघररक्खिआओ (मित्तनाइनियसंबंधिरक्खियाओ पा०) ससुरकुलरक्खिआओ परूढणहकेसकक्खरोमाओ
 ववगयपुप्फगंधमल्लालंकाराओ अण्हाणगसेअजल्लमलपंकपरिताविआओ ववगयखीरदहिणवणीअसप्पितेल्लगुललोणमहुमज्जमंस-
 परिचत्तकयाहारओ अप्पिच्छाओ अप्पारंभाओ अप्पपरिग्गहाओ अप्पेणं आरंभेणं अप्पेणं समारंभेणं अप्पेणं आरंभसमारंभेणं वित्ति
 कप्पेमाणीओ अकामबंभचेरवासेणं तमेव पड़सेजं णाइक्कमइ ताओ णं इत्थिआओ एयारूवेणं विहारेणं विहरंमाणीओ बहूइं वासाइं
 सेसंतं चेव जाव चउसट्ठिं वाससहस्साइं ठिई पं० ८, से जे इमे गामागरणयरणिगमरायहाणिखेडकब्बडमडंबदोणमुहपट्टणासमसंवाहसन्निवेसेसु
 मणुआ भवन्ति तं०-दगबिइया दगतइया दगसत्तमा दगएक्कारसमा गोअमा गोव्वइआ गिहिधम्मा धम्मचित्तका अविरुद्धविरुद्धवुड्ढ-
 सावकप्पभिअओ तेसिं मणुआणं णो कप्पइ इमाओ नव रसविगईओ आहारित्तए तं०-खीरं दहिं णवणीयं सप्पिं तेल्लं फाणियं महं
 मज्जं मंसं, णण्णत्थ एक्काए सरसवविगइए, ते णं मणुआ अप्पिच्छा तं चेव सव्वं णवरं चउरासीई वाससहस्साइं ठिई पं० ९, से
 जे इमे गंगाकूलगा वाणपत्था तावसा भवन्ति, तं०-होत्तिया पोत्तिया कोत्तिया जण्णई सड्ढई थालई हुंपउट्ठा दंतुक्खलिया उम्मज्जका
 सम्मज्जका निमज्जका संपक्खाला दक्खिणकूलका उत्तरकूलका संखधमका कूलधमका मिगलुद्धका हत्थितावसा उदंडका
 दिसापोक्खिणो वाकवासिणो अंबुवासिणो बिलवासिणो जलवासिणो (प्र० चेलवासिणो) वेलवासिणो रुक्खमूलिआ अंबुभक्खिणो

वाउभक्खिणो सेवालभक्खिणो मूलाहारा कंदाहारा तयाहारा पत्ताहारा पुप्फाहारा बीयाहारा परिसडियकंदमूलतयपत्तपुप्फफलाहारा जलाभिसेअकढिणगायभूया आयावणाहिं पंचगितावेहिं इंगालसोल्लियं कंडुसोल्लियं कंठसोल्लियंपिव अप्पाणं करे माणा बहूइं वासाइं परियायं पाउणंति ता कालमासे कालं किच्चा उक्कोसेणं जोइसिएसु देवेसु देवत्ताए उववत्तारो भवंति, पलिओवमं वाससयसहस्समब्भहिअं ठिई, आराहगा ?, णो इणट्ठे समट्ठे १०, से जे इमे जाव सन्निवेसेसु पव्वइया समणा भवंति, तं०-कंदप्पिया कुक्कुइया मोहरिया गीयरइप्पिया नच्चणसीला ते णं एएणं विहारेणं विहरमाणा बहूइं वासाइं सामण्णपरियायं पाउणंति ता तस्स ठाणस्स अणालोइअअप्पडिक्कंता कालमासे कालं किच्चा उक्कोसेणं सोहम्मे कप्पे कंदप्पिएसु देवेसु देवत्ताए उववत्तारो भवंति, तहिं तेसिं गती तहिं तेसिं ठिती सेसं तं चेव णवरं पलिओवमं वाससहस्समब्भहियं ठिती ११, से जे इमे जाव सन्निवेसेसु परिव्वायगा भवंति, तं०-संखा जोई कविला भिउच्चा हंसा परमहंसा बहुउदया कुडिव्वया कण्हपरिव्वायगा, तत्थ खलु इमे अट्ठ माहणपरिव्वायगा भवंति, तं०-‘कण्हे अ करंकंडे य, अंबडे य परासरे। कण्हे दीवायणे चेव, देवगुत्ते अ णारए ॥६॥ तत्थ खलु इमे अट्ठ खत्तियपरिव्वायया भवंति, तं०-’ ‘सीलई ससिहारे(य), णग्गई भग्गईतिअ। विदेहे रायराया य, रायारामे बलेति अ ॥७॥ ते णं परिव्वायगा रिउव्वेदजजुव्वेदसामवेयअहव्वणवय इतिहासपंचमाणं णिग्घट्ठच्छट्ठाणं संगोवंगाणं सहस्साणं चउण्हं वेयाणं सारगा पारगा धारगा वारगा सडंगवी सट्ठितंतविसारया संखाणे सिक्खाकप्पे वागरणे छंदे णिरुत्ते जोतिसामयणे अण्णेसु य बंभण्णएसु अ सत्थेसु (परिव्वायएसु य नएसु पा०) सुपरिणिट्ठिया

॥ औपपातिकमुपांगं ॥

४६

पू. सागरजी म. संशोधित

यावि हुत्था, ते णं परिव्वायगा दाणधम्मं च सोअधम्मं च तित्थाभिसेअं च आघवेमाणा पण्णवेमाणा परूवेमाणा विहरंति, जण्णं अम्हे किंचि असुई भवति तण्णं उदएण य मट्टियाए अ पक्खालिअं सुईभवति, एवं खलु अम्हे चोक्खा चोक्खायारा सुई सुइसमायारा भवेत्ता अभिसेअजलपूअप्पाणो अविग्घेण सग्गं गमिस्सामो, तेसिं णं परिव्वायगाणं णो कप्पइ अगडं वा तलायं वा णइं वा वाविं वा पुक्खरिणीं वा दीहियं वा गुंजालिअं वा सरं वा (प्र० सरसिं वा) सागरं वा ओगाहित्तए, णण्णत्थ अद्धाणगमणे, णो कप्पइ सगडं वा जाव संदमाणिअं वा दूरुहित्ताणं गच्छित्तए, तेसिं णं परिव्वायगाणं णो कप्पइ आसं वा हत्थि वा उट्टं वा गोणिं वा महिसं वा खरं वा दुरुहित्ताणं गमित्तए, तेसिं णं परिव्वायगाणं णो कप्पइ नडपेच्छाइ वा जाव मागहपेच्छाइ वा पिच्छित्तए, तेसिं परिव्वायगाणं णो कप्पइ हरिआणं लेसणया वा घट्टणया वा थंभणया वा (लूसणया वा पा०) उप्पाडणया वा करित्तए, तेसिं परिव्वायगाणं णो कप्पइ इत्थिकहाइ वा भत्तकहाइ वा देसकहाइ वा रायकहाइ वा चोरकहाइ वा अणत्थदंडं करित्तए, तेसिं णं परिव्वायगाणं णो कप्पइ अयपायाइं वा तउअपायाणि वा तंबपायाणि वा जसदपायाणि वा सीसगपायाणि वा रुप्पपायाणि वा सुवण्णपायाणि वा अण्णयराणि वा बहुमुल्लाणि धारित्तए णण्णत्थ लाउपाएण वा दारुपाएण वा मट्टिआपाएण वा, तेसिं णं परिव्वायगाणं णो कप्पइ अयबंधणाणि वा तउअबंधणाणि वा तंबबंधणाणि जाव बहुमुल्लाणि धारित्तए, तेसिं णं परिव्वायगाणं णो कप्पइ णाणाविहवण्णरागरत्ताइं वत्थाइं धारित्तए णण्णत्थ एक्काए धाउरत्ताए, तेसिं णं परिव्वायगाणं णो कप्पइ हारं वा अद्धहारं वा एक्कावलिं वा मुत्तावलिं वा

॥ औपपातिकमुपांगं ॥

४७

पू. सागरजी म. संशोधित

कणगावलिं वा रयणावलिं वा मुरविं वा कंठमुरविं वा पालंबं वा तिसरयं वा कडिसुत्तं वा दसमुद्दिआणंतकं वा कडयाणि वा तुडियाणि वा अंगयाणि वा केऊराणि वा कुंडलाणि वा मउडं वा चूलामणिं वा पिणद्धित्तए णण्णत्थ एक्केणं तंबिएणं पवित्तएणं, तेसिं णं परिव्वायगाणं णो कप्पड़ गंथिमवेढिमपूरिमसंधातिमे चउव्विहे मल्ले धारित्तए णण्णत्थ एगेणं कण्णपूरेणं, तेसिं णं परिव्वायगाणं णो कप्पड़ अगलुएण वाचंदणेण वा कुंकुमेण वा गायं अणुलिंपित्तए णण्णत्थ एक्काए गंगामट्टिआए, तेसिं णं कप्पड़ मागहए पत्थाए जलस्स पडिगाहित्तए सेऽविय वहमाणे णो चेव णं अवहमाणे सेऽविय थिमिओदए णो चेव णं कदमोदए सेऽविय बहुपसण्णे णो चेव णं अबहुपसण्णे सेऽविय परिपूए णो चेव णं अपरिपूए सेऽविय णं दिण्णे नो चेव णं अदिण्णे सेऽविय पिबित्तए णो चेव णं हत्थपायचरुचमसपक्खालणट्ठाए सिणाइत्तए वा, तेसिं णं परिव्वायगाणं कप्पड़ मागहए अब्बाढए जलस्स पडिगाहित्तए सेऽविय वहमाणे णो चेव णं अवहमाणे जाव णो चेव णं अदिण्णे, सेऽविय हत्थपायचरुचमसपक्खालणट्ठयाए णो चेव णं पिबित्तए सिणाइत्तए वा, ते णं परिव्वायगा एयारूवेणं विहारेणं विहरमाणा बहूइं वासाइं परियायं पाउणंति ता कालमासे कालं किच्चा उक्कोसेणं बंभलोए कप्पे देवत्ताए उववत्तारो भवंति तहिं तेसिं गई तहिं तेसिं ठिई दस सागरोवमाइं ठिई पं०, सेसं तं चेव १२।३८। तेणं कालेणं अम्मडस्स परिव्वायगस्स सत्त अंतेवासिसयाइं गिम्हकालसमयंसि जेड्डामूलमासंसि गंगाए महानईए उभओकूलेणं कंपिल्लपुराओ णयराओ पुरिमतालं णयरं संपट्टिया विहाराए, तए णं तेसिं परिव्वायगाणं तीसे अगाभियाए छिण्णोवायाए दीहमब्बाए अडवीए कंचि

॥ औपपातिकमुपांगं ॥

४८

पू. सागरजी म. संशोधित

देसंतरमणुपत्ताणं से पुव्वगहिए उदए अणुपुव्वेणं परिभुंजमाणे झीणे, तए णं ते परिव्वायया झीणोदगा समाणा तण्हाए पारब्भमाणा
 २ उदगदातारमपस्समाणा अण्णमण्णं सद्दावेति ता एवं व०-एवं खलु देवाणुप्पिया! अम्ह इमीसे अगाभियाए जाव अडवीए कंचि
 देसंतरमणुपत्ताणं से उदय जाव झीणे तं सेयं खलु देवाणुप्पिया! अम्ह इमीसे अगाभियाए जाव अडवीए उदगदातारस्स सव्वओ
 समंता मग्गणगवेसणं करित्तएत्तिकट्ठु अण्णमण्णस्स अंतिए एअमट्ठं पडिसुणंति ता तीसे अगाभियाए जाव अडवीए उदगदातारस्स
 सव्वओ समंता मग्गणगवेसणं करेन्ति ता उदगदातारभलभमाणा दोच्चांपि अण्णमण्णं सद्दावेन्ति ता एवं व०-इह णं देवाणुप्पिया!
 उदगदातारो णत्थि तं णो खलु कप्पइ अम्ह अदिण्णं गिण्हित्तए अदिण्णं सात्तिज्जित्तए तं मा णं अम्हे इयाणि आवइ कालंभिवि
 अदिण्णं गिण्हामो अदिण्णं सादिज्जामो मा णं अम्हं तवलोवे भविस्सइ, तं सेयं खलु अम्हं देवाणुप्पिया! तिदंडयं कुंडियाओ य
 कंचणियाओ य करोडियाओ य भिसियाओ य छण्णालए य अंकुसए य केसरियाओ य पवित्तए य गणेत्तियाओ य छत्तए य वाहणाओ
 य पाउयाओ य धाउरत्ताओ य एगंते एडित्ता गंगं महाणइं ओगाहित्ता वालुअसंथारए संथरित्ता संलेहणाझूसणाझोसियाणं
 भत्तपाणपडियाइक्खियाणं पाओवगयाणं कालं अणवकंखमाणाणं विहरित्तएत्तिकट्ठु अण्णमण्णस्स अंतिए एअमट्ठं पडिसुणंति
 ता तिदंडए य जाव एगंते एडेइ ता गंगं महाणइं ओगाहेति ता वालुआसंथारए संथरंति वालुयासंथारयं दुरुहंति ता पुरत्थाभिमुहा
 संपलियंकनिसन्ना करयलजावकट्ठु एवं व०-णमोऽत्थु णं अरहंताणं जाव संपत्ताणं, नमोऽत्थु णं समणस्स भगवओ महावीरस्स

॥ औपपातिकमुपांगं ॥

४९

पू. सागरजी म. संशोधित

जाव संपाविउकामस्स, नमोऽन्थु णं अम्मडस्स परिव्वायगस्स अम्हं धम्मायरियस्स धम्भोवदेसगस्स, पुव्वि णं अम्हे अम्मडस्स परिव्वायगस्स अंतिए थूलगपाणाइवावाए पच्चक्खाए जावज्जीवाए मुसावाए० अदिण्णादाणे पच्चक्खाए जावज्जीवाए सव्वे मेहुणे पच्चक्खाए जावज्जीवाए थूलए परिग्गहे पच्चक्खाए जावज्जीवाए इयाणिं अम्हे समणस्स भगवओ महावीरस्स अंतिए-सव्वं पाणावाइवायं पच्चक्खामो जावज्जीवाए एवं जाव सव्वं परिग्गहं पच्चक्खामो जावज्जीवाए सव्वं कोहं माणं मायं लोहं पेज्जं दोसं कलहं अब्भक्खाणं पेसुण्णं परपरिवायं अरइरइं मायामोसं मिच्छादंसणसल्लं अकरणिज्जं जोगं पच्चक्खामो जावज्जीवाए सव्वं असणं पाणं खाइमं साइमं चउव्विहंपि आहारं पच्चक्खामो जावज्जीवाए जंपिय इमं सरीरं इट्ठं कंतं पियं मणुण्णं मणामं थेज्जं (पेज्जं पा०) वेसासियं संमतं बहुमतं अणुमतं भंडकरंडगसमाणं मा णं सीयं मा णं उम्हं मा णं खुहा माणं पिवासा मा णं वाला मा णं चोरा मा णं दंसा मा णं मसगा मा णं वातियपित्तियसिंभियसंनिवाइयविविहा रोगातंका परीसहोवसग्गा फुसंतुत्तिकटट्टु एयंपि णं चरमेहिं ऊसासणी सासेहिं वोसिरामत्तिकटट्टु संलेहणाइसुसणाइसुसिया भत्तपाणपडियाइक्खिया पाओवगया कालं अणवकंखमाणा विहरंति, तए णं ते परिव्वायया बहूइं भत्ताइं अणसणाए छेदेन्ति ता आलोइअपडिक्कंता समाहिपत्ता कालमासे कालं किच्चा बंभलोए कण्णे देवत्ताए उववण्णा, तहिं तेसिं गई दससागरोवमाइं ठिई पं०, परलोगस्स आराहगा, सेसं तं चेव १३ ।३९। बहुजणे णं भंते ! अण्णमण्णस्स एवमाइक्खइ एवं भासइ एवं पण्णवेइ एवं परूवेइ एवं खलु अंब (अम्म) डे परिव्वायए कंपिल्लपुरे णयरे धरसते

॥ औपपातिकमुपांगं ॥

५०

पू. सागरजी म. संशोधित

आहारमाहरेइ घरसए वसहिं उवेइ से कहमेयं भंते! एवं?, गोयमा! जण्णं से बहुजणो अण्णमण्णस्स एवमाइक्खइ जाव एवं परूवेइ एवं खलु अम्मडे परिव्वायए कंपिल्लपुरे जाव घरसए वसहिं उवेइ सच्चे णं एसमट्ठे, अहंपि णं गोयमा! एवमाइक्खाभि जाव एवं परूवेमि एवं खलु अम्मडे परिव्वायए जाव वसहिं उवेइ, से केणट्ठेणं भंते! एवं वुच्चइ अम्मडे परिव्वायए जाव वसहिं उवेइ?. गोयमा! अम्मडस्स णं परिव्वायगस्स पगइभइयाए जाव विणीययाए छट्ठंछट्ठेणं अनिक्खित्तेणं तवोकम्पेणं उड्ढंबाहाओ पगिज्झिय २ सूरभिमुहस्स आतावणभूमीए आतावेमाणस्स सुभेणं परिणामेणं पसत्थाहिं-लेसाहिं विसुज्झमाणीहिं अन्नया कयाई तदावरणिज्जाणं कम्माणं खओवसमेणं ईहावूहामग्गणगवेसणं करेमाणस्स वीरियलब्धीए वेउव्वियलब्धीए ओहिणाणलब्धी समुप्पण्णा, तए णं से अम्मडे परिव्वायए ताए वीरियलब्धीए वेउव्वियलब्धीए ओहिणाणलब्धीए समुप्पण्णाए जणविम्हावणहेउं कंपिल्लपुरे घरसए जाव वसहिं उवेइ, से तेणट्ठेणं गोयमा! एवं वुच्चइ अम्मडे परिव्वायए कंपिल्लपुरे णयरे घरसए जाव वसहिं उवेइ, पहु णं भंते! अम्मडे परिव्वायए देवाणुप्पियाणं अंतिए मुंडे भवित्ता अगाराओ अणगारियं पव्वइत्तए?, णो इणट्ठे समट्ठे, गोयमा! अम्मडे णं परिव्वायए समणोवासए अभिगयजीवाजीवे जाव अप्पाणं भावेमाणे विहरइ णवरं ऊसियफलिहे अवंगुयदुवारे चियत्तंतेउरधरदारपवेसी (चियत्तधरंतेउरपवेसी पा०) ति ण वुच्चइ, अम्मडस्स णं परिव्वायगस्स थूलए पाणाइवाए पच्चक्खाए जावजीवाए जाव परिग्गहे णवरं सव्वे मेहुणे पच्चक्खाए जावजीवाए, अम्मडस्स णं णो कप्पइ अक्खसोत्तप्पमाणमेत्तंपि जलं सयराहं उत्तरित्तए णण्णत्थ अद्धाणगमणेणं,

अम्मडस्स णं णो कप्पड़ सगडं एवं चेव भाणियव्वं जाव णण्णत्थ एगाए गंगामट्टियाए, अम्मडस्स णं परिव्वायगस्स णो कप्पड़ आहाकम्मिए वा उद्देसिए वा मीसजाएइ वा अज्झोअरएइ वा पूइकम्मेइ वा कीयगडेइ पामिच्चेइ वा अणिसिट्ठेइ वा अभिहडेइ वा ठइत्तए वा रइत्तए वा कंतारभत्तेइ वा दुब्भिक्खभत्तेइ वा पाहुणगभत्तेइ वा गिलाणभत्तेइ वा वदलियाभत्तेइ वा भोत्तए वा पाइत्तए वा, अम्मडस्स णं परिव्वायगस्स णी कप्पड़ मूलभोयणे वा जाव बीयभोयणे वा भोत्तए वा पाइत्तए वा, अम्मडस्स णं परिव्वायगस्स चउव्विहे अणत्थदंडे पच्चक्खाए जावजीवाए तं०-अवज्झाणायरिए पमायायरिए हिंसप्पयाणे पावकम्मोवाएसे, अम्मडस्स कप्पड़ मागहए अद्धाढए जलस्स पडिग्गाहित्तए सेऽविय वहमाणए नो चेव णं अवहमाणए जाव सेऽविय परिपूए नो चेव णं अपरिपूए नो चेव णं अपरिपूए सेऽविय सावज्जेत्तिकाउं णो चेव णं अणवज्जे सेऽविय जीवा इतिकट्टु णो चेव णं अजीवा सेऽविय दिण्णे णो चेव णं अदिण्णे सेऽविय दंतहत्थपायचरुचमसपक्खालणट्टयाए पिबित्तए वा णो चेव णं सिणाइत्तए, अम्मडस्स कप्पड़ मागहए य आढए जलस्स पडिग्गाहित्तए सेऽविय वहमाणे जाव दिन्ने नो चेव णं अदिण्णे सेऽविय सिणाइत्तए णो चेव णं हत्थपायचरुचमसपक्खालणट्टाए पिबित्तए वा, अम्मडस्स णो कप्पड़ अन्नउत्थिया वा अण्णउत्थियदेवयाणि वा अण्णउत्थियपरिग्गाहियाणि वा चेइयाइं वंदित्तए वा णमंसित्तए वा जाव पज्जुवासित्तए वा णण्णत्थ अरिहंते वा अरिहंतचेइयाइं वा, अम्मडे णं भंते! परिव्वायए कालमासे कालं किच्चा कहिं गच्छिहिति कहिं उववज्जिहिति?, गोयमा! अम्मडे णं परिव्वायए उच्चावएहि

सीलव्वयगुणवेरमणपच्चक्खाणपोसहोववासेहिं अप्पाणं भावेमाणे बहूइंवासाइं समणोवासयपरियायं पाउणिहिति ता मासियाए संलहेणाए अप्पाणं झूसित्ता सट्ठि भत्ताइं अणसणाए छेदित्ता आलोइयपडिक्कंते समाहिपत्ते कालमासे कालं किच्चा बंभलोए कप्पे देवत्ताए उववज्जिहिति, तत्थ णं अत्थेगइयाणं देवाणं दस सागरोवमाइं ठिई पं०, तत्थ णं अम्मडम्सवि देवस्स दस सागरोवमाइं ठिई, से णं भंते! अम्मडे देवे ताओ देवलोगाओ आउक्खएणं भवक्खएणं तिइक्खएणं अणंतरं चयं चइत्ता कहिं गच्छिहिति कहिं उववज्जिहिति?, गोयमा! महाविदेहे वासे जाइं इमाइं कुलाइं भवंति तं०- अइढाइं दित्ताइं वित्ताइं विच्छिण्णविउल- भवणसयणासणजाणवाहणा (इण्णा) इं बहुधणजायरूवरययाइं आओगपओगसंपउत्ताइं विच्छिड्डियपउरभत्तपाणाइं बहुदासीदासगोमहिसगवेलगप्पभूयाइं बहुजणम्स अपरिभूयाइं तहप्पगारेसु कुलेसु पुमत्ताए पच्चायाहिति, तए णं तस्स दारगस्स गब्भत्थस्स चेव समाणस्स अम्मापिईणं धम्मे दढा पतिण्णा भविस्सइ से णं तत्थ णवण्हं मासाणं बहुपडिपुण्णाणं अब्बट्टमाए राइंदियाणं वीइक्कंताणं सुकुमालपाणिपाए जाव ससिसोमाकारे कंते पियदंसणे सुरूवे दारए पयाहिति, तए णं तस्स दारगस्स अम्मापियरो पढमे दिवसे तिइवडियं काहिति बिइयदिवसे चंदसूरदंसणियं काहिति छट्ठे दिवसे जागरियं काहिति एक्कारसमे दिवसे वीतिक्कंते णिव्वित्ते असुइजायकम्मकरणे संपत्ते बारसाहे दिवसे अम्मापियरो इमं एयारूवं गोण्णं गुणणिप्फण्णं णामधेज्जं काहिति-जम्हा णं अम्हे इमंसि दारगंसि गब्भत्थंसि चेव समाणंसि धम्मेदढा पइण्णा तं होउ णं अम्हं दारए दढपइण्णे णामेणं, तए णं तस्स दारगस्स अम्मापियरो

णामधेज्जं करेहिंति दढपइण्णेति, तं दढपइण्णं दारगं अम्मापियरो साइरेग ऽट्ठवासजातगं जाणित्ता सोभणंसि तिहिकरणणक्खत्तमुहुत्तंसि कलायरियस्स उवणेहिंति, तए णं से कलायरिए तं दढपइण्णं दारगं लेहाइयाओ गणियप्पहाणाओ सउणरुयपज्जवसाणाओ बावत्तरिं कलाओ सुत्ततो य अत्थतो य करणतो य सेहा विहिति सिक्खाविहिति, तं०-लेहं गणितं रुयं णट्ठं गीयं वाइयं सरगयं पुक्खरगयं समतालं जूयं जणवायं पासकं अट्ठावयं पोरेकच्चं दगमट्ठियं अण्णविहिं पाणविहिं वत्थविहिं १८ विलेवणविहिं सयणविहिं अज्जं पहेलियं मागहिअं गाहं गीइयं सिलोयं हिरण्णजुत्ती सुवण्णजुत्ती गंधजुत्ती चुण्णजुत्ती आभरणविहिं तरुणीपडिकम्भं इत्थिलक्खणं पुरिसलक्खणं हयलक्खणं गयलक्खणं ३६ गोणलक्खणं कुक्कुडलक्खणं चक्कलक्खणं छत्तलक्खणं चम्मलक्खणं दंडलक्खणं असिलक्खणं मणिलक्खणं काकणिलक्खणं वत्थुविज्जं खंधारमाणं नगरमाणं वत्थुनिवेसणं वूहं पडिवूहं चारं पडिचारं चक्कवूहं ५४ गरुलवूहं सगडवूहं जुद्धनिजुद्धं जुद्धातिजुद्धं मुट्ठिजुद्धं बाहुजुद्धं लयाजुद्धं इसत्थं छरुप्पवाहं धणुव्वेयं हिरण्णपागं (सुवण्णपागं) वट्टखेड्डं सुत्ताखेड्डं णालियाखेड्डं पत्तच्छेज्जं कडव(ग)च्छेज्जं सज्जीवं निज्जीवं सउणरुत्त ७२मिति बावत्तरिं कला सेहाविति० अम्मापिईणं उवणेहिंति, तए णं तस्स दढपइण्णस्स दारगस्स अम्मापियरो तं कलायरिअं विपुलेणं असणपाणखाइमसाइमेणं वत्थगंधमल्लालंकारेण य सक्कारेहिंति सम्माणेहिंति विपुलं जीवियारिहं पीइदाणं दलिस्सन्ति त्ता पडिविसज्जेहिंति, तए णं से दढपइण्णे दारए बावत्तरिकलापंडिए नवंगसुत्तपडिबोहिए अट्ठारसदेसीभासाविसारए गीयरतीगंधव्वणट्ठकुसले हयजोही गयजोही रहजोही

॥ औपपातिकमुपांगं ॥

५४

पू. सागरजी म. संशोधित

बाहुजोही बाहुप्पमद्दी विंयालचारी साहसिए अलंभोगसमत्थे आवि भविस्सइ, तए णं तं दढपइण्णं दारगं अम्मापियरो बावत्तरिकलापंडियं जाव अलंभोगसमत्थं वियाणित्ता विउलेहिं अण्णभोगेहिं पाणभोगेहिं लेणभोगेहिं वत्थभोगेहिं सयणभोगेहिं कामभोगेहिं उवणिमंतेहिंति, तए णं से दढपइण्णे दारए तेहिं विउलेहिं अण्णभोगेहिं जाव सयणभोगेहिं णो सज्जिहिति णो रज्जिहिति णो गिज्झिहिति णो अज्झोववज्जिहिति, से जहाणामए उप्पलेइ वा पउमेइ वा कुसुमेइ वा नलिणेइ वा सुभगेइ वा सुगंधेइ वा पोंडरीएइ वा महापोंडरीएइ वा सतपत्तेइ वा सहस्सपत्तेइ वा सतसहस्सपत्तेइ वा पंके जाए जले संवुडढे णोवलिप्पइ पंकरएणं णोवलिप्पइ जलरएणं एवमेव दढपइण्णेवि दारए कामेहिं जाए भोगेहिं संवुडढे णोवलिप्पिहिति कामरएणं णोवलिप्पिहिति भोगरएणं णोवलिप्पिहिति भित्तणाइणियगसयणसंबंधिपरिजणेणं से णं तहारूवाणं थेराणं अंतिए केवलं बोहिं बुज्झिहिति त्ता अगाराओ अणगारियं पव्वइहिति, से णं भविस्सइ अणगारे भगवंते ईरियासमिए जाव गुत्तबंभयारी, तस्स णं भगवंतस्स एतेणं विहारेणं विहरमाणस्स अणंते अणुत्तरे णिव्वाघाए निरावरणे कसिणे पडिपुण्णे केवलवरणाणदंसणे समुप्पज्जिहिति तए णं से दढपइण्णे केवली बहूइं वासाइं केवलिपरियागं पाउणिहिति त्ता मासियाए संलेहणाए अप्पाणं झूसित्ता सट्ठिं भत्ताइं अणसणाए छेएत्ता जस्सट्ठाए कीरइ णग्गभावे मुंडभावे अणहाणए अदंतवणाए केसलोए बंभवेरवासे अच्छत्तकं अणोवाहणकं भूमिसेज्जा फलहसेज्जा कट्ठसेज्जा परधरपवेसो लब्धावलब्धं परेहिं हीलणाओ खिंसणाओ णिंदणाओ गरहणाओ तालणाओ तज्जणाओ परिभवणाओ पव्वहणाओ उच्चावया गामकंटका बावीसं

परीसहोवसगा अहियासिज्जंति तमट्टमाराहिता चरिमेहिं उस्सासणिस्सासेहिं सिज्झिहिति बुज्झिहिति मुच्चिहिति परिणिव्वाहिति सव्वदुक्खाणमंतं करेहिति १४ ॥४०॥ से इमे गामागरजावसणिवेसेसु पव्वइया समणा भवन्ति, तं०-आयरियपडिणीया उवज्झायपडिणीया कुलपडिणीया गणपडिणीया आयरियउवज्झायाणं अयसकारगा अवण्णकारगा अकित्तिकारगा बहूहिं असम्भावुम्भावणाहिं मिच्छत्ताभिणिवेसेहि य अप्पाणं च परं च तदुभयं च वुग्गाहेमाणा वुप्पाएमाणा विहरित्ता बहूइं वासाइं सामण्णपरियागं पाउणंति त्ता तस्स ठाणस्स अणालोइयअपडिक्कंता कालमासे कालं किच्चा उक्कोसेणं लंतए कप्पे देवकिब्बिएसु देवकिब्बिसियत्ताए उववत्तारो भवन्ति, तहिं तेसिं गती तेरससागरोवमाइं ठिती अणाहारगा सेसं तं चेव १५ ॥ से जे इमे सण्णिपंचिंदियतिरिक्खजोणिया पज्जत्तया भवन्ति, तं०-जलयरा खहयरा थलयरा, तेसिं णं अत्थेगइयाणं सुभेणं परिणामेणं पसत्थेहिं अज्झवसाणेहिं लेसाहिं विसुज्झमाणीहिं तयावरणिजाणं कम्माणं खओवसमेणं ईहावूहमगणगवेसणं करेमाणाणं सण्णीपुव्वजाईसरणे समुप्पज्जइ, तए णं ते समुप्पण्णजाईसरा समाणा सयमेव पंचाणुव्वयाइं पडिवज्जंति त्ता बहूहिं सीलव्वयगुणवेरमणपच्चक्खाणपोसहोववासेहिं अप्पाणं भावेमाणा बहूइं वासाइं आउयं पालेति त्ता भत्तं पच्चक्खंति बहूइं भत्ताइं अणसणाए छेयंति त्ता आलोइयपडिक्कंता सभाहिपत्ता कालमासे कालं किच्चा उक्कोसेणं सहस्सारे कप्पे देवत्ताए उववत्तारो भवन्ति, तहिं तेसिं गती अट्टारस सागरोवमाइं ठिती पं० परलोगस्स आराहगा सेसं ते चेव १६ ॥ से जे इमे गामागरजावसंनिवेसेसु आजीविका भवन्ति, तं०-दुधरंतरिया तिधरंतरिया सत्तधरंतरिया उप्पलबेटिया धरसमुदाणिया

विज्जुअंतरिया उट्टिया समणा ते णं एयारूवेणं विहारेणं विहरमाणा बहूइं वासाइं परियायं पाउणिताकालमासे कालं किच्चा उक्कोसेणं अच्युए कप्पे देवत्ताए उववत्तारो भवन्ति, तहिं तेसिं गती बावीसं सागरोवमाइं ठिती अणाराहगा सेसं तं चेव १७ । से जे इमे गामागरजावसणिवेसेसु पव्वइया समणा भवन्ति तं०-अत्तुक्कोसिया परपरिवाइया भूइकम्मिया भुज्जो २ कोउयकारका ते णं एयारूवेणं विहारेणं विहरमाणा बहूइं वासाइं सामण्णपरियागं पाउणंति ता तस्स ठाणस्स अणालोइयअपडिक्कंता कालमासे कालं किच्चा उक्कोसेणं अच्युए कप्पे आभिओगिएसु देवेसु देवत्ताए उववत्तारो भवन्ति तहिं तेसिं गइं बावीसं सागरोवमाइं ठिई परलोगस्स अणाराहगा सेसं तं चेव १८ । से जे इमे गामागरजावसणिवेसेसु णिणहगा भवन्ति तं०-बहुरया जीवपएसिया अव्वत्तिया सामुच्छेया दोकिरिया तेरासिया अबद्धिया इच्चेते सत्त पवयणणिणहगा केवलचरिया लिंगसामण्णा मिच्छहिट्ठी बहूहिं असब्भावुब्भावणाहिं मिच्छत्ताभिणिवेसेहि य अप्पाणं च परं च तदुभयं च वुग्गाहेमाणा वुप्पाएमाणा विहरित्ता बहूइं वासाइं सामण्णपरियागं पाउणंति ता कालमासे कालं किच्चा उक्कोसेणं उवरिमेसु गेवेजेसु देवत्ताए उववत्तारो भवन्ति तहिं तेसिं गती एकत्तीसं सागरोवमाइं ठिती परलोगस्स अणाराहगा सेसं तं चेव १९ । से जे इमे गामागरजावसणिवेसेसु मणुया भवन्ति तं०-अप्पारंभा अप्पपरिगहा धम्मिया धम्माणुया धम्मिट्ठा धम्मक्खाई धम्मप्पलोइया धम्मपलज्जणा धम्मसमुदायारा धम्मेणं चेव वित्तिं कप्पेमाणा सुसीला सुव्वया सुप्पडियाणंदा साहूहिं एकच्चाओ पाणाइवायाओ पडिविरया जावजीवाए एकच्चाओ (एगइयाओ पा०) अपडिविरया एवं जाव

परिग्गहाओ एकच्चाओ कोहाओ माणाओ मायाओ लोहाओ पेजाओ कलहाओ अब्भक्खाणाओ पेसुण्णाओ परपरिवायाओ
 अरतिरतीओ मायाभोसाओ भिच्छादंसणसल्लाओ पडिविरया जावजीवाए एकच्चाओ अपडिविरया एकच्चाओ आरंभसमारंभाओ
 पडिविरया जावजीवाए एकच्चाओ अपडिविरया एकच्चाओ करणकारावणाओ पडिविरया जावजीवाए एगच्चाओ अपडिविरया
 एगच्चाओ पयणपयावणाओ पडिविरया जावजीवाए एकच्चाओ पयणपयावणाओ अपडिविरया एकच्चाओ कोट्टणपिट्टणतज्जण-
 तालणवहबंधपरिकिलेसाओ पडिविरया जावजीवाए एकच्चाओ अपडिविरया एकच्चाओ ण्हाणुम्महणवण्णगविलेवण-
 सहपरिसरसरुवगंधमल्लालंकाराओ पडिविरया जावजीवाए एकच्चाओ अपडिविरया जे यावण्णे तहप्पगारा सावज्जजोगोवहिया
 कम्मंता (सावज्जा अबोहिया पा०) परपाणपरियावणकरा कज्जंति तओ जाव एकच्चाओ अपडिविरया तं०(से जहानामए पा०)
 समणोवासगा भवंति अभिगयजीवाजीवा उवलद्धपुण्णपावा आसवसंवरनिज्जरकिरियाअहिगरणबंधमोक्खकुसला असहेज्जा
 देवासुरणागजक्खरक्खसकिन्नरकिंपुरिसगरुलगंधव्वमहोरगाइएहिं देवगणेहिं निग्गंथाओ पावयणाओ अणइक्कमणिज्जा णिग्गंथे
 पावयणे णिस्संकिया णिक्खंखिया निव्वितिगिच्छा लद्धट्ठा गहियट्ठा पुच्छियट्ठा अभिगयट्ठा विणिच्छियट्ठा अट्ठिभिंजपेम्माणुरागरत्ता
 अयमाउसो! णिग्गंथे पावयणे अट्ठे अयं परमट्ठे सेसे अणट्ठे ऊसियफलिहा अवंगुयदुवारा चियत्तंतेउरपरघरदारप्पवेसा
 चउदसट्ठमुद्दिट्ठपुण्णमासिणीसु पडिपुण्णं पोसहं सम्मं अणुपालित्ता समणे णिग्गंथे फासुएसणिज्जेणं असणपाणखाइमसाइमेणं

वत्थपडिग्गहकंबलपायपुंछणेणं ओसहभेसज्जेणं पडिहारिणं य पीढफलगसेज्जासंथारणं पडिलाभेमाणा विहरंति ता भत्तं पच्चक्खंति ते बहूइं भत्ताइं अणसणाए छेदिंति ता आलोइयपडिक्कंता समाहिपत्ता कालमासे कालं किच्चा उक्कोसेणं अच्चुए कप्पे देवत्ताए उववत्तारो भवन्ति, तेहिं तेसिं गइं बावीसं सागरोवमाइं ठिई आराहया सेसं तहेव २० । से जे इमे गामागरजावसण्णिवेसेसु मणुआ भवन्ति, तं०-अणारंभा अपरिग्गहा धम्मिया जाव कप्पेमाणा सुसीला सुच्चया सुपडियाणंदा साहू सव्वाओ पाणाइवाआओ पडिविरया जाव सव्वाओ परिग्गहाओ पडिविरया सव्वाओ कोहाओ माणाओ मायाओ लोभाओ जाव भिच्छादंसणसल्लाओ पडिविरया सव्वाओ आरंभसमारंभाओ पडिविरया सव्वाओ करणकारावणाओ पडिविरया सव्वाओ पयणपयावणाओ पडिविरया सव्वाओ कुट्टणपिट्टणतज्जणतालणवहबंधपरिकिलेसाओ पडिविरया सव्वाओ ण्हाणुम्मइणवण्णगविलेवणसइफरिसरसरूवगंधमल्लालंकाराओ पडिविरया जे यावण्णे तहप्पगारा सावज्जजोगोवहिया कम्मंता परपाणपरियावणकरा कज्जंति तओवि पडिविरया जावज्जीवाए से जहाणामए अणगारा भवन्ति ईरियासमिया भासासमिया जाव इणमेव णिग्गंथं पावयणं पुरओकाउं विहरंति तेसिं णं भगवंताणं एएणं विहारेणं विहरमाणाणं अत्थेगइयाणं अणंते जाव केवलवरणाणदंसणे समुप्पज्जइ, ते बहूइं वासाइं केवलिपरियागं पाउणंति जाव पाउणित्ता भत्तं पच्चक्खंति ता बहूइं भत्ताइं अणसणाए छेदेन्ति ता जस्सट्टाए कीरइ णग्गभावे० अंतं करंति, जेसिंपि य णं एगइयाणं णो केवलवरणाणदंसणे समुप्पज्जइ ते बहूइं वासाइं छउमत्थपरियागं पाउणन्ति ता आवाहे उप्पण्णे वा अणुप्पण्णे वा भत्तं पच्चक्खंति,

॥ औपपातिकमुपांगं ॥

५९

पू. सागरजी म. संशोधित

ते बहूँ भत्ताइं अणसणाए छेदेन्ति ता जस्सट्टाए कीरइ णग्गभावे जाव तमट्टमाराहत्ता चरिमेहिं ऊसासणीसासेहिं अणंतं
 अणुत्तरंनिव्वाघायं निरावरणं कसिणं पडिपुण्णं केवलवरणाणदंसणं उप्पाडिंति, तओ पच्छा सिञ्जिहिन्ति जाव अंतं करेहिन्ति, एगच्चा
 पुण एगे भयंतारो पुव्वकम्भावसेसेणं कालमासे कालं किच्चा उक्कोसेणं सव्वट्टसिद्धे महाविमाणे देवत्ताए उववत्तारो भवन्ति, तहिं
 तेसिं गई तेत्तीसं सागरोवमाइं ठिई आराहगा सेसं तं चेव २१ । से जे इमे गामागरजावसण्णिवेसेसु मणुआ भवन्ति तं०-सव्वकामविरया
 सव्वरागविरया सव्वसंगातीता सव्वसिणेहातिक्कंता अक्कोहा णिक्कोहा खीणक्कोहा एवं माणमायालोहा अणुपुव्वेणं अट्टकम्मपयडीओ
 खवेत्ता उप्पि लोयगपइट्टाणा हवन्ति १४१ । अणगारे णं भंते! भाविअप्पा केवलिसमुग्घाएणं समोहणित्ता केवलकप्पं लोयं फुसित्ताणं
 चिट्ठइ?, हंता चिट्ठइ, से णूणं भंते! केवलकप्पे लोए तेहिं णिज्जरापोग्गलेहिं फुडे?, हंता फुडे, छउमत्थे णं भंते! मणुस्से तेसिं
 णिज्जरापोग्गलाणं किंचि वण्णेणं वण्णं गंधेणं गंधं रसेणं रसं फासेणं फासं जाणइ पासइ?, गोयमा! णो इणट्ठे समट्ठे, से केणट्ठेणं
 भंते! एवं वुच्चइ छउमत्थे णं मणुस्से तेसिं णिज्जरापोग्गलाणं णो किंचि वण्णेणं वण्णं जाव जाणइ पासइ?, गोयमा! अयं णं
 जंबुदीवे दीवे सव्वदीवसमुद्दाणं सव्वब्भंतरए सव्वखुड्डाए वट्ठे तेलापूयसंठाणसंठिए वट्ठे रहचक्कवालसंठाणसंठिए वट्ठे
 पुक्खरकणियासंठाणसंठिए वट्ठे पडिपुण्णचंदसंठाणसंठिए एक्कं जोयणसयसहस्सं आयामविक्खंभेणं तिण्णि जोयणसयसहस्साइं
 सोलस सहस्साइं दोण्णि य सत्तावीसे जोयणसए तिण्णि य कोसे अट्ठावीसं च धणुसयं तेरस य अंगुलाइं अब्दंगुलियं च किंचिविसेसाहिए

परिक्खेवेणं पं०, देवे णं महिइढीए महजुइए महव्वले महाजसे महासुक्खे महाणुभावे सविलेवणं गंधसमुग्गयं गिण्हइ ता तं अवदालेइ ता जाव इणमेवत्तिकटट्टु केवलकप्पं जंबुदीवं दीवं तीहिं अच्छराणिवाएहिं तिसत्तखुत्तो अणुपरिअट्टित्ताणं हव्वमागच्छेज्जा से णूणं गोयमा! से केवलकप्पे जंबुदीवे दीवे तेहिं घाणपोग्गलेहिं फुडे?, हंता फुडे, छउमत्थे णं गोयमा! मणुस्से तेसिं घाणपोग्गलाणं किंचि वण्णेणं वण्णं जाव जाणति पासति?, भगवं णो इण्डे समट्टे, से तेणट्टेणं गोयमा! एवं वुच्चइ छउमत्थे णं मणुस्से तेसिं णिज्जरापोग्गलाणं नो किंचि वण्णेण वण्णं जाव जाणइ पासइ, एसुहुमा णं ते पोग्गला पं० समणाउसो! सव्वलोयंपिय णं ते फुसित्ताणं चिट्ठंति, कम्हा णं भंते! केवली समोहणंति कम्हा णं भंते! केवली समुग्घायं गच्छंति? गोयमा! केवलीणं चत्तारि कम्मंसा अपलिक्खीणा (अवेइया अनिज्जिण्णा पा०) भवंति तं० वेयणिज्जं आउयं णामं गुत्तं, सव्वबहुए से वेयणिज्जे कम्मे भवइ सव्वत्थोवे से आउए कम्मे भवइ, विसमं समं करेइ बंधणेहिं ठिईहि य विसमसमकरणयाए बंधणेहिं ठिईहि य एवं खलु केवली समोहणंति एवं खलु केवली समुग्घायं गच्छति, सव्वेवि णं भंते! केवली समुग्घायं गच्छंति?, णो इण्डे समट्टे, अकिच्चाणं समुग्घायं, अणंता केवली जिणा। जरामरणविप्पमुक्का, सिद्धिं वरगइं गया ॥८॥ कइसमए णं भंते! आउज्जीकरणे पं०? गोयमा! असंखेज्जसमइए अंतोमुहुत्तिए पं०, केवलिसमुग्घाए णं भंते! कइसमइए पं०?, गोयमा! अट्टसमइए पं० तं०-पढमे समए दंडं करेइ बिइए समए कवाडं करेइ तईए समए मंथं करेइ चउत्थे समए लोयं पूरेइ पंचमे समए लोयं पडिसाहरइ छट्ठे समए मंथं पडिसाहरइ सत्तमे समए कवाडं पडिसाहरइ

॥ औपपातिकमुपांगं ॥

६१

पू. सागरजी म. संशोधित

अद्वमे समए दंडं पडिसाहरइ ता तओ पच्छा सरीरत्थे भवइ, से णं भंते! तहा समुग्घायं गए किं मणजोगं जुंजइ वयजोगं जुंजइ कायजोगं जुंजइ?, गोयमा! णो मणजोगं जुंजइ णो वयजोगं जुंजइ कायजोगं जुंजइ, कायजोगं जुंजमाणे किं ओरालियसरीरकायजोगं जुंजइ ओरालियमिस्सं वेउव्वियसरीरकायजोगं जुंजइ वेउव्वियमिस्ससरीरकायजोगं जुंजइ आहारसरीरकायजोगं जुंजइ आहारसरीरमिस्सकायजोगं जुंजइ कम्मां?, गोयमा! ओरालियसरीरकायजोगं जुंजइ ओरालियमिस्ससरीरकायजोगंपि जुंजइ णो वेउव्वियं णो वेउव्वियमिस्सं णो आहारं णो आहारमिस्सं कम्मसरीरकायजोगंपि जुंजइ, पढमद्वमेसु समएसु ओरालियसरीरकायजोगं जुंजइ विइयच्छद्वसत्तमेसु समएसु ओरालियमिस्ससरीरकायजोगं जुंजइ तईयचउत्थमंचमेहिं कम्मासरीरकायजोगं जुंजई, से णं भंते! तहा समुग्घायगए सिज्झिहिइ बुज्झिहिइ मुच्चिहिइ परिनिव्वाहिइ सव्वदुक्खाणमंतं करेहिइ?, णो इणद्वे समद्वे, से णं तओ पडिनियत्तइ ता इहमागच्छइ ता तओ पच्छा मणजोगंपि जुंजइ वयजोगंपि जुंजइ कायजोगंपि जुंजइ, मणजोगं जुंजमाणे किं सच्चमणजोगं जुंजइ मोसं सच्चा मोसं असच्चा मोसं? गोयमा! सच्चमणजोगं जुंजइ णो मासं णो सच्चा मोसं असच्चा मोसमणजोगंपि जुंजइ, वयजोगं जुंजमाणे किं सच्चवइजोगं जुंजइ मोसं किं सच्चा मोसं असच्चा मोसं?, गोयमा! सच्चवइजोगं जुंजइ णो मोसं णो सच्चा मोसं असच्चा मोसवइजोगंपि जुंजइ, कायजोगं जुंजमाणे आगच्छेज्ज वा चिद्वेज्ज वा णिसीएज्ज वा तुयद्वेज्ज वा उल्लंघेज्ज वा पलंघेज्ज वा उक्खेवणं वा अवक्खेवणं वा तिरिंयक्खेवणं वा करेज्जा पाडिहारियं वा पीढफलगसेज्जसंथारगं

॥ औपपातिकमुपांगं ॥

६२

पू. सागरजी म. संशोधित

पच्यप्पिणेज्जा । ४२ । से णं भंते! तहा सजोगी सिञ्झिहिइ जाव अंतं करेहिइ? णो इणट्ठे समट्ठे, से णं पुव्वामेव सण्णस्स पंचिंदियस्स पज्जत्तगस्स जहण्णजोगस्स हेट्ठा असंखेज्जगुणपरिहीणं पढमं मणजोगं निरुंभइ तयाणंतरं च णं बिंदियस्स पज्जत्तगस्स जहण्णजोगस्स हेट्ठा असंखेज्जगुणपरिहीणं बिइयं वइजोगं निरुंभइ तयाणंतरं च णं सुहुमस्स पणगजीवस्स अपज्जत्तगस्स जहण्णजोगस्स हेट्ठा असंखेज्जगुणपरिहीणं तइयं कायजोगं णिरुंभइ, से णं एएणं उवाएणं पढमं मणजोगं णिरुंभइ ता वयजोगं णिरुंभइ ता कायजोगं णिरुंभइ ता जोगनिरोहं करेइ ता अजोगत्तं पाउणति ता इसिंहस्सपंचक्खरउच्चारणद्धाए असंखेज्जसमइयं अंतोमुहुत्तियं सेलेसिं पडिवज्जइ पुव्वरइयगुणसेढीयं च णं कम्मं तीसे सेलेसिमद्धाए असंखेज्जाहिं गुणसेढीहिं अणंते कम्मंसे खवेति वेयणिज्जाउयणामगुत्ते इच्चेते चत्तारि कम्मंसे जुगवं खवेइ ता ओरालियतेयाकम्माइं सव्वाहिं विप्पजहणाहिं विप्पजहइ ता उज्जुसेढीपडिवन्ने अफुसमाणगई उडढं एक्कसमएणं अविग्गहेणं गंता सागारोवउत्ते सिञ्झिहिइ, तेणं तत्थ सिद्धा हवंति सादीया अपज्जवसिया असरीरा जीवघणा दंसणनाणोवउत्ता निट्ठियट्ठा निरेयणा नीरया णिम्मला वितिमिरा विसुद्धा सासयमणागयद्धं कालं चिट्ठंति, से केणट्ठेणं भंते! एवं वुच्चइ ते णं तत्थ सिद्धा भवंति सादीया अपज्जवसिया जाव चिट्ठंति?, गोयमा! से जहाणामए बीयाणं अगिगदइढाणं पुणरवि अंकुरुप्पत्ती ण भवइ एवामेव सिद्धाणं कम्मबीए दइढे पुणरवि जम्मुप्पत्ती न भवइ से तेणट्ठेणं गोयमा! एवं वुच्चइ ते णं तत्थ सिद्धा हवंति सादीया अपज्जवसिया जाव चिट्ठंति, जीवा णं भंते! सिञ्झमाणा कयरंमि संघयणे सिञ्झंति?, गोयमा! वइरोसभणारायसंघयणे सिञ्झंति,

जीवा णं भंते! सिञ्जमाणा कयरंमि संठाणे सिञ्जंति?, गोयमा! छण्हं संठाणाणं अण्णतरे संठाणे सिञ्जंति, जीवा णं भंते! सिञ्जमाणा कयरंमि उच्चत्ते सिञ्जंति?, गोयमा! जहण्णेणं सत्तरयणीओ उक्कोसेणं पंचधणुस्सए सिञ्जंति, जीवा णं भंते! सिञ्जमाणा कयरंमि आउए सिञ्जंति?, गोयमा! जहण्णेणं साइरेगट्टवासाउए उक्कोसेणं पुव्वकोडियाउए सिञ्जंति, अत्थि णं भंते! इमीसे रयणप्पहाए पुढवीए अहे सिद्धा परिवसंति?, णो इणट्ठे समट्ठे, एवं जाव अहेसत्तमाए, अत्थि णं भंते! सोहम्मस्स कप्पस्स अहे सिद्धा परिवसंति?, णो इणट्ठे समट्ठे, एवं सव्वेसिं पुच्छा, ईसाणस्स सणंकुमारस्स जाव अच्चुयस्स गेविज्जविमाणाणं अणुत्तरविमाणाणं, अत्थि णं भंते! ईसीपब्भाराए पुढवीए अहे सिद्धा परिवसंति?, णो इणट्ठे समट्ठे, से कहिं खाइ णं भंते! सिद्धा परिवसंति?, गोयमा! इमीसे रयणप्पहाए पुढवीए बहुसमरमणिज्जाओ भूमिभागाओ उड्ढं चंदिमसूरियग्गहगणणक्खत्तताराभव (ग)णाओ बहूइं जोयणसयाइं बहूइं जोयणसहस्साइं बहूइं जोयणसयसहस्साइं बहूओ जोयणकोडीओ बहूओ जोयणकोडाकोडीओ उड्ढतरं उप्पइत्ता सोहम्मीसाण-सणंकुमारमाहिंदबंभलंतगमहासुक्कसहस्सारआणयपाणयआरणच्चुय तिण्णि य अट्टारे गेविज्जविमाणावाससए वीइवइत्ता विजयवेजयंतजयंतअपराजियसव्वट्टसिद्धस्स य महाविमाणस्स सव्वउवरिल्लाओ थूभियग्गाओ दुवालसजोयणाइं अब्बाहाए एत्थि णं ईसीपब्भारा णामं पुढवी पं० पणयालीसं जोयणसयसहस्साइं आयामविक्खंभेणं एगा जोयणकोडी बायालीसं सयसहस्साइं तीसं च सहसाइं दोण्णि य अउणापण्णे जोयणसए किंचिविसेसाहिए परिरएणं, ईसिपब्भाराए णं पुढवीए बहुमज्झदेसभाए अट्टजोयणिए

खेत्ते अट्टजोयणाइं बाहल्लेणं तथाऽणंतं च णं मायाए परिहायमाणी २ सव्वेसु चरिमपेरंतेसु मच्छियपत्ताओ तणुयतरा अंगुलस्स असंखेज्जइभागं बाहल्लेणं पं०, ईसीपब्भाराए णं पुढवीए दुवालस णामधेज्जा पं० तं०- ईसीइ वा ईसीपब्भाराइ वा, तणूइ वा तणूतणूइ वा सिद्धीइ वा सिद्धालएइ वा मुत्तीइ वा मुत्तालएइ वा लोयग्गेइ वा लोयग्गथूभियाइ वा लोयग्गपडि(बु)ज्झणाइ वा सव्वपाणभूयजीवसत्तसुहावहाइ वा, ईसीपब्भारा णं पुढवी सेया संखतल (आयंसतल पा०) विमलसोल्लियमुणालदगरय- तुसारगोक्खीरहारवण्णा उत्ताणयच्छत्तसंठाणसंठिया सवज्जुणसुवण्णमई अच्छा सण्हा लण्हा घट्ठा मट्ठा णीरया णिम्मला णिप्पंका णिक्कंकडच्छाया समीरीचिया सुप्पमा पासादीया दरिसणिज्जा अभिरूवा पडिरूवा, ईसीपब्भाराए णं पुढवीए सीयाए जोयणंमि लोगंते तस्स जोयणस्स जे से उवरिल्ले गाउए तस्स णं गाउअस्स जे से उवरिल्ले छभागिए तत्थ णं सिद्धा भगवंतो सादीया अपज्जवसिया अणेगजाइजरामरणजोणिवेयणसंसारकलंकलीभावपुणब्भवगब्भवासवसहीपवंचसमइक्कंता सासयमणागयमब्धं चिट्ठंति । ४३ । गाथा कहिं पडिहया सिद्धा?, कहिं सिद्धा पडिट्टिया । कहिं बोदिं चइत्ताणं, कत्थ गंतूण सिज्झई? ॥ ९ ॥ अलोगे पडिहया सिद्धा, लोयग्गे य पडिट्टिया । इहं बोदिं चइत्ताणं, तत्थ गंतूण सिज्झइ ॥ १० ॥ जं संठाणं तु इहं भवं चयंतस्स चरिमसमयंमि । आसी य पएसघणं तं संठाणं तहिं तस्स ॥ ११ ॥ दीहं वा हस्सं वा जं चरिमभवे हवेज्ज संठाणं । तत्तो तिभागहीणं सिद्धाणोगाहणा भणिया ॥ १२ ॥ तिण्णि सया तेत्तीसा धणूतिभागो य होइ बोद्धव्वा । एसा खलु सिद्धाणं उक्कोसोगाहणा भणिया ॥ १३ ॥ चत्तारिय रयणीओ

॥ औपपातिकमुपांगं ॥

६५

पू. सागरजी म. संशोधित

रयणि तिभागूणिथा य बोद्धव्वा । एसा खलु सिद्धाणं मज्झिम ओगाहणा भणिया ॥ १४ ॥ एक्का य होइ रयणी साहीया अंगुलाइं
 अट्ट भवे । एसा खलु सिद्धाणं जहण्ण ओगाहणा भणिया ॥ १५ ॥ ओगाहणाए सिद्धा भवत्तिभागेण होन्ति परिहीणा । संठाणमणिथं
 जरामरणविप्पमुक्काणं ॥ १६ ॥ जत्थ य एगो सिद्धो तत्थ अणंता भवक्खयविमुक्का । अण्णोऽण्णसमवगाढा पुट्ठा सव्वे य लोगंते
 ॥ १७ ॥ फुसइ अणंते सिद्धे सव्वपएसेहिं णियमसो सिद्धो । तेवि असंखेज्जगुणा देसपएसेहिं जे पुट्ठा ॥ १८ ॥ असरीरा जीवधणा
 उवउत्ता दंसणे य णाणे य । सागारमणागारं लक्खणमेयं तु सिद्धाणं ॥ १९ ॥ केवलणाणुवउत्ता जाणंती सव्वभावगुणभावे । पासंति
 सव्वओ खलु केवलदिट्ठीहऽणंताहिं ॥ २० ॥ णवि अत्थि माणुसाणं तं सोक्खं णविय सव्वदेवाणं । जं सिद्धाणं सोक्खं अव्वाबाहं
 उवगयाणं ॥ २१ ॥ जं देवाणं सोक्खं सव्वद्धापिंडियं अणंतगुणं । ण य पावइ मुत्तिसुहं णंताहिं वगवगूहिं ॥ २२ ॥ सिद्धस्स
 सुहो रासी सव्वद्धापिंडिओ जइ हवेज्जा । सोऽणंतवग्गभइओ सव्वागासे ण माएज्जा ॥ २३ ॥ जह णाम कोइ मिच्छो नगरगुणे बहुविहे
 वियाणंतो । न चएइ परिकहेउं उवमाए तहिं असंतीए ॥ २४ ॥ इय सिद्धाणं सोक्खं अणोवमं णत्थि तस्स ओवम्मं । किं चि विसेसेणेत्तो
 ओवम्ममिणं सुणह वोच्छं ॥ २५ ॥ जह सव्वकामगुणियं पुरिसो भोत्तूण भोयणं कोई । तण्हाछुहाविमुक्कोअच्छेज्ज जहा अभियत्तित्तो
 ॥ २६ ॥ इ सव्वकालत्तित्ता अतुलं निव्वाणमुवगया सिद्धा । सासयमव्वाबाहं चिट्ठंति सुही सुहं यत्ता ॥ २७ ॥ सिद्धत्तिय बुद्धत्तिय
 पारगयत्तिय परंपरगयत्ति । उम्भुक्ककम्भकवया अजरा अमरा असंगा य ॥ २८ ॥ णिच्छिण्णसव्वदुक्खा जाइजरामरणबंधण- विमुक्का

॥ औपपातिकमुपांगं ॥

६६

पू. सागरजी म. संशोधित

। अव्वाबाहं सुखं अणुहोती सासयं सिद्धा ॥ २९ ॥ अतुलसुहसागरगयाअव्वाबाहं अणोवमं पत्ता । सव्वमणागयमब्धं चिट्ठंति सुही सुहं पत्ता ॥ ३० ॥ २२। इति श्री औपपातिकमुपांगं सूत्रं संपूर्णं ॥ प्रभु महावीरस्वामीनी पट्टपरंपरानुसार कोटीगण-वैरी शाखा-चान्द्रकुल प्रचंड प्रतिभा संपन्न, वादी विजेता परमोपास्य पू. मुनि श्री झवेरसागरजी म.सा. शिष्य बहुश्रुतोपासक, सैलाना नरेश प्रतिबोधक, देवसूर तपागच्छ, समाचारी संरक्षक, आगमोद्धारक पूज्यपाद आचार्यदेवेश् श्री आनंदसागर सूरीश्वरजी महाराजा शिष्य प्रौढ प्रतापी-सिद्धचक्र आराधक समाज संस्थापक पूज्यपाद आचार्य श्री चन्द्रसागर सूरीश्वरजी म. सा. शिष्य चारित्र चूडामणी, हास्य विजेतामालवोद्धारक महोपाध्याय श्री धर्मसागरजी म.सा. शिष्य आगम विशारद, नमस्कार महामंत्र समाराधक पूज्यपाद पंन्यास प्रवर श्री अभयसागरजी म. सा. शिष्य शासन प्रभावक, नीडर वक्ता पू. आ. श्री अशोकसागर सूरिजी म.सा. शिष्य परमात्म भक्ति रसभूत पू. आ. श्री जिनचन्द्रसागर सू.म.सा. लघुगुरुप्रवचन प्रभावक पू.आ. श्री हेमचन्द्रसागर म.सा. शिष्य पू. गणी श्री पूर्णचन्द्रसागरजी म. सा. आ आगमिक सूत्र अंगे सं. २०५८ / ५९ / ६० वर्ष दरम्यान संपादन कार्य माटे महेनत करी प्रकाशन दिने पू. सागरजी म. संस्थापित प्रकाशन कार्यवाहक जैनानंद पुस्तकालय, सुरत द्वारा प्रकाशित करेल छे...



